

ივანე ჯავახიშვილის სახელობის თბილისის სახელმწიფო უნივერსიტეტი  
ჰუმანიტარულ მეცნიერებათა ფაკულტეტი

სამაგისტრო პროგრამა საქართველოს ისტორია

**მაკა მაზიაშვილი**

**სამეფო კარის ცერემონიები შუა საუკუნეების საქართველოში**

ნაშრომი შესრულებულია საქართველოს ისტორიის მაგისტრის  
აკადემიური ხარისხის მოსაპოვებლად

სამეცნიერო ხელმძღვანელი აპოლონ თაბუაშვილი  
ისტორიის დოქტორი, თსუ ასოცირებული პროფესორი

თბილისი

2019

Ivane Javakhishvili Tbilisi State University

Faculty of Humanities

MA Program in History

**Maka Maziashvili**

**Ceremonies of the Royal Court in Medieval Georgia**

Thesis is prepared to obtain MA Degree in History of Georgia

Scientific Advisor Apolon Tabuashvili

Ph.D. in History, TSU Associated Professor

Tbilisi

2019

## ანოტაცია

სამაგისტრო ნაშრომი ეხება სამეფო კარის ცერემონიებს. ცერემონიები მნიშვნელოვან როლს თამაშობდა შუა საუკუნეების საქართველოში. თემაში განხილულია სხვადასხვა ცერემონია, ხოლო მთლიანი ნაშრომი მოიცავს შესავალს, ძირითად ნაწილსა და დასკვნას. ძირითადი ნაწილი დაყოფილია შვიდ თავად. პირველ თავში აღწერილია მეფის კურთხევის ცერემონია. მეორე თავში ვეცნობით დარბაზობის წესებს, ფორმებს და მათ დანიშნულებას. მესამე თავი მეორე თავის ერთგვარ გაგრძელებას წარმოადგენს, რადგან დარბაზობის შემდეგ ხშირად იმართებოდა პურობა, ხოლო პურობის ცერემონია კარგად ჩამოყალიბებული და სრულყოფილი ცერემონიალით ტარდებოდა. მეოთხე თავი ეხება მოხელეთა დანიშვნის ცერემონიას. მეხუთე თავში მეფის ცერემონიალური სამოსია განხილული. მეექვსე თავი ეთმობა უცხოელი სტუმრის მიღების წესების აღწერას. მეშვიდე თავში განხილულია მეფის დაკრძალვის ცერემონია.

ნაშრომის შესრულების მიზანია ქართული სამეფო ცერემონიების შესახებ მეტ-ნაკლებად სრული ინფორმაციის მოგროვება და მათი განხილვა, აღნიშნული თემა აქტუალურია იქიდან გამომდინარე, რომ ცერემონიების ჩატარების წესები ნათლად მიუთითებენ სამეფო კარზე არსებულ პოლიტიკურ და კულტურულ მდგომარეობას, ასევე, იმას თუ რამდენად განვითარებული იყო საზოგადოება, რა იყო უმაღლესი ქართული საზოგადოებისთვის მნიშვნელოვანი და სხვა მრავალი დეტალი. თემის განხილვა ასეთი რაკურსით ერთგვარი სიახლე იქნება, რადგან შუა საუკუნეების საქართველოს სამეფო კარის ყველა მნიშვნელოვანი ცერემონია ერთად აღებული ქართული ისტორიოგრაფიაში არ არის განხილული. ეს იქნება პირველი მცდელობა ერთად მოვუყაროთ თავი დაგროვილ ინფორმაციას და განვიხილოთ იმის მიხედვით, რამდენადაც ქართული ისტორიული წყაროები მოგვცემს ამის საშუალებას.

## Annotation

MA thesis deals with issues of the royal ceremonies of medieval Georgia. They had an important role in the middle ages. Several ceremonies are discussed here and overall thesis consists of preface, main part and conclusion. The main part of thesis is divided in seven chapters. The first chapter is about the royal ceremony of coronation. Second chapter is concerning ceremonies of the royal court (*darbazi*). Third chapter deals with the issue of the royal banquet, which could be defined as a continuation of previous section. Forth chapter is about appointment ceremony of court officials. Fifth chapter included information on royal clothing of the Georgian sovereigns. Sixth chapter deals with the issue of reception of foreign ambassadors and guests. The last chapter is about the ceremony of royal funeral.

The aim of our thesis is to collect and consider all available information about the royal ceremonies. The topic is significant as it clearly demonstrates the political and the cultural condition of the royal court. It also demonstrates how much society was developed in the middle ages. Discussion on these issues seems to be original approach to the topic just as all these royal ceremonies of medieval Georgian has never been examined utterly in the Georgian historiography. Hence, this is the first attempt to collect all necessary information for analyzes, as much as sources are available, and as a result to draw some conclusions.

## შინაარსი

	33
შესავალი .....	6
I თავი. მეფის კურთხევა.....	8
II თავი. სამეფო დარბაზობა.....	28
III თავი. საზემო პურობა.....	37
IV თავი. მოხელეთა დანიშვნა.....	41
V თავი. მეფის ცერემონიალური სამოსი.....	50
VI თავი. უცხოელი სტუმრის მიღება.....	56
VII თავი. მეფის დაკრძალვა.....	66
დასკვნა.....	75
გამოყენებული წყაროები და ლიტერატურა .....	77

## შესავალი

აღნიშნული ნაშრომის მიზანია ერთად მოუყაროს თავი სამეფო კარზე არსებულ ცერემონიებს, განიხილოს თითოეული მათგანი და თვალი გაადევნოს მის განვითარებას. სამეფო კარის ცერემონიები მრავალმხრივ საინტერესოა, რადგან უნიკალურად აღგვიწერენ სამეფო კარზე არსებულ ვითარებას, ისინი ქვეყნის განვითარების და კულტურის ერთგვარ განმსაზღვრელად წარმოგვიდგებიან. ნებისმიერი ცერემონიის ჩატარება მოითხოვს იმ ტრადიციების და წესების გათვალისწინებას რაც დამკვიდრებული იყო ქვეყანაში, შესაბამისად, ყველაფერი ეს ასახვას ჰპოვებდა ცერემონიაში. შუა საუკუნეების სამეფო კარის ცერემონიათა ყველა შემადგენელი დეტალი ქმნის იმ საერთო რეალობას, რასაც წარმოადგენდა შუა საუკუნეების საქართველოს სამეფო კარი.

შუა საუკუნეების საქართველოს სამეფო კარის ცერემონიალი კომპლექსურად არ არის შესწავლილი, ერთად თავმოკრილი მასალა კი საინტერესო და სიახლის შემცველი იქნება მკითხველისთვის. ჩვენ განვიხილავთ ცერემონიებს, მათ მნიშვნელობას და იმ დეტალებს, რომლებსაც მივყავართ შუა საუკუნეების საქართველოს ყოფა-ცხოვრებასთან და კულტურასთან. ცერემონიები წლების მანძილზე განხილებოდა სხვადასხვა თვალთახედვიდან, ზოგჯერ მეცნიერები სოციალური ფენებით ინტერესდებოდნენ, ზოგჯერ სხვადასხვა მოხელე-დიდებულის უფლება-მოვალეობების გარკვევით, ჩვენ კი ისტორიულ წყაროებს მხოლოდ ცერემონიების აღსადგენად გამოვიყენებთ და შევეცდებით ნათლად წარმოვადგინოთ ის რეალობა, რაც სუფევდა შუა საუკუნეების სამეფო კარზე.

საკითხის შესასწავლად, ძირითადად, ვყვრდნობით იმ ქართულ წერილობით ძეგლებს, რომლებიც საუკუნეების განმავლობაში ქართულ ისტორიოგრაფიაში დიდ

როლს ასრულებს. „ქართლის ცხოვრება“ არის უნიკალური ძეგლი, რომელიც ჩვენი ერთ-ერთი მთავარი წყაროა, კერძოდ ვიყენებთ: ჯუანშერის „ცხოვრებად ვახტანგ გორგასლისა“; „მატიანე ქართლისაჲ“; დავითის ისტორიკოსის „ცხოვრებად მეფეთ-მეფისა დავითისი“; სუმბატ დავითის ძის „ცხოვრებად და უწყებად ბაგრატონიანთაჲ“; თამარის ისტორიკოსის „ისტორიანი და აზმანი შარავანდედთანი“; ბასილი ეზოსმოდვარის „ცხოვრებად მეფეთ მეფისა თამარისი“ და ჟამთააღმწერელის „ასწლოვანი მატიანე“. ასევე, ძირითადი წყაროა ი. დოლიძის გამოცემული „ქართული სამართლის ძეგლების“ I და II ტომები, საიდანაც ვიღებთ ინფორმაციას იმ ისტორიული ძეგლების შესახებ, რომლებშიც საუბარია სამეფო ცერემონიებზე, ესენია: „ხელმწიფის კარის გარიგება“, „დასტურლამალი“ და სხვ. ასევე, გამოყენებულია ტოლოჩანოვის იმერეთში ელჩობის მუხლობრივი აღწერილობა, 1650–1652 წწ.“; პაპუნა ორბელიანის „ამბავნი ქართლისანი“ და სხვა ჩვენთვის მნიშვნელოვანი ისტორიული წყაროები.

ქართულ ისტორიოგრაფიაში აღნიშნული საკითხი ბევრი ისტორიკოსის განხილვის საგანი არ გამხდარა, მაგრამ, გარკვეულწილად, მაინც ეხებიან ჩვენთვის საინტერესო წყაროებს. საკითხის შესწავლის მიზნით ვიყენებთ აკად. ივ. ჯავახიშვილის „თხზულებები თორმეტ ტომად“ VI-VII ტომებს, სადაც განხილულია მეფედ კურთხევის შესახებ ისტორიული წყაროები. ასევე, ვიყენებთ პროფ. ჯაბა სამუშიას „ბაგრატ III“-ს. გამოყენებული გვაქვს პროფ. ილია ანთელავას „საქართველოს ცენტრალური და ადგილობრივი მმართველობა XI-XIII სს-ში“. ავტორთა კოლექტივის მიერ შედგენილი ისეთი წიგნები როგორებიცაა: „საქართველოს ისტორიის ნარკვევების“ III ტომი, „ქართული დიპლომატიის ისტორია“; „ქართული დიპლომატიის ისტორიის ნარკვევები“ (I და II ტომები) და სხვ. სამაგისტრო ნაშრომში გამოყენებულია მიხეილ ბახტაძის „ერისთავობის ინსტიტუტი საქართველოში“; აკად. ნიკოლოზ ბერძენიშვილის „საქართველოს ისტორიის საკითხები“ ტ. III; ი. ციციშვილის „მასალები ქართული ჩაცმულობის ისტორიისთვის“ და სხვ.

## I თავი

### მეფის კურთხევა

ისეთი მონარქიული ქვეყნისთვის, როგორც საქართველო იყო დიდი მნიშვნელობა ენიჭებოდა მეფის კურთხევის ცერემონიას. საუკუნეთა განმავლობაში, რა თქმა უნდა, იცვლებოდა დეტალები, მაგრამ ძირითადი ნაწილი ცერემონიის უცვლელი უნდა დარჩენილიყო. ქართულ წერილობით წყაროებში დაფიქსირებულია საინტერესო ცნობები ამ ცერემონიასთან დაკავშირებით. რაც შეეხება ერთიან მთლიან ცერემონიას ის „წესი და განგება მეფედ კურთხევისა“-ში არის წარმოდგელები. ეს წერილობითი ძეგლი XIII საუკუნეს განეკუთვნება, მანამდე კი სხვადასხვა ისტორიკოსთან ფრაგმენტებია დაცული მეფედ კურთხევის ცერემონიის, ან იმის თაობაზე, რომ მეფედ კურთხევა ნამდვილად ხდებოდა. როდის დაწესდა საქართველოში მეფედ კურთხევა ზუსტი ცნობა არ მოგვეპოვება. ერთი რამ ცხადია, როდესაც ქრისტიანობა სახელმწიფო რელიგიად გამოცხადდა მას შემდეგ მეფედ კურთხევა საერო და სასულიერო ცერემონიას მოიცავდა. უმაღლესი საერო ხელისუფალი, მეფე, უმაღლეს სასულიერო პირს უნდა დაელოცა. საინტერესოა, რომ „ქართლის ცხოვრებაში“ ბაგრატონთა მემკვიდრე, სუმბატ დავითის ძე, აღარნასეს მეფედ დასმის ფაქტს აფიქსირებს, მაგრამ არაფერს ამბობს მისი კურთხევის შესახებ. სუმბატის თხზულებაში ვკითხულობთ: „აღარნასე, ძე დავით კურაპალატისად, დასუეს ქართველთა მეფედ [ნაცვლად] მის მოკლეულისა“.<sup>1</sup> სუმბატ დავითის ძე, ზოგადად,

---

<sup>1</sup> სუმბატ დავითის ძე. ცხოვრება და უწყება ბაგრატონიანთად. გამოსცა მ. ლოთიფიანძემ. ქართლის ცხოვრება. თბ.2008, გვ. 366.

მოკლე ცნობების მონოდებით გამოირჩევა, მაგრამ, ამ შემთხვევაში, აღნიშნული ინფორმაცია მაინც მნიშვნელოვანი ცნობაა ჩვენთვის. „დასუეს ქართველთა მეფედ“ რას გულისხმობდა ზუსტად არ არის განმარტებული, ამიტომ ვერ დავაზუსტებთ მეფედ აკურთხეს თუ არა ადარნასე.

რაც შეეხება პირველ ცნობას, რომელმაც ჩვენამდე მოაღწია და ეხება მეფის კურთხევას, გიორგი II-ს ეხება. „მატიანე ქართლისაჲში“ ვკითხულობთ: „ითხოვა ლიპარიტ ძე ბაგრატიისი გიორგი მეფედ და მოსცა იგი დედამან და დიდებულთა მის ქვეყნისანი. მოიყუანეს საყდარსა რუისსა, აკურთხეს მეფედ“.<sup>2</sup> რა თქმა უნდა, ეს პირველი მეფედ კურთხევა არ იქნებოდა. ამავე წყაროში ბაგრატ III-ის შესახებ გვხვდება ასეთი თრაზები: „შთაიყუანეს იგი აფხაზეთს, დალოცეს მეფედ და დაუმორჩილნეს ყოველნი ბრძანებასა მისსა, რამეთუ განსრულებულ იყო ჰასაკითა“.<sup>3</sup> ადვილი შესაძლებელია მეფედ დალოცვა სწორედ კურთხევას ნიშნავდეს, სამწუხაროდ სხვა ცნობა, რომელიც უფრო გაამყარებდა ამ მოსაზრებას ჩვენამდე მოღწეული არ არის. დანამდვილებით არც ის ვიცით სად და როდის განხორციელდა ბაგრატის მეფედ კურთხევა, ან ვინ ესწრებოდნენ. ამასთან დაკავშირებით მხოლოდ ვარაუდების გამოთქმა შეგვიძლია. როგორც პროფ. ჯაბა სამუშია ვარაუდობს, ბაგრატის მეფედ კურთხევა ქუთაისის მთავარ კათედრალში უნდა ჩატარებულიყო, ეს უნდა ყოფილიყო საერო და სასულიერო რიტუალების ერთობლიობით ჩატარებული მეფედ კურთხევის ცერემონია.<sup>4</sup>

მეფედ დასმის შესახებ ცნობებს გვანჯღის დავითის ისტორიკოსი, კერძოდ ვკითხულობთ: დავითმა „თჳსითა ჴელითა დასუა საყდარსა თჳსსა ძე თჳსი დიმიტრი . . . და დაადგა თაჳსა შვენიერსა გვირგვინი ქუათაგან პატიოსანთა . . . შეარტყა წელთა ძღერთა მახვილი რაბამ სვიანად ჴმარებული და შემოსა პორფირი მკლავთა

<sup>2</sup> მათიანე ქართლისაჲ. გამოსცა მ. ლორთქიფანიძემ. ქართლის ცხოვრება, თბ. 2008, გვ. 287.

<sup>3</sup> იქვე, გვ. 269.

<sup>4</sup> ჯ. სამუშია. ბაგრატ III, თბ. 2012, გვ. 46.

ლომებრთა და ტანახოვანსა და დაულოცა ცხორება წარმართებული და განგრძობა დღეთა ბედნიერებით. თაყვანისცემა მისსა და ყოველთა წარმართთა მონებად მისსა, გამობრწყინებად დღეთა მისთა სიმართლედ და მრავალი მშვიდობაჲ“<sup>5</sup> ამ ყველაფერს ვიზუალურად გამოსახავს და ნათელს ჰფენს მაცხვარიშის მაცხოვრის სახელობის ტაძარში 1140 წელს შესრულებული ფრესკა, რომელზეც გამოსახულია მეფედ კურთხევის სცენა, ეს არის განუმეორებელი ფრესკა, რომლის მგავსი სხვა არ მოიპოვება საქართველოში. მეფე დემეტრე მთელი ტანითაა გამოსახული და მას დიდებულები ხმალს არტყავენ.

რაც შეეხება თამარ მეფის კურთხევას და მეფედ კორონაციას ისტორიკოსი წერს: გიორგი III-მ თამარი „მეფე ყო თანადგომითა ყოველთა: პატრიარქთა და ეპისკოპოზთა, დიდებულთა იმიერთა და ამიერთა, ვაზირთა და სპასალართა და სპასპეტთა, და დაისუა მარჯვენით მისსა მეფე და დედოფალი, შემკული და შემოსილიფერად–ფერადითა ფესვედითა ოქროანითა ბისონითა და გეზითა...და დაადგა გვირგვინი ოქროსა თავსა მისსა, ოქროსა ოფაზისა, აღმკული იაკინთთა, გმირთა და სამარავდოთა მიერ და მდიდარნი ერისანი ლიტანიობდეს წინაშე პირსა მისსა და თვთ მეფემან მაფიცებელმან ერთგულობისა ერთსულობისა მისთვს...და შემგედრებელი ღმრთისა, მაკურთხე ექმნა კურთხევითა აბრამიანითა“.<sup>6</sup> უფრო დანწერილებით თამარის მეორე კურთხევაა აღწერილი, რომელიც ცერემონიის სრულყოფილ სურათს გვიხატავს. გიორგი III-ის გარდაცვალების შემდეგ დიდებულებმა თამარის ხელმეორედ კურთხევა გადაწყვიტეს, რათა თავიანთი ძალაუფლების დემინსტრირება მოეხდინათ. თამარ მეფე დათანხმდა და „აღმყვანელთა საყდართა დასაჯდომთა [მამა]პაპუელთა აღსუეს მზე იგი მზეთა...და მოიღეს გვირგვრგვნი, აღიღეს ჯმა მგალობელთა და ძლევით გვრგვრნოსნობისა და

<sup>5</sup>ცხოვრებაჲ მეფეთ-მეფისა დავითისი. გამოსცა მზ. შანიძემ, თბ. 2008, გვ. 347.

<sup>6</sup> ისტორიანი და აზმანი შარავანდედთანი. გამოსცა გ. კარტოზიამ. ქართლის ცხოვრება. თბ. 2008, გვ. 390–391.

*მძლეოდ–მფლობელობისა მოახსენეს...ამას ესევეთარსა შესხმასა და გალობასა შინა, ვინათგან ლიხთიმერთაგან იყო წესი დადგმად გვრგუნისა თავსა სამეუფოსა, აწუნეს მონაზონი ღირსი და მადლშემოსილი, მთავარეპიზკოპოზი ქუთათელი ანტონი საღირისძე მიღებად გვრგუნისა. და [სრულ ყუეს რა კურთხევაჲ, დალოცეს] კვირიკესძე კახაბერი, ერისთავი რაჭისა და თაკუერისა, და სრულყუეს მოჭელეთა სუიანთა და დიდებულთა ვარდანისძეთა, საღირასძეთა და ამანელისძეთა მოღებად და დადებად ჯრმლისა. ამას შინა ჰკრეს სპერჯურთა, ბუკთა, ქოსთა და წინწილთა, და იყო ზარი და ზეიმი ქალაქსა შინა, სიხარული და შუება და...თაყუანი სდალოცეს და აღიდეს სპათა შვიდთავე სამეფოსათა“.<sup>7</sup>*

ზემოთ მოტანილი აღწერილობებიდან ჩანს, რომ მეფის კურთხევა იწყებოდა უფლისწულის „ტახტზე“ ან „საყდარზე“ აყვანით. შემოჰქონდათ სამეფო გვირგვინი და იწყებოდა მეფის კურთხევა და ცხება. აღსანიშნავია ის ფაქტიც, რომ შუა საუკუნეებში უფლისწულს განსაკუთრებულად ზრდიდნენ. ის უნდა ყოფილიყო განათლებულიც და ფიზიკურად ძლიერი, ქვეყნის მთავარსარდალს როგორც შეეფერებოდა. ხშირი იყო თანამოსაყდრედ დასმა და გარკვეული გამოცდილების დაგროვება თუ გადაცემა მომავალი მეფისთვის. განვაგრძოთ ჩვენთვის მნიშვნელოვანი ცერემონიის ფრაგმენტების აღდგენა. კურთხევის ცერემონიას მოჰყვებოდა ცხება. ცხება იმდენად მნიშვნელოვანი იყო რომ მეფეს „ცხებული“ ეწოდებოდა. თამარ მეფის ისტორიკოსი აღნიშნავს, რომ მეფის კურთხევის თანახმად მეფის თავზე გვირგვინის დამდგმელი ლიხთიმერელი მღვდელმთავარი უნდა ყოფილიყო. ეს კი მიგვანიშნებს იმაზე, რომ მეფის კურთხევის „განგება“ იმ დროს უნდა ყოფილიყო შედგენილი, როდესაც საქართველოს მეფეები მხოლოდ დასავლეთ საქართველოს მეფეებად იწოდებოდნენ. შესაძლოა გამოვთქვათ ვარაუდი, რომ თუ ერთიანი საქართველოს მეფე ბაგრატ III ქუთაისში აკურთხეს მეფედ, თავისთავად ცერემონიაში მონაწილე

<sup>7</sup> ისტორიანი და აზმანი შარავანდედთანი. გამოსცა გ. კარტოზიამ, გვ. 399–401.

პირები, საეროც და სასულიეროც დასავლეთ საქართველოში მცხოვრებნი უნდა ყოფილიყვნენ. ამის შემდეგ კი დიდი ხნის მანძილზე შენარჩუნდა ეს ტრადიცია. XIII საუკუნის ძეგლში კი უკვე შეცვლილია მდგომარეობა. ამის შესახებ დანვრილებით ქვემოთ ვისაუბრებთ. საეკლესიო „კურთხევა“ და „ცხება“ კი მთავრდებოდა მას შემდეგ, რაც ქუთათელი მიტროპოლიტი მეფეს თავზე გვირგვინს დაადგამდა.

საეკლესიო ცერემონიის დასრულების შემდეგ იწყებოდა საერო ცერემონია, კერძოდ მეფესთან მიჰქონდათ სამეფო ნიშნები. ერთ-ერთი მნიშვნელოვანი ამ ნიშნებს შორის იყო „მახვილი“ – „ჯრმალი“, რომელიც სახელმწიფო მთავარსარდლის სიმბოლო იყო. მახვილის „შერთყმა წელთა“ მიღებული წესი ყოფილა. ამას ამტკიცებს დავით აღმაშენებლის მოქმედებაც, როდესაც თავის შვილს „სვიანად ხმარებული“ მახვილი წელზე შემოართყა. თამარ მეფის კურთხევის დროს კი „ჯრმალის მოღება და დადება“ იხსენიება, შემორტმა სიტყვა მემატთანეს არ უწერია, სავარაუდოდ ქალი მონარქისთვის მახვილის შემორტყმა უხერხულობას გამოიწვევდა. თამარის მეფედ კურთხევის დროს ჯერ კიდევ მთავარ როლს დასავლეთ საქართველოს დიდებულები ასრულებდნენ. ხმლის გადაცემა რაჭისა და თაკვერის ერისთავებს განუხორციელებიათ, საღირასძეთავან– ანტონი ქუთათელი მთავარეპისკოპოსი იყო. დიდებული აზნაურების ცერემონიაში ამ სახით მონაწილეობის მიღება მიაშნებს იმას, რომ ეს აზნაურები თავიანთ უფლებებს უთმობდნენ მეფეს. ამით კიდევ ერთხელ უსვავდნენ ხაზს თავიანთ უფლებრივ მდგომარეობას.

„წესი და განგებაჲ მეფეთა კურთხევისა[დ]“ არის ერთ-ერთი მნიშვნელოვანი ძეგლი, რომელიც მოგვითხრობს სრულყოფილად მეფედ კურთხევის ცერემონიის შესახებ. თავდაპირველად ამ საკითხით დაინტერესდა თ. ჟორდანიას და თავისი „ქრონიკების“ პირველ წიგნში დაუთმო ადგილი. შედარებით ვრცლად აღნიშნული საკითხი განხილული აქვს კორნელი კეკელიძეს თავის გამოკვლევაში «Литугические памятники в отечественных книгохранилищах».

1913 წელს ს. კაკაბაძემ მეფედ კურთხევის ცერემონიის ტექსტი ქარაგმიანად და იმავე შეცდომებით გამოსცა, როგორც თვით ხელნაწერშია შემონახული, შემდეგი სათაურით: „მეფის კურთხევის წესი, XIII საუკუნის დასაწყისს შედგენილი“. ტექსტი გამოცემულია წ.კ.ს. წიგნსაცავის №352 ხელნაწერის მიხედვით.<sup>8</sup> ს. კაკაბაძე ამტკიცებს, რომ მეფის კურთხევის წესი XIII საუკუნეზე ადრე არ უნდა იყოს შედგენილი. თავისი მოსაზრების დასაბუთებლად ასახელებს რამდენიმე ფაქტს: ტექსტში იხსენიება აფხაზეთის კათალიკოსი, ეს კი დაარსდა XIII საუკუნის დასაწყისში. ასევე გამოთქვამს მოსაზრებას, რომ მეფეთ კურთხევის წესი თამარის მეფობის მეორე ნახევარში შეიძლება იყოს შედგენილი ან ლაშა–გიორგის დროსო. მეფედ კურთხევის მეორე რედაქციის შედგენის თარიღად კი 1270 წელს ასახელებს და დემეტრე თავდადებულს უკავშირებს. სამწუხაროდ, რა ფაქტებს ეყრდნობა ამ მოსაზრების დასამტკიცებლად მოტანილი არ აქვს.<sup>9</sup>

ნ. ბერძენიშვილი არ იზიარებს ს. კაკაბაძის მოსაზრებას, რომლის მიხედვითაც მეფედ კურთხევის წესი გიორგი ლაშას მეფობის დროს იყოს შედგენილი, რადგან მსახურთუხუცესი ამ ძეგლში ვაზირთა შორის იხსენიება, მისი ვაზირის უფლებებით აღჭურვა კი რუსუდანის მეფობის დროს მოხდა. დანამდვილებით იმის თქმა შეგვიძლია, რომ მეფედ კურთხევის წესი XIII საუკუნის II ნახევარს ეკუთვნის. ზუსტად ვინ და რომელ წელს ჩაწერა ვერ დავადგენთ, რადგან შესაბამისი ფაქტები არ გავვაჩნია.

მეფის კურთხევის სრული აღწერილობის მიხედვით შეგვიძლია ვიმსჯელოთ და წარმოვიდგინოთ ის ცერემონია, რომელსაც ატარებდნენ შუა საუკუნეების საქართველოში. განვიხილოთ ისტორიული წყარო „წესი და განგება მეფედ კურთხევისა“, რომელიც გამოქვეყნებულია „ქართული სამართლის ძეგლები“-ის

<sup>8</sup> ივ. ჯავახიშვილი. თხზულებანი თორმეტ ტომად. ტ. VI. თბ. 1982, გვ. 75.

<sup>9</sup> ივ. ჯავახიშვილი. თხზულებები თორმეტ ტომად, ტ. VI, გვ.76.

მეორე ტომში.<sup>10</sup>

როგორც უკვე აღვნიშნეთ, მეფედ კურთხევის ცერემონიაში მონაწილეობას იღებდნენ როგორც სასულიერო, ისე საერო პირები. მეფედ კურთხევისთვის მზადება რამდენიმე დღით ადრე იწყებოდა. ცერემონია, ფაქტობრივად, წინა დღის საღამო უამს იწყებოდა. კათალიკოზი შეარჩევდა ერთ მთავარეპისკოპოსს, რომელიც მღვდელ-ღიაკვნებთან ერთად კელეპტრებით ხელში და გალობით სასახლეში უნდა მისულიყო და სამეფო ნიშნები წამოეღო. სამეფო ნიშნებს შეადგენდნენ: გვირგვინი, სკიპტრა, პორფირი და ბისონი, რომლებიც ფეშხუმზე უნდა დაედოთ, შეებურათ და იმ ეკლესიაში მიეტანათ, სადაც მეფედ კურთხევის წესი უნდა შეესრულებინათ.

სამეფო ნიშნები საკურთხეველში, ტრაპეზზე ინახებოდა და შემდეგ იწყებოდა მწუხრის ლოცვა ღამისთევით. *„ღამე იგი უძილოდ განათიონ ლოცვითა და ვედრებითა ღმრთისა მიმართ, თვთ მეფედ განმზადებულმან და ყოველთა პალატათა შინა და სავსებამან ეკლესიის ამან“*. ღამისთევის დასრულების შემდეგ მლოცველები შინ ბრუნდებოდნენ. წირვის უამის მოსვლის დროს სამჯერ ჰკრავდნენ ძელს და ეკლესიაში იკრიბებოდნენ. ძელზე კვრა მიგვანიშნებს იმაზე, რომ აღნიშნული წესი XII-XIII საუკუნეებამდე უნდა ყოფილიყო, რადგან შემდეგ უკვე ბარების რეკვით იხმოდნენ მრევლს წირვაზე დასასწრებად.

შემდეგ ვკითხულობთ, კათალიკოზის, ეპისკოპოსების, მღვდლებისა და ღიაკვნების შემოსვის შემდეგ *„ჯუარის მტვრთველი“* „ძელი ცხოვრებით“ ხელში მთავარღიაკონის წინხლებით სასახლეში უნდა წასულიყო. სამეფო პალატაში შესულ ჯვრისმტვირთველს უნდა ეთქვა მეფისთვის: *„გუაკურთხენ, წმიდაო და თვითმპყრობელო მეფეო, მრავალმცა არიან წელნი მეფობისა თქვენისანი“*, ამასვე იმეორებენ სრულიად ლაშქარნი. შემდეგ ამისა ჯვრისმტვირთველი მიმართავს ლაშქარს: *„და თქვენცა გიხაროდენ ძალნო უძლეველნო და დამამჯობელნო მტერთა*

---

<sup>10</sup> ქართული სამართლის ძეგლები. ტ. II. ტექსტები გამოსცა, შენიშვნები და საძიებლები დაურთო პროფ. ი. დოლიძემ. თბ. 1965, გვ. 50-54.

სამეფოთაჲთ, უამი არს წინამდებარისა საქმისა აღსრულებად“.

ამის შემდეგ ყველა ერთად მიდიოდნენ შემდეგი თანმიმდევრობით: „წინათ ბარი მეფეთა და შემდგომად დროშა და შუბი, შემდგომად მთავრდიაკონი და ჯუარის-მტვრთველი, მეფე და ლაშქარნი“. მეფე დიდებულების გარემოცვაში იყო. მარჯვნივ სამხედრო უწყების წარმომადგენლები იდგნენ, მარცხნივ სამოქალაქო უწყებისა და საქვეყნოდ გამრიგე მოხელეები. „ამირსპასალარი, ჯრმალ-შემორტყმული, მარჯუენით კერძო ჰყვებოდეს და საეფო ჯრმალი ორთავე ჯელთა ზედა ეტვირთოს“. ასევე ამირსპასალართან ერთად ამილახორი და მებაჭრეთ-უხუცესი ჯრმალ შემორტყმულები მიდიოდნენ. ხოლო მარცენა მხარეს ჯყონდიდელი, ათაბაგი და სხვა მთავრები მიდიოდნენ. რაც შეეხება მანდატურთუხუცესსა და ჯუარის-მტვირთველს, ისინი მეფეს წინ მიუძღოდნენ. ბოლოს მეფის უკან მიდიოდნენ ეზოსუხუცესი, ჩუხჩარები, მებაჭრეთუხუცესი სამეფო ლახტითა და ქარქაშით. ამ წესით უნდა წასულიყვნენ ეკლესიაში, სადაც მეფედ კურთხვის ცერემონია ჩატარდებოდა.

ეკლესიის კარებთან მეფეს კათალიკოზი უნდა დახვედროდა „თავმოდრეკილი“ და ხმამაღლა ეთქვა მეფისთვის: „კურთხეულ არს მოსვლა თქვენი და დამტკიცება მეფეთ-მეფედ სამეფოსა ამას თქვენსა ზედა, და განმტკიცნეს ღმერთმან შიშისა და სარწმუნოებისა მისსა ზედა, და დაგმორჩილნეს ყველანი მტერნი და წინააღმდეგომნი სამეფოსა ამის თქვენისანი, ქუეშე ფერჯთა თქვენნთა. და თქვას ყოველმან ერმან: „ამინ“<sup>11</sup>

მეფე „მდაბლად“ თაყვანს სცემდა კათალიკოზს და ეკლესიაში შევიდოდა, მისი მარჯვენა ხელი კათალიკოზს უნდა სჭეროდა, მარცხენა იშხნელს, ან მთავარეპისკოპოსს. ეკლესიაში მეფეს „სამეფოსა ადგილსა“ დააყენებდნენ და „ინყონ აღმოკუთად სეფესა“. წირვის დანწყებამდე ამირსპასალარი „სამეფო ჯრმალს“ ჯვრისმტვირთველს გადასცემდა, რომელიც საკურთხეველში ძელსა ცხორებისაზე

<sup>11</sup> ქართული სამართლის ძეგლები. ტ. II, გვ. 51.

მიყრდნობილი იდო. დროშა და შუბი კი საკურთხევლის კარების წინ ეჭირათ. ამის შემდეგ მთავარეპისკოპოზი საკურთხევლიდან ბისონს აიღებდა, მეფეს თავს დაუხრიდა და ორივე მუხლზე დაკეცილ ბისონს დაუდებდა. მეფე კათალიკოსთან მიჰყავდათ, თავმოდრეკილ მეფეს კათალიკოზისათვის უნდა მიემართა: „*მაკურთხე მეუფეო*“, ამის შემდეგ კი კათალიკოზი მეფეს ჯვარს გადასწერდა და იტყოდა: „*კურთხეულ-არს მეფობაჲ თქუენი დასასრულამდე უამთა და განამტკიცენ სარწმუნობასა მისსა ზედა მიუდრეკლად*“<sup>12</sup> შემდეგ მეფეს ბისონს ჩააცვამდა, ჯვარს გადასწერდა და მეფე თავის ადგილს დაუბრუნდებოდა.

ამის შემდეგ იკითხებოდა სახარება, მეფეს ორივე მხარეს ეპისკოპოზები ედგნენ და მას შემდეგ, რაც მეფე საკურთხევლს სამჯერ ეთაყვანებოდა შიგნით შეჰყავდათ, აქ მეფეს კათალიკოზის წინაშე მუხლი უნდა მოეყარა. მეფეს თავზე ომფორს დაადებდნენ, კათალიკოზი ჯვარს გადასწერდა და იტყოდა: „*საღმრთო მადლი, რომელი ყოვლადვე უძლეურებათა ჩუენთა ჰკურნებს და ნაკლულებასა ჩუენსა აღავსებს და განაჩინებს ღმრთის მოშიშსა სახელით ერსა და სამეფოსა ამას ზედა მეფედ-მეფედ და გარე შეარტყამს საღმრთოსა ძალსა მისსა, ვილოცოთ ყოველთა, რათა დაიმკვდროს მის თანა მადლმან ყოვლად წმიდისა სულისამან*“<sup>13</sup> ეკლესიაში მყოფნი ხმამალლა ამბობდნენ „*კირიელეისონ*“. ამის შემდეგ კათალიკოსი საკურთხევლიდან იღებს გვირგვინს და დაადგამს მეფეს თავზე, თან წარმოთქვავს სავედრებელს: „*დაადგ თავსა მისსა გვრგვინი ქვსა მისგან პატიოსნისა, ცხორება ვთხოვა შენ, და მიეც მას განვრძობა დღეთა უკუნისი უკუნისამდე*“.<sup>14</sup> მეფეს პორფირს ჩააცვამს კათალიკოსი, აიღებს სკიპტრას და მისცემს მარჯვენა ხელში. მეფეს ტრაპეზის მარჯვენა მხარეს ორხოაზე დააყენებდნენ და მგალობლები კი მეფისთვის წარმოთქვავდნენ: „*მრავალუამიერ*

<sup>12</sup> იქვე, გვ. 52.

<sup>13</sup> ქართული სამართლის ისტორია. ტ. II, გვ. 52.

<sup>14</sup> იქვე, გვ. 53.

ჰყვენ, ღმერთო, მეფეთ-მეფე ჩუენი (სახელდებით) მრავალჟამეულ ჰყვენ“<sup>15</sup>

მღვდელმთავართა ზიარების შემდეგ და მღვდლებზე წინ მეფეს აზიარებდნენ. შემდეგ ვკითხულობთ, რომ მეფე საკურთხევის კარიდან ჩამოვიდოდა ამირსპასალარი ხმაღს შეარტყამდა და საეკლესიო კურთხევა მთავრდებოდა. მეფე დიდებულებთან ერთად კვლავ სასახლეში ბრუნდებოდა იმავე წესის მიხედვით როგორც წამოსვლისას, ამ შემთხვევაში განსხვავება იყო ის, რომ სამოფო ნიშნები თვითონ მეფეს ეჭირა და მისი მარჯვენა ხელი კათალიკოსს ეჭირა, მარცხენა ხელი კი ჭყონდიდელს. სამეფო სასახლეში შესვლისას მეფეს კათალიკოზი და ჭყონდიდელი მიაცილებდნენ და დასვავდნენ ტახტზე, მაგრამ მეფის გვედით მხოლოდ ჯვარისმტვირთველი რჩებოდა იქამდე, სანამ „ლაშქართა თაყვანისცემა და ძღუენის შეწირვა“ არ დაიწყებოდა, შემდეგ ისიც ტოვებდა მეფეს. როგორც ჩანს ეს უკვე ნიშნავდა მილოცვას. შემდეგ კი ვკითხულობთ: „პირველად დედოფალმან თაყუაბი-სცეს, მერმე-ღა კათალიკოზმან, ჭყონდიდელმან, ათაბაგმან, მანდატურთ-უხუცესმან, ამირსპასალარმან, მეჭურჭლეუხუცესმან, მსახურთ-უხუცესმან და შემდგომად ჭელოსანთა და უჭელოთა დარბაზისიერთა სრულიადთა“.<sup>16</sup> მილოცვა რომ დამთავრდებოდა იწყებოდა „პურობა“. როგორც ჩანს მეფის კურთხევის დღესასწაული სამი დღის განმავლობაში გრძელდებოდა, რადგან ვკითხულობთ: „ხოლო ყოველთა დღეთა სამ დღემდის მეფე ტახტსა ზედა ჯდეს გვრგვნითა და პორფირითა. ხოლო ესე საცნაურ იყავნ, რომელ თვნიერ კათალიკოზისა არა ვისგან ჯერ-არს კურთხევა“.<sup>17</sup>

მოცემული ძეგლი ერთ-ერთი უნმიშვნელოვანესი წყაროა, რომელიც მეფედ კურთხევის ცერემონიას თითქმის სრულყოფილად გადმოგვცემს, ძეგლის შინაარსში ბევრი საყურადღებო ფაქტია დაცული. ტექსტიდან ვიგებთ, რომ მეფედ კურთხევა ნამდვილად საერო და საეკლესიო წესების გაერთიანებით ხდებოდა. მიუხედავად

<sup>15</sup> ივ. ჯავახიშვილი. თხულებანი თორმეტ ტომად. ტ. VII, თბ. 1984, გვ. 153.

<sup>16</sup> ქართული სამართლის ძეგლები. ტ. II, გვ. 53.

<sup>17</sup> იქვე, გვ. 54.

იმისა, რომ აღნიშნული ძეგლი ძალიან მნიშვნელოვანია მაინც არის რამდენიმე საკითხი რომელზეც აქ პასუხს ვერ ვპოულობთ. პირველი, ეს არის დედოფლის (ან მეფის მეუღლის) და საერთოდ სამეფო ოჯახის ცერემონიაში მოუხსენებლობა. მეფის მეუღლე მხოლოდ მილოცვის დროს ჩანს, დანარჩენ შემთხვევაში კი არსად იხსენიება. მეფის მშობელიც არ იხსენიება ასევე, მამა თუ გარდაიცვალა და შესაბამისად შვილმა დაიკავა ტახტი მაშინ მეფის ბიძა ან მამიდა ან საერთოდაც ვინმე ნათესავი რატომ არ იღებდა მონაწილეობას, ან რატომ არ ჩანდა ცერემონიაში. შეიძლება გამოვთქვათ მოსაზრება, რომ დედოფალი კურთხევას არ ესწრებოდა, მაგრამ, თითქოს, არადამაჯერებელია. იქნებ უბრალოდ გამორჩათ და არ მოიხსენიეს დედოფალი იმ დროს, როდესაც ის ტაძარში იყო და ესწრებოდა მეფედ კურთხევას, ამ ცერემონიას ხომ თითქმის ყველა დიდებული ესწრებოდა. სამწუხაროდ, ამ შემთხვევაში ზუსტად ვერაფერს დავამტკიცებთ. შესაძლოა უბრალოდ დაკარგულია აღნიშნული მონაკვეთი, ან გადაწერის დროს გამორჩათ. მეორე მნიშვნელოვანი ფაქტი კი „ცხების“ და „ცხებულობის“ მოუხსენებლობას ეხება, რომელიც საეკლესიო კურთხევის დროს ეს ერთ–ერთი რგოლი უნდა ყოფილიყო ცერემონიის სრულყოფილად ჩატარებისთვის. როგორც ივ. ჯავახიშვილი აღნიშნავს, მეფეს „ცხებულს“ უწოდებდნენ მისი „ცხებაც“ უნდა მომხდარიყო, რადგან ყველა ნაკურთხი მეფე „ცხებულად“ იწოდებოდა.<sup>18</sup> მაგრამ კურთხევის ამ ცერემონიაში ეს ფაქტი ან გამორჩენილია, ან შესაძლოა გადაწერის დროს იყოს რაიმე უზუსტობა დაშვებული და დაკარგული ეს დეტალი. მაგრამ ფაქტია, რომ ჩვენამდე მოღწეულ ამ ისტორიულ ძეგლში „ცხების“ შესახებ არაფერია ნათქვამი.

რაც შეეხება თამარ მეფის ისტორიკოსთან დაცულ ცნობას, რომელიც თამარის მეფედ კურთხევის შესახებ მოგვითრობს ის განსხვავდება „წესი და კურთხევა მეფედ კურთხევისგან“. როგორც ივ. ჯავახიშვილი აღნიშნავს, აფხაზთა მეფეების დროინდელი წესების კვალი აღარ ჩანს, მეფეს უკვე ქართლის კათალიკოს–პატრიარქი ადგამს

---

<sup>18</sup> ივ. ჯავახიშვილი. თხზულებანი თორმეტ ტომად. ტ. VII, გვ. 154

გვირგვინს და არა ქუთათელი მთავარეპისკოპოსი. ასევე საყურადღებოა, რომ „სამეფო ხრმლის“ წელზე შემორტყმის წესიც შეცვლილია, აქ უკვე ამისპასალარია ის ფიგურა, ვინც მეფეს ხრმალს არტყამს და არა ლიხთიმერეთის აზნაურთა საგვარეულოს წარმომადგენელი.<sup>19</sup> ეს კი მიგვანიშნებს, რომ დასავლეთ საქართველოს დიდებულებმა ეს უფლება დაკარგეს და ერთიანი საქართველოს მეფეს უკვე სრულიად საქართველოს სამხედრო მეთაური, ანუ ამირსპასალარი გადასცემს ხმალს. რაც ასევე ნიშანია მეფის ხელისუფლების გაძლიერების.

ასევე დიდი მნიშვნელობა ენიჭება ლაშქარს, რომელიც მეფის თანასწორ მეორე ძალად არის მოხსენიებული. ჯვარისმტვირთველი თავმოდრეკილი მიმართავს მეფესაც და ლაშქარსაც. ფორმულა „ძლიერი და უძლეველი“, როგორც წესი მეფის კუთვნილება იყო და ხშირად ფიქსირდება ხელნაწერებსა და წარწერებში. როგორც ვხედავთ, ლაშქარი ერთ-ერთი მნიშვნელოვანი რგოლი იყო მეფედ კურთხევის ცერემონიაში. ეს გარემოება გასაკვირი არც არის, რადგან ნებისმიერ მონარქს სჭირდება ძლიერი სამხედრო ძალის მხარდაჭერა.

საინტერესოა კიდევ ერთი საკითხი, არსებობდა თუ არა რაიმე წესი, რომელიც განსაზღვრავდა რომელ ტაძარში უნდა ეკურთხებინათ ეს თუ ის მეფე. ასეთი ინფორმაცია სამწუხაროდ ისტორიულ ძეგლებში შემონახული არ არის. სავარაუდოდ სხვადასხვა ტაძრებში უნდა მომხდარიყო მეფედ კურთხევა, რადგან საუკუნეთა მანძილზე საქართველოში ერთმანეთზე უფრო დიდებული ტაძრები იგებოდა. ამ მოსაზრების გამყარება შეგვიძლია იმ მცირე ინფორმაციით, რაც გვაქვს შემორჩენილი. „ისტორიანი და აზმანი შარავანდედთაში“ ვკითხულობთ, რომ გიორგი II რუისში უკურთხებიათ მეფედ, თამარ მეფე პირველად ნაჭარმაგევს, ხოლო გიორგი III-ის გარდაცვალების შემდეგ თბილისში.<sup>20</sup> სად აკურთხეს დავით აღმაშენებელი ან დემეტრე I ჩვენ ზუსტად არ ვიცით, რადგან წყაროებში არ არის დაფიქსირებული. დავითის

<sup>19</sup> იქვე, გვ. 154–155.

<sup>20</sup> ისტორიანი და აზმანი შარავანდედთანი. გამოსცა გ. კარტოზიამ, გვ. 398–400.

ისტორიკოსთან ვკითხულობთ: „მას უამსა, რომელსა იყო ჰასაკითა ათეჩესმეტის წლის, ამას, მართოდ-შობილსა გიორგისგან, თვთ მამამან დაადგა გვრგვნი მეფობისაჲ“.<sup>21</sup> შემდეგ კი დემეტრე მეფის გამეფებას ასე გადმოგვცემს: „ამანცა თვსითა ჴელითა დასუა საყდარსა თვსსა ძე თვსი დემეტრე, . . . და დაადგა თავსა შუენიერსა გვრგვინი ქვათავან პატიოსანთა, . . . და შეარტყა წელთა ძლიერთა მახვილი, ეჰა რაბამ სვიანად ჴმარებული! და შეჰმოსა პორფირი მკლავთა ლომებრთა და ტანსა ახოვანსა“.<sup>22</sup> როგორც ვხედავთ, დავითის ისტორიკოსი არც მეფედ კურთხევის ადგილს ასახელებს და არც თვითონ ცერემონიაზე ამბობს რაიმეს. არც ლაშა-გიორგის დროინდელი მემატთანე აღნიშნავს სად და როგორ ხდებოდა მეფედ კურთხევა. კერძოდ ვკითხულობთ: „დასუეს მეფედ ძე მისი დავით. იმეთა ექუს თვე და მოკუდა. შემდგომად მისა დაჯდა ძე მისივე გიორგი ქორონიკონსა სამას სამოცდათხუთმეტსა“.<sup>23</sup> გიორგი ლაშას გამეფებას კი ორი სიტყვით გადმოგვცემს: „[იყო] ათორმეტისა წლისა, ოდეს მეფედ დაჯდა, ნერგი კეთილმობარდი და ყუავილი“.<sup>24</sup> რაც შეეხება რუსუდან მეფის კორონაციას, უამთაალმწერალი „ასწლოვან მატთანეში“ საინტერესოდ აღწერს ამ მოვლენას. მასთან ვკითხულობთ: „შეკრბეს წარჩინებულნი მის სამეფოსანი, იმერნი და ამერნი, კათალიკობთა ორთავ წინაშე, ნიკოფსით ვიდრე დარუბანდამდე, ყოველნი მორჩილებასა მათთა ქუეშე მყოფნი, და მეფედ ყვეს რუსუდან, დასუეს საყდართა სამეფოთა და მიულოცეს მეფობა წესისაებრ“.<sup>25</sup> უკანასკნელი სიტყვები გვაფიქრებინებს, რომ „წესისაებრ მილოცვა“, შესაძლოა, სწორედ მეფედ კურთხევის ცერემონიის ნაწილს წარმოადგენდეს, მიუხედავად იმისა, რომ თვითონ ცერემონიის შესახებ უამთაალმწერელი არაფერს წერს, ზოგადად მეფედ კურთხევის ცერემონია მოიცავდა მილოცვას, რომელის შედეგად, რეგლამენტირებული წესის მიხედვით, მეფეს ტახტზე

<sup>21</sup> ცხორებად მეფეთ-მეფისა დავითისი. გამოსცა მზ. შანიძემ, გვ. 307.

<sup>22</sup> იქვე, გვ. 347.

<sup>23</sup> იქვე, გვ. 352.

<sup>24</sup> ლაშა-გიორგის მემატთანე. გამოსცა ც. ქურციკიძემ. ქართლის ცხოვრება. თბ.2008, გვ. 355.

<sup>25</sup> უამთაალმწერელი. ასწლოვანი მატთანე. გამოსცა გ. ალასანიამ. ქართლის ცხოვრება. თბ.2008, გვ. 535.

ასვლას ულოცავდნენ.

მას შემდეგ, რაც ერთიანი საქართველოს ტერიტორია სამეფო–სამთავროებად დაიშალა ქართველი მეფეები თავიანთ სამფლობელოებში ეკურთხებოდნენ მეფეებად. XVI-XVIII საუკუნეების მეფედ კურთხევის შესახებ ბევრი არაფერი ვიცით, ცერემონიის დეტალები ჩვენთვის უცნობია, მაგრამ სავარაუდოდ, XIII საუკუნეში მიღებული „წესი და განგების“ მსგავსად უნდა მომხდარიყო.

კახეთი და ქართლი ურჯულო მტრების შემოსევებს საუკუნეების მანძილზე უმკლავდებოდა, მაგრამ ოსმალთა და ირანელთა ბატონობის დროს ქართლსა და კახეთში ქრისტიანული წესით მეფეები ვეღარ ეკურთხებოდნენ. დიდი ხნის შემდეგ, როდესაც შაჰმა ნება დართო მეფედ კვლავ ქრისტიანული წესით ეკურთხებინათ, ძველი წესის გახსენება დასჭირდათ, რადგან უკვე დაფიქსურებული ჰქონდათ.

რაც შეეხება თვითონ მეფედ კურთხევის ცერემონიას, რომელიც XVIII საუკუნის მეფედ კურთხევას აღწერს დაცული არის პაპუნა ორბელიანის „ამბავნი ქართლისანიში“. კერძოდ, 1745 წლის პირველ ოქტომბერს ქართლის მეფე თეიმურაზ II მეფედ უნდა ეკურთხებინათ ქრისტიანული წესით, კურთხევის ცერემონია სვეტიცხოველში უნდა ჩატარებულიყო. ავტორი დაწვრილებით აღწერს როგორ აკურთხეს მეფე. პაპუნა ორბელიანი წერს: *„იწყო მზადება მეფემ კურთხევისა და მოიწვივნა ყოველგნით დასნი სამღვდელთნი ... გაგზავნა კაცი ბატონმა კახეთს და მოიწვივნა ძე თვისი, მეფე კახეთისა ერეკლე და დედოფალი ანა კახეთის დარბაისლით კურთხევისათვის ... ბრძანა მეფემ დროშათა გაკეთება, გააკეთეს ვითაც ძველად რიგი ყოფილიყო, დროშა ოთხი ჯვრითა მოცული... გაემართნენ მცხეთას მეფენი ორნი და დედოფალნი, ერნი და დარბაისელნი ქართლისა და კახეთისანი სახლეულითურთ, ავრეთვე დასნი სამღვდელთნი სრულიად... ანტონი კათალიკოზი, კეთილ–სათნოებითა აღჭურვილი, ტრფიალებითა სახენაოთა მდმინვენითა აღზენებული და ყოვლად სარწმუნოებითა მტკიცედ დამტკიცებული, მაღლითა მიერ გაბრწყინებული, არ*

დააცადებდა უამითი უამად სიბრძნე მრავლობით წესითა და მართლად გამოიკვლევდა წერილთაგან კურთხევასა მეფისასა ... ორი დღე დაიყოვნა და განანესნა ყოველნი სამღვდელთანი ანუ საერონი და წესნი დღისა მისისანი მზა ჰყვნა ყოველნი. დღესა მესამესა გამობრძანდა ბატონი გარეთ საყდარს წინ, ანტიოქიასა, ზემორე სეფე იღვეს დიდი და სეფესა გვერდით სევანი დაედგნეს, დაბძანდა სევანსა შინა და ეგრეთ იახლნეს დარბაისელნი, ვინა ჯდა, მისა ღირსი იყვნეს, ვინა დგომისა, ეგრევ ყოველნი განანესნეს. მოიტანეს სამეფო შესამოსელი, პორფირი, ბისონი და დიადემა ბოხჩებით, აგრეთვე გვირგვინი, ჯმალი, სკიპტრა და ქვეყანისა სფეროი. ესე ყოველი ამიერ და იმიერ მოუწყვეს. ამის შემდგომად მოვიდა მთავარეპისკოპოსი არსენ შემოსილი, მთავარ დიაკონნი წინა უვილოდეს კმევითა საკმეველისათა, აგრეთვე ჯვარისა მტვირთველსა ჯვარი პატიოსანი აღმართნეს და მგალობელთა დასნი მოუზლოდეს და გალობდენ გალობასა ჯვარისასა. მოვიდნენ წინაშე მეფისა და თაყვანისცეს და ეანბორნეს მეფეს. ხოლო აღიღეს ერთი ეს სამეფო შესამოსელი და იარალი, მოსცეს მთავარ-ეპისკოპოსს, იტვირთა ორთა მკლავთა და წამოვიდნენ ეგრეთ გალობითა, შეიტანეს ეკლესიასა შინა, დარეკეს მწუხარისა, წამობრძანდა მეფე ეკლესიასა, ჰკრეს ქოსთა და სპილენძ-ჭურთა, მოეგებნენ ეპისკოპოსნი ყოველნი მდინარით მოსილნი ბატონს წინ და თაყვანისცეს და იწყეს ლოცვა მწუხარისა, განსრულდა ლოცვა მცირელი. დაიყოვნეს და შევიდნენ ეკლესიასა. იყო ღამის თევით გარდაჯდა, იყო დღესასწაული სვეტიცხოვლისა დღე, იყო ის დღე და მეფის კურთხევის რივიც შესძინეს. ყოვლად ნეტარმა ანტონი პატრიარქმა არად კლებულ ქმნა მრჩობლ დღესასწაული, ყოველივე სრულიად გარდაიხადა პურის კურთხევით, სანთლის გაყოფით, ზეთის ცხებით და ყოვლისა წესითა განაბრწყინვა ეკლესია. გათენდა დილა, მოფარდაგნეს სეფე და მოიტანეს დროშანი ოთხნივე და აღმართნეს სეფესა წინა და თვის თვისი ჯარი გარსშემოეხვივნენ. მობძანდა ბატონი და დაბძანდა სეფესა შინა. ამისა შემდგომად მოვიდნენ დასნი სამღვდელთანი შემოსილნი, კარისა დეკანოზსა ხატი

პატიოსანი თავსა ედგა, ჯვარისმტვირთველსა ჯვარი ეპყრა, მთავარდიაკონნი აკმევდეს საკმეველთა, მღვდელნი უკანა უვიდოდეს. ყოველთა დიდრონი ლამპარნი ეტვირთვნის და მგალობელნი გალობდენ. მოვიდნენ ეგრე და ბატონს თაყვანი სცეს. რაც ყიზილბაშნი ქალაქს იყვნეს, ყოველნივე ნახვად მოსულიყვნეს და იქ ისხდნეს. დგა პატრიარქის არქიდიაკონი და ბატონს დიპტვილა მოახსენა და ქება შეასხა. გამობრუნდა და ბატონს მეფობით ნუგეშისცა და მიიწვივეს ბატონი ეკლესიად. წარუძღვნენ ეგრევე დასნი სამღვდელთონი, ჰკრეს ქოსთა და სპილენძ-ჭურთა, უწინარეს ყოველთა მორთულთა აქლემთა კიდებულ ნიქოს-ნალარანი და სპილენძ-ჭურნი მიუძღოდეს და ამას დროშა სარდლისა მისდევდეს. მარქაფანიშე კაზმულნი ამას შეუდგნეს, გამგენი კარისანი, მახლობელ წინაუძღოდა სიძე თვისი დიმიტრი ორბელიანი, რომელი იყო მანდატურთუხუცესი და განმგე დიდებულისა კარისა. აგრევე წინა უძღოდა ზაალ ორბელიანი, რომელსა ებარნეს წინამძღოლნი, მეთოფენი მეფისანი, მობძანდებოდა ბატონი, მარჯვნივ მკლავი სარდალს ქაიხოსრო ორბელიანს ეპყრა და მარცხნივ მკლავი მუხრანის ბატონს კოსტანტინეს. უკანა მახლობელ მოსდევდეს დიდებულთა კაცთა შვილნი, ტვირთულნი სააბჯროთა იარაღითა, ყოველივე იარაღნი მეფისანი თითო თითოსა შეიპყრნეს და ეგრე მოსდევდეს. აგრევე სამივე დროშა ნითვისის ჯარებით ამიერ და იმიერ მოსდევდეს. რა მიეახლნეს ეკლესიასა, სამი დროშა მარტივად კარზე დააყენეს და ჯარი იარაღით ეკლესიასა შევიდნენ. ბატონის დროშა მორდალს დავითს ეჭირა. შეიტანეს საყდარსა და აღსავლის კარზე დააყენეს. კარის ბჭეში მოეგებნეს ბატონს პატრიარქი შემოსილი და ეპისკოპოსნი ანუ სამღვდელთონი, ყოველნი, თაყვანისცეს, ცალკერძ პატრიარქი მოუდგა, ცალკერძ მთავარეპისკოპოსი. სამღვდელთა დასნი წინ შეუძღვნეს ხატითა. ჯვარის წინაძღოლითა და ლამპრები თამთებართა და ეგრე გალობით შეიყვანეს ეკლესიასა შინა. თიანდაში ეშალა კარით განსაყდრისა შუაგულობამდის. პირველად მოიყვანეს, აღსავლის კარის ქვემორე დააყენეს, ეპისკოპოსნი ყოველნი ამიერ და

იმეორ მოუდგნეს, აგრევე სომეხთა დასნი და ფრანგნი ყოველნი იდგნენ შემოსილნი და ვაკრძალულ ისმენდეს. პატრიარქმან ჰკითხა მეფეს სარწმუნოება და მერე აღთქმისა ეპისტოლე წაუკითხა. მერე წამოუძღვანეს წინ და საყდრისა შუაგულობას ტახტი იდგა დიდი. ოთხი ხარისხი შეივლიდა, აიყვანეს, ორი სელი იდგა, ერთზე მეფე დაბძანდა და მეორეზე პატრიარქი, ცალკერძ მთავარეპისკოპოსი და ცალკერძ ალავერდელი, სხვანი ეპისკოპოსნი ექვსი ამიერ და ექვსი იმიერ განენყვნეს. ამისა შემდგომად მოითანეს მარტივი ბისონი და ჩააცვეს, დაინყეს წირვა. ოდეს მოვიდა უამი, წაბრძანდა პატრიარქი, შებრძანდა წმიდა წმიდათასა, ამისა შემდგომად მიიწვივეს მეფე საკურთხეველად, ცალი მკლავი სარდალს ქაიხოსროს ეპყრა და მეორე მკლავი - მუხრან ბატონს, აღსავლის კარზე მთავარ-ეპისკოპოსი და ალავერდელი მოეგებნეს და შემოყვანეს საკურთხეველად, სცხეს საცხებელი შუბლთა, ბეჭთა და გულთა ჯვარის სახედ. თქვა პატრიარქმა სამღთო მადლი და შემდგომი ამისა, ბისონსა ზედა ჩააცვეს დიადიმა, წამოასხეს პორფირი, დაადგეს გვირგვინი სამეფო, მისცეს მარჯვენასა ჯელსა სკიპტრა და მარცხენასა ჯელსა -- ქვეყნისა სფერო, ხოლო მოვიდა უამი წმიდისა ზიარებისა. პირველად სამღვდელო დასნი ეზიარნეს და მერე გარდმოასვენეს წმინდა ბარძიმი და მიიღო მეფემ წმინდა ზიარება პატრიარქისა ჯელითა ... განსრულდა უამის წირვა, გამობძანდა მეფე ცხებული საკურთხეველით, ცალკერძ პატრიარქს ეპყრა მკლავი, ცალკერძ მთავარ-ეპისკოპოსს. მოიყვანეს, მარჯვნით კერძო სამეფო ტახტი იყო, იქ დაბძანდა. მიიტანა სარდალმა ქაიხოსრო ორბელიანმა, რომელი იყო ამირსპასალარი, ჯმალი მეფისა, დაულოცეს და შემოარტყეს. პირველად მივიდნენ დასნი სამღვდელონი და ჯელთა ეანბორნეს, მერე მივიდნენ დარბაისელები, გუნდნი ერთანი და ჯელთა და კვარცხლბეკთა ეანბორნეს“<sup>26</sup>

როგორც ვხედავთ, ანტონ კათალიკოსს წინასწარ შეუსწავლია მეფეთა კურთხევის ძველი წესი და მის მსგავსად ჩაუტარებია საეკლესიო ცერემონიალი. ფაქტობრივად,

<sup>26</sup> პაპუნა ორბელიანი. ამბავნი ქართლისანი. თბ. 1981, გვ. 102-106.

XVIII საუკუნეში ქართლსა და კახეთში მეფედ კურთხევის „ახალი წესი“ შემუშავებულა, რომელიც ლიტურგიული თვალსაზრისით ძველს ჰგავდა, თუმცა კურთხევისას მეფის ირგვლივ მყოფი მოხელეების განლაგებისა და მათი ფუნქციის თვალსაზრისით, ახალ დეტალებს შეიცავდა. მაგრამ ის ძირითადი ბაზისი, რაც XIII საუკუნეში იყო კვლავ შემორჩენილია. ასევე უნდა ღინიშნოს ის დეტალი, რომ ამ შემთხვევაში წყაროში მეფე „ცხებულადაა“ მოხსენიებული, როგორც ჩანს ძველი წესის შესრულება არ დაეინყებიათ, ეს კი ადასტურებს, რომ „წესი დანგებაში“ გამორჩენილი უნდა იყოს ეს დეტალი. ასევე შევვხვით სამეფო ოჯახის როლს ამ ცერემონიაშიც. წყაროში ვკითხულობთ: „*შებრძანდა საყდარსა, გარემოს სევანი იღვნეს ოქსინოთა მოფარდულნი, დაბძანდა მას შინა და დიდებულნი თავშიშველნი თავს იღვნეს და მიბრძანდა დედოფალი და მიულოცა და გარააყარ გუარი. მერე მიბრძანდნენ უფლისწულნი, მიულოცეს, აგრეთვე ჯალაბნი დარბაისელნი მივიდნეს და მიულოცეს. გათავდა რიგი მილოცვისა.*“<sup>27</sup> როგორც ვხედავთ ამ შემთხვევაშიც დედოფალი პირველი ულოცავს და უფლისწულებიც მილოცვის დროს არიან პირველად მოხსენიებულნი. შესაძლოა ვიფიქროთ, რომ სწორედ ასეთი იყო ტრადიცია და წესი, რომელიც დედოფალს უნდა შეესრულებინა მეფედ კურთხევის ცერემონიაში. რა თქმა უნდა, დიდი პატივი იყო პირველს მიელოცა თანამეცხედრისთვის.

დასკვნის სახით შეგვიძლია ვთქვათ, რომ მეფედ კურთხევის ცერემონია იყო საერო და სასულიერო რიტუალების ერთობლიობა, რომელიც ტრადიციულად საზეიმოდ ტარდებოდა. ამ ცერემონიაში მონაწილეობას იღებდნენ სამეფო კარზე მყოფი დიდებულები, მათი მონაწილეობა ერთი მხრივ აღნიშნავდა იმას, რომ მეფეს პატივს სცემდნენ და აღიარებდნენ მის უფლებებს, მეორე მხრივ, კი ასევე მეფისთვისაც მნიშვნელოვანი იყო დიდებულების მონაწილეობა, რადგან ნებისმიერ მეფეს სჭირდებოდა აღიარება და თანადგომა. სხვადასხვა დროს სამეფო კარზე უმაღლესი

---

<sup>27</sup> იქვე, გვ. 106.

ხელისუფლების განმახორციელებელი სახელო ემატებოდა, ეს დაკავშირებული იყო ბიუროკრატიული აპარატის დახვეწასთან. რაც ყველაზე მნიშვნელოვანია ყველა მოხელეს ჰქონდა მკაცრად რეგლამენტირებული მოქმედების უფლება–მოვალეობები.

ასევე დიდი მნიშვნელობა ჰქონდა თვითოეულ სამეფო ხელისუფლების ნიშანს, რომლითაც ხდებოდა მეფის კურთხევა. ზემოთ მოტანილი ცნობებიდან შეგვიძლია დავასახელოთ ის ძირითადი ნიშნები, რომლებიც აუცილებელი იყო მეფედ კურთხევის ცერემონიის დროს.

პირველი და ყველაზე უფრო მნიშვნელოვანი სამეფო გვირგვინია, ის უნდა ყოფილიყო ძვირფასი ქვებით შემკული. სავარაუდოდ, გვირგვინის ფორმა და შემკულობა დროთა განმავლობაში შეიცვლებოდა, მაგრამ ფუნქცია და მნიშვნელობა ყოველთვის იგივე ჰქონდა. მეფე ხშირად „გვირგვინოსნად“ იწოდებოდა, შესაბამისად, აქედანაც ჩანს რა დიდი მნიშვნელობა ჰქონდა ამ რეგალიას.

მეორე ნიშნად შეგვიძლია დავასახელოთ ჯრმალი ანუ მახვილი. ეს ნიშანი ერთგვარად მიგვანიშნებდა, რომ მეფე ქვეყნის მთავარსარდალიც იყო დიდ მნიშვნელობა ჰქონდა ამ სამეფო ნიშანს.

მეფის სამოსი გასხვავებული უნდა ყოფილიყო, მის ზედა სამოსელს პორთიერი ეწოდებოდა, ის ბისონის ზემოდან ეცვათ მეფეებს და ძვირფასად გაფორმებული უნდა ყოფილიყო.

რაც შეეხება მეფობის ძველ და მთავარ ნიშანს „სკიპტრა“ წარმოადგენდა. მეფეს „სკიპტრისმყრობელი“ ეწოდებოდა.

სამეფო ტახტი ასევე ერთ-ერთი მნიშვნელოვანი ნიშანი ყოფილა, ის იყო მეფის დასაბრძანებელი, სადაც სხვას არავის ჰქონდა უფლება დაბრძანებულიყო. თვითონ სიტყვა „ტახტი“ სპარსულიდან შემოვიდა, მისი ქართული შესატყვისი კი „საყდარი“ და „საჯდომი“ ყოფილა. სამეფო საყდარსაც და საჯდომსაც სხვადასხვა სახეობისა და მოყვანილობისას ხმარობდნენ. რასაკვირველია მეფე ძვირფასად გაფორმებულ

ტახტზე უნდა დაბრძანებულიყო.

„ძელი ცხოვრებისაჲ“ იყო ერთ-ერთი მნიშვნელოვანი სამეფო ნიშანი. ეს იყო უპირველესად იმის ნიშანი, რომ მეფე ქრისტიანი იყო და ცერემონიასაც ქრისტიანები ატარებდნენ ქრისტეს ჯვრის ძალითა და მადლით. ითვლებოდა, რომ ქრისტეს ჯვარი იცავდა მეფეს, ისევე როგორც მის მხლებლებს და სრულიად მართლმადიდებელ სამეფოს. ცერემონიის ეს დეტალი ისეთი მნიშვნელოვანი ყოფილა, რომ განსაკუთრებული მოხელე „ჯუარისმტვირთველი“ არსებობდა.

სამეფო დროშა ისტორიულ წყაროებში ხშირად გვხვდება. ის სხვადასხვა დროს იცვლებოდა. ვიცით, რომ მეფე ვახტანგ გორგასლის დროშას „გორგასლიანი“ ეწოდებოდა. დავით აღმაშენებლის დროშას „დავითიანი“. ასევე თავიანთი დროშები ჰქონიათ ამირსპასალარებსაც და ერისთავებსაც. უამთააღმწერელი სახელმწიფო დროშას „დროშა სამეფოდ“ და „დროშა სეფედ“ მოიხსენიებს. ეს იყო საქართველოს უზენაესი სახელმწიფოებრივი ხელისუფლების სიმბოლო, რომელიც მემკვიდრეობით გადადიოდა კანონის მიხედვით სახელმწიფო ტახტის მემკვიდრეზე.<sup>28</sup> დროშის ტარს „ბუნი“ ერქვა, ან „ბუნი დროშისა“,<sup>29</sup> ხოლო თვით ტილოს – „ალამი“. დროშას ასევე ჰქონია თავი და თავისი ბუდე. რა ფერის იყო ქართული დროშა ქართულ წერილობით წყაროებში არაფერია ნათქვამი. უცხოელ ისტორიკოსებთან და მოგზაურებთან კი ვხვდებით ჩვენთვის მნიშვნელოვან ინფორმაციას. XIII საუკუნის საქართველოს სახელმწიფო დროშა თეთრ და წითელ ფერში ყოფილა, ბუნი თეთრი და ალამი მუქი შინდისფერი.<sup>30</sup> სახელმწიფო დროშა დღესდღეობითაც ინარჩუნებს თავის ფუნქციას და წარმოადგენს ქვეყნის ერთიანობის და ეროვნულობის სიმბოლოს. კიდევ ერთი სიმბოლო იყო სახელმწიფო ბეჭედი, რომელსაც მეფე ფლობდა.

როგორც ვხედავთ, ყველა ნივთს თავისი დანიშნულება ჰქონდა და მეფედ

<sup>28</sup> ივ. ჯავახიშვილი. თხზულებანი თორმეტ ტომად. ტ. VII, გვ.158.

<sup>29</sup> უამთააღმწერელი. ასწლოვანი მათიანე. გამოსცა გ. ალასანიამ, გვ. 571.

<sup>30</sup> ივ. ჯავახიშვილი. თხზულებანი თორმეტ ტომად. ტ. VII, გვ. 160.

კურთხევის ცერემონიაში დიდ როლს ასრულებდა. სამეფო ნიშნები, დიდებულები და სასულერო პირები, ყველა ერთად განუყოფელი ნაწილი იყო ცერემონიის. მიუხედავად სხვადასხვა ცვლილებებისა, რომელსაც პოლიტიკური ცხორება განაპირობებდა, გარკვეული სახის ცერემონია ყოველთვის არსებობდა და მეფედ კურთხევა დიდი დღესასწაული იყო ქართველებისთვის, ხოლო მასში მონაწილეობის მიღება კი დიდი პატივი.

## II თავი

### სამეფო დარბაზობა

სამეფო დარბაზობა წარმოადგენდა ერთგვარ ცერემონიას, რომელიც იმართებოდა სამეფო კარზე. რას ეწოდებოდა დარბაზობა და ვინ მონაწილეობდნენ მასში ცნობები შემონახულია ქართულ ისტორიულ წერილობით წყაროებში, რომლებსაც ქვემოთ განვიხილავთ. რაც შეეხება თვითონ სიტყვა დარბაზს, ის არ არის ძველი ქართული სიტყვა და შემოსულია სპარსულიდან, „დარვაზჰჰ“ ნიშნავს სახლის კარს ან ალაყაფის კარს. ქართულში ეს სიტყვა მეფის ან მბრძანებლის სასახლეს ნიშნავდა. ამასთან დარბაზს სასახლის ისეთ ოთახს უწოდებდნენ, სადაც სახელწიფო საქმეების გამო მეფის და დიდებულების თანდასწრებით სხდომა იმართებოდა. თვითონ სპარსულში ეს სიტყვა კარს ნიშნავდა, სავარაუდოდ ქართულშიც ასეთივე მნიშვნელობით შემოვიდა „სამეფო კარი“ ჩაანაცვლა „სამეფო დარბაზმა“. ეს ტერმინი X-XI საუკუნეებში ადრე არ არის დაფიქსირებული წყაროებში. კიდევ ერთი ქართული სიტყვა, რომელიც ქართულში არსებობდა „სამეფო კარის“ აღსანიშნავად „კარავი“ იყო. როგორც ივ. ჯავახიშვილი აღნიშნავს, „კარავი“, „სამეფო კარი“ და „სამეფო დარბაზი“ თანაბარი მნიშვნელობის ტერმინები უნდა ყოფილიყო.<sup>31</sup> ჩვენი მიზანია განვიხილოთ სამეფო დარბაზობის ცერემონია, ამ შემთხვევაში ჩვენთვის გადამწყვეტი მნიშვნელობა არ ექნება „სამეფო კარის“ ცერემონიას ვუწოდებთ თუ „სამეფო დარბაზისას“.

---

<sup>31</sup> ივ. ჯავახიშვილი. თხზულებანი თორმეტ ტომად. ტ. VII, გვ. 180.

რა თქმა უნდა, დარბაზობას თავისი ისტორია აქვს, დროთა განმავლობაში არაერთხელ უნდა შეცვლილიყო დარბაზობის წესებიც და მასში მონაწილეთა შემადგენლობაც. სამწუხაროდ, ჩვენამდე ბევრმა საისტორიო წყარომ არ მოაღწია, რათა უფრო ფართო მასალაზე დაყრდნობით გვემსჯელა აღნიშნულ საკითხზე.

მსჯელობა დავინწყით იმის შესახებ თუ ვინ მონაწილეობდნენ „სამეფო დარბაზობაში“. ერთ-ერთი წყარო რომელიც პირდაპირ ასახელებს „დარბაზობაში“ მონაწილეებს არის ბაგრატ IV–ის მიერ 1060–1065 წლებში გაცემული სიგელი. ცნობილია რომ მიჯნაძორელ და ოპიზელ ბერებს შორის დავა მეფეს უნდა გადაეწყვიტა, ამიტომ მეფე წერს: „შევკრიბენ კარსა დარბაზისა ჩუენისასა მღვდელ–მოძღვეუარნი, ერისთავთ–ერისთავნი, ერისთავნი და ყოველთა ჯევთა ზემოთა და ქუემოთა აზნაურნი მეცნიერნი საბჭოთა საქმისანი და დავსხენით წინაშე ჩუენსა“.<sup>32</sup> როგორც ვხედავთ, სადარბაზოდ შეკრებილან უმაღლესი სამღვდელოება, საქვეყნოდ გამრიგე ხელისუფლების წარმომადგენლები და სასამართლო საქმის მცოდნე აზნაურები. ამ ცნობაში არ იხსენიებიან ვაზირები, რომლებიც ამ დროს სამეფო კარზე მნიშვნელოვან ფიგურებს წარმოადგენდნენ. სამართლიანი იქნება დავეთანხმოთ ივ. ჯავახიშვილის მოსაზრებას, რომელიც ამბობს, რომ ვინც მუდმივად დარბაზის კარს მყოფი მოხელეები იყვნენ მათი მოწვევა არ იქნებოდა საჭირო, მათი მონაწილეობა საქმის განხილვაში თავისთავად იგულისხმებოდა.<sup>33</sup> დარბაზობის მოწყობის ბრძანებას მეფე გაცემდა. XI საუკუნის შუა წლებში „სამეფო დარბაზობაში“ მონაწილეობას იღებდნენ: უმაღლესი სამღვდელოების წარმომადგენლები, დარბაზის კარს მყოფი ვაზირები საქვეყნოდ გამრიგე ხელისუფლები და „მეცნიერნი საბჭოთა საქმეთანი“ (სასამართლო საქმის მცოდნე აზნაურები).

დარბაზობაში მონაწილეთა შესახებ საინტერესო ცნობებია დაცული თამარ მეფის ისტორიკოსთან, „ისტორიანი და აზმანი შარავანდედთანში“ ვკითხულობთ:

<sup>32</sup> ქართული სამართლის ძეგლები. ტ. II, გვ. 8.

<sup>33</sup> ივ. ჯავახიშვილი. თხზულებანი თორმეტ ტომად. ტ. VII, გვ. 181.

„დასუეს სელებითა ოქროჭედილებითა რომელნიმე მარჯუენით მისსა და რომელიმე მარცხენით“<sup>34</sup> აქ საუბარია ვაზირების შესახებ, ე.ი. ისინი ნამდვილად იყვნენ დარბაზის წევრები. ამავე ავტორთან აღნიშნულია, რომ დარბაზობა მეფის თავჯდომარეობით იმართებოდა და ის მოოქროვილ ტახტზე იჯდა.<sup>35</sup>

სამეფო დარბაზობაზობას მკაცრად რეგლამენტირებული წესები ჰქონდა, ჯდომა–დგომის წესების არსებობა ნიშნავს იმას, რომ დამსწრე საზოგადოება ერთმანეთისგან დიფერენცირებული იყო თავისი უფლება–მოვალეობებისა და პატივის მიხედვით. ასევე მნიშვნელოვანია ისიც, რომ სკამებიც კი განსხვავებული ჰქონიათ დარბაზობაზე დამსწრეებს. ვაზირები ოქროჭედილ სკამებზე მსხდარან, დანარჩენი დიდებულები ჩვეულებრივ საჯდომებზე, ზოგი „სასთაულით“ და ზოგიც „უსასთაულოდ“. საინტერესოა ჰქონდათ თუ არა რაიმე საერთო სახელი სამეფო დარბაზის წევრებს, წყაროებიდან ირკვევა, რომ მათ ეწოდებოდათ „დარბაზის ერნი“. ივ. ჯავახიშვილის აზრით, სწორედ ამ ტერმინიდან წარმოიშვა სიტყვა „დარბაისელი“, რომელიც, თავდაპირველად, დარბაზის წევრის აღმნიშვნელი სიტყვა იყო, ხოლო შემდეგ მას დინჯი ადამიანის მნიშვნელობაც მიენიჭა.<sup>36</sup> XIII საუკუნის ისტორიული ძეგლიდან, „მეფედ კურთხევის წესი და განგებიდან“, ჩანს რომ მეფედ კურთხევის ცერემონიაში „დარბაზისერნი“ მონაწილეობდნენ. მასში ვკითხულობთ: მეფეს უნდა მიულოცონ და პატივისცენ: *„პირველად დედოფალმან თაყუანი–სცეს, მერე–ლა კათალიკობმან, ჭყონდიდელმან, ათაბაგმან, მანდატურთ–უხუცესმან, ამირსპასალარმან, მეჭურჭლეთუხუცესმან, მსახურთ–უხუცესმან და შემდგომად ჯელოსანთა და უჯელოთა დარბაზის ერთა სრულიადთა“*.<sup>37</sup> მოცემული ციტატა რამდენიმე მნიშვნელოვან დეტალზე მიგვითითებს. როგორც ჩანს, ვაზირები ცალკე ჯგუფს განეკუთვნებოდნენ და ცალკე იყვნენ „დარბაზის ერნი“. ისინი ორ ჯგუფად იყოფოდნენ: „ჯელოსანი და

<sup>34</sup> ისტორიანი და აზმანი შარავანდედთანი. გამოსცა გ. კარტოზიამ, გვ. 408.

<sup>35</sup> იქვე, გვ. 436.

<sup>36</sup> ივ. ჯავახიშვილი. თხზულებანი თორმეტ ტომად. ტ. VII, გვ. 182.

<sup>37</sup> ქართული სამართლის ძეგლები. ტ. II, გვ. 53.

უჯელონი“. პირველი მათგანი მეფის მოხელეებს გულისხმობს, მეორე მათგანი კი მოხელეები არ არიან, ისინი, სავარაუდოდ, სხვადასხვა წოდებათა წარმომადგენლები უნდა ყოფილიყვნენ, მაგრამ დაზუსტებით ამის დამტკიცება წყაროების სიმცირის გამო არ შეგვიძლია.

დარბაზის სხდომების შემადგენლობაზე ვრცელი ინფორმაციაა დაცული „ხელმწიფის კარის გარიგებაში“. დარბაზის სხდომებს ესწრებოდნენ ვაზირების სრული შემადგენლობით თავიანთ თანაშემწეებთან ერთად, უმაღლესი სამღვდელთა, საქვეყნოდ გამრიგეთაგან უფროსი მოხელეები. სამწუხაროდ, „უხელოთა დარბაზის ერთა“ შემადგენლობის და ვინაობის შესახებ არც ამ წყაროში არის რაიმე ცნობა.

რაც შეეხება თვითონ ტერმინს და მის ორ სახეობას, „დიდი და უმცროსი წესით“ დარბაზობას. იგი ისტორიკოსებს შორის აზრთა სხვადასხვაობას იწვევს. ივ. ჯავახიშვილი მიიჩნევდა, რომ სამეფო კარზე ამ ცერემონიას „დარბაზობა“ ეწოდებოდა, მისი ორი სახეობა არსებობდა „დიდითა წესითა“ და „მცირეთა წესითა“. ივანე ჯავახიშვილი ფიქრობდა, რომ დიდი დარბაზობა საზეიმო სხდომას წარმოადგენდა, რომელსაც ფართო აუდიენცია ჰყავდა. აქ უნდა განეხილათ ის მოვლენები, რომლის შესახებ საუბარი სახიფათო და უხერხული არ იქნებოდა. ასევე, ამბობდა, რომ „უმცროსი წესით დარბაზობა“ საქმიანი სხდომა უნდა ყოფილიყო, შედარებით მცირე აუდიენციით და განეხილათ საიუმლო და სახელწიფოსთვის მნიშვნელოვანი საკითხები. ასევე აღნიშნავს იმას, რომ აღნიშნულ საკითხზე მსჯელობა მხოლოდ ვარაუდებით არის შესაძლებელი, რადგან არ გვაქვს სხვა რაიმე წყარო, რომელიც „ხელმწიფის კარის გარიგების“ ცნობას უფრო დააზუსტებდა და გაამყარებდა.<sup>38</sup>

ამ საკითხის შესახებ განსხვავებული აზრი აქვს პროფესორ ილია ანთელავას, რომელიც არ ეთანხმება ჯავახიშვილის მიერ გამოთქმულ მოსაზრებას. განვიხილოთ მისი მისაზრება. ორივე ისტორიკოსი ერთ წყაროს ეყრდნობა, მაგრამ ინტერპრეტაცია

---

<sup>38</sup> ივ. ჯავახიშვილი. თხზულებები თორმეტ ტომად. ტ. VII, გვ. 183.

განსხვავებულია. „ხელმწიფის კარის გარიგებაში“ ვკითხულობთ: „ან განცხადება ვსთქვათ—დიდი დღესასწაული. და წესი არის, რომე მეფე სადაც იყოს, რაც სული კაცი არის ქრისტიანი, ყოველივე წავა. დიდი დროშა ააბან და მენობათენი წინათ, და დროშა განალამცა წინა ამართული, და მერმე ჯვარის—მტვრთველი შემოსილი და ძელი ცხოვრებისა ჯელითა. ეგრეთვე წამოვიდნენ ეკლესიას. მივა მეფე და მენობათენი აღარა სცემენ ნობათსა და დროშა ეკლესიის კარსა დვას. და რა წყალი აკურთხონ, მეფე ეკლესიით გავიდეს, დროშით წავა და მუნვე კარის შესავალს ქვეშე დადგების. დარბაზობა, ვითარცა მეფეს ეპრიანოს: დიდის წესითა, და თუ უმცროსითა, ვითარცაღა წესი იყოს, იქნას“.<sup>39</sup> ილია ანთელავა ამტკიცებს, რომ განცხადების დღესასწაულის შემდეგ ეკლესიიდან გამოსული მეფე სხდომის მოწვევის განკარგულებას არ გასცემდა, აქ საუბარი უნდა იყოს განცხადების დღესასწაულისადმი მიძღვნილ სამეფო წვეულებაზე. ის გამორიცხავს, რომ ქრისტიან მეფეს „ღვთისწორად“ წოდებულს დიდი დღესასწაულის დროს „სახელმწიფო დარბაზის“ სხდომები მოენვია, მითუმეტეს ეს „ხელმწიფის კარის გარიგებაში“ ნორმად ყოფილიყო ფიქსირებული.<sup>40</sup> ამასთან ავტორი ტერმინ „დარბაზობის“ ნაცვლად „ვეზირობას“ უწოდებს სახელმწიფო საბჭოს სხდომას, რაც მთლად მართებული არ უნდა იყოს, რადგან სახემწიფო საბჭოს ვეზირებთან ერთად „ხელოსანი“ და „უხელონიც“ ესწრებოდნენ, ჩვენი აზრით, მათი „დარბაზის ერად“ მოხსენიება უფრო სწორია.

პროფ. ილია ანთელავას თავისი მოსაზრების დასადასტურებლად მოაქვს ციტატები „დიდი სჯულისკანონიდან“ და „მცირე სჯულისკანონიდან“. „დიდი სჯულისკანონში“ ვკითხულობთ: „სამოქალაქოთა სჯულთა განწესებაჲ იტყვს, ვითარმედ ყოველისავე გარეშისა საქმისათჳს უქმნი არიან შუდნი დღენი უწინარეს აღესებისა და შუდნი—შემდგომად აღესებისა და ქრისტეს შობისა და განცხადებისაჲ... და

<sup>39</sup> ქართული სამართლის ძეგლები. ტ. II, გვ. 80-81.

<sup>40</sup> ილ. ანთელავა. საქართველოს ცენტრალური და ადგილობრივი მმართველობა XI-XIII სს. თბ. 1983, გვ. 165.

ამათ დღეთა შინა არცა საბჭოდ დაიდების, არამედ უფროდსლა მონათა განთავისუფლება იქნების და პერობილთა განტევებად და თანამდებთა მიტევებად“.<sup>41</sup> „მცირე სჯულისკანონშიც“ წერია: „ქრისტესშობად უქმობად არს.... განცხადებად უქმობად არს...“<sup>42</sup> მოტანილი ციტატებიდან ვიგებთ, რომ განცხადება დიდი დღესასწაულია და უქმეა აუცილებლად, მაგრამ ეს არ ამტკიცებს იმას, რომ მეფის მიერ ნაბრძანები დარბაზობა მხოლოდ სამეფო წვეულება ყოფილიყოს. უფრო სწორი და დამაჯერებელია ივ. ჯავახიშვილის მოსაზრება, რომელიც ამბობს „დარბაზობა მნიშვნელოვანი სახელმწიფო საქმეების განსახილველად და გადასაწყვეტად იკრიბებოდა და დღესასწაულზეც“.<sup>43</sup> ასეთი მოსაზრება ნამდვილად რეალობასთან უფრო ახლოსაა, რადგან თუ მეფე „დარბაზობას“, როგორც უბრალო წვეულებას ისე იწვევდა მაშინ გამოდის რომ სახელმწიფო საქმეებს სხვა სხდომაზე განიხილავდნენ. რა ერქვა ამ შეკრებას ან რატომ არაფერია წყაროებში დათქმული? ალბათ იმიტომ რომ დარბაზობა მოიცავდა როგორც სახელმწიფო საქმეების განსახილველ ცერემონიას, ასევე დღესასწაულების აღნიშვნის ცერემონიას.

საისტორიო წყაროებში გაფანტულად, მაგრამ მაინც არის ინფორმაცია დარბაზის ფუნქციების შესახებ. თავდაპირველად აღსანიშნავია, რომ მეფე იწვევდა დარბაზს და ერთად იღებდნენ მნიშვნელოვან გადაწყვეტილებებს, კანონების შედგენა და უზენაესი მართლმსაჯულება მათ ხელში ყოფილა. ბექა-ალბულას სამართლის წიგნში ვკითხულობთ: „პირველად დავითიან ბაგრატ კურაპალატისა და აღმაშენებელთა მეფეთ-მეფისა ბრძანებითა და მერმე ებისპოზთა, დიდებულთა და აზნაურთა და ჭკვიანთა კაცთა მეფეთა წინაშე ერთბამად გაჩენილი განგებითა ღმრთისადთა“<sup>44</sup> ყოფილა ბაგრატ კურაპალატის სამართლის წიგნი. იგივე დასტურდება

<sup>41</sup> დიდი სჯულისკანონი. გამოსაცემად მოამზადა ე. გაბიძაშვილმა. თბ. 1975, გვ. 155.

<sup>42</sup> მცირე სჯულის კანონი. გამოსაცემად მოამზადა ე. გიუნაშვილმა. თბ. 1972, გვ. 38.

<sup>43</sup> ივ. ჯავახიშვილი. თხულებანი თორმეტ ტომად. ტ. VII, გვ. 183.

<sup>44</sup> ქართული სამართლის ძეგლები. ტ. I. ტექსტი გამოსცა, გამოკვლევა და ლექსიკონი დაურთო ი. დოლიძემ. თბ. 1963, გვ. 464.

„ძველის დადებაში“, სადაც გიორგი V ბრწყინვალე თვითონ ეუბნება მკითხველს: „შემოვედით ქალაქსა და შემოვიტანეთ თემისა და თემისა ერისთავნი და ჯევისთავნი და ჯევისბერნი და ჰეროვანნი, დავსხედით და დავსვით წმინდა მეუფე და ქართლისა კათალიკოსი ეფთჳში, დავსხით ვაზირნი და ეპისკოპოზნი და მოურავნი... და ეს განაჩენი დავდევითო“.<sup>45</sup> მოტანილი ციტატიდან ნათლად ჩანს, რომ მეფე დარბაზობას თუართო აუდიტორიასთან ერთად მართავდა და ერთად იღებდნენ გადაწყვეტილებებს და განჩინებებს.

აღნიშნული წესი და დარბაზობის ცერემონია არც XVIII საუკუნეში ყოფილა დავინწყებული, რადგან თვითონ ვახტანგ VI აღნიშნავდა: „რომელნი იხილავთ და ისმენთ, ნურვინ ჰკონებთ, რამეთუ თვით მხოლოდ თავით თვისით რასამე ვჰყოფდეთ, არამედ თანაყოლითა და მონმებითა მღვდელმთავრისა და დიდისა ქალაქისა მცხეთისა და კვართსა ზედან საუფლოსა სვეტისა აღმართებულისა და მორონ-აღმოცენებულის, საჭედ-მპყრობელისა და ჯარისხსა ზედან მტკიცედ მღვომელისა, ძმისა ჩვენისა ბატონიშვილისა კათალიკოსის დომენტისითა, ეგრეთვე თანადგომითა არავგის ერისთავის შვილის, მთავარეპისკოპოზის გრიგოლისა და სხვათა მიტროპოლიტ-ეპისკოპოზ-წინამძღუართ და საღვთოთავანთა, დამონმებითა და თანაზრახვითა მუხრანის ბატონის ერეკლეითი, არავგის ერისთავის გიორგითა, ქსნის ერისთავის დავითისითა, ორბელიძის სარდლის ლუარსაბითა, ამირახორის ავთანდილით, მღივანბეგის ერასტითა, სხვათა ყოველთა დარბაზისერთა ჩვენთათა. და კითხვითა ჭკუათმყოფელთა და მოხუცებულთა კაცთათა გავაჩინეთ და დავწერეთ, რომელსა მივწვდით და ანუ გონებანი ჩუენნი სამართალთა მიხედნენ“-ო.<sup>46</sup>

როგორც ვხედავთ მეფე დარბაზის წევრთა საკმაოდ დიდ რაოდენობას ასახელებს და ხაზს უსვამს, რომ სამეფო დარბაზის „თანადგომით“ იღებდა გადაწყვეტილებებს. ანუ გვიან შუა საუკუნეებშიც დარბაზობის ცერემონიას თავისი

<sup>45</sup> ს. კაკაბაძე. ძველის დადება გიორგი ბრწყინვალის მიერ. თბ. 1913, გვ. 4-5.

<sup>46</sup>ქართული სამართლის ძეგლები. I, გვ. 478-479.

მნიშვნელობა არ ჰქონდა დაკარგული და თავის მოვალეობას კვლავ ასრულებდა.

დარბაზის განსახილველი იყო ომის გამოცხადების საკითხი, დიდ ხელისუფალთა არჩევა-დანიშვნის საკითხი, ხელისუფლების „დალოცვა და ჯელდასმა“, საზეიმო სხდომების გამართვა ომის დასრულების შემდეგ, უცხოელი სტუმრების მიღება გამასპინძლება, დიდ დღესასწაულებში მონაწილეობის მიღება. სამეფო დარბაზს დიდი უფლება-მოვალეობები ჰქონდა, მეფე ითვლებოდა ერთპიროვნულ მმართველად (მონარქად), მაგრამ სამეფო კარზე მყოფი მოხელეების დახმარების და მათთან მოლაპარაკების გარეშე ის ვერ მიიღებდა გადაწყვეტილებას.

სამეფო დარბაზობის ცერემონია მკაცრად რეგლამენტირებული წესების მიხედვით უნდა ჩატარებულიყო, რომელსაც „დარბაზობის წესი“ ეწოდებოდა. ჩვენს მიერ ზემოთ განხილულ ბაგრატ IV-ის 1060–1065 წლების სიგელიდან ვიგებთ, რომ ამ პერიოდში სადარბაზოდ შეკრებილი ე.წ. „დარბაზის ერი“ მეფის წინ ანუ პირდაპირ მსხდარან. ამას საბუთში ჩანერილი სიტყვები ამტკიცებს: *„დავსხენით წინაშე ჩვენსა“*. შემდეგ პერიოდში, თამარ მეფის დროს აღნიშნული წესი შეცვლილა. „ისტორიანი და აზმანი შარავანდედთანი“ გვამცნობს, რომ *„დასვეს...რომელნიმე მარჯუენით მისსა (ე.ი. მეფისა) და რომელნიმე მარცხენით“*.<sup>47</sup> ეს ამტკიცებს იმას, რომ ძველი წესი მეფის პირისპირ ჯდომისა შეცვლილა და თამარის დროს მხარ-მარჯუნივ და მხარ-მარცხნივ მსხდარან ვაზირები. საერთოდ თამარ მეფის დროს დარბაზობის წესებს დიდი ყურადღება ექცეოდა. თამარის ისტორიკოსს აღნიშნული აქვს, რომ ვაზირებს *„შთააცვეს სკარამანგი (ან საკრამანგი) ტანსა მათსა და დასუეს სელებითა ოქროჭედილებითა“*. როგორც წყაროდან ჩანს ვაზირების სამოსი შეუცვლიათ და საჯდომიც, რომელიც აქამდე ოქროჭედილი არ უნდა ყოფილიყო. იქვე ვკითხულობთ, რომ ვაზირები და სხვა ხელისუფალნი მეფემ სელებზე *„დასხნა სასთაულითა“*.<sup>48</sup> როგორც ივ. ჯავახიშვილი აღნიშნავს, ბალიშებზე დასხმა ძველი წესი ყოფილა ჯერ

<sup>47</sup> ისტორიანი და აზმანი შარავანდედთანი. გამოსცა გ. კარტოზიამ, გვ. 408.

<sup>48</sup> იქვე, გვ. 408.

კიდევ სასანიანთა სპარსეთში,<sup>49</sup> რომელიც საქართველოშიც ყოფილა გავრცელებული.

კიდევ უფრო საინტერესოა დარბაზის სხდომების დროს „დარბაზის ერთა“ ჯდომისა და დგომის წესები, ყველაფერი ეს უფროს-უმცროსობის რიგის მიხედვით იყო განსაზღვრული და სხვის ადგილზე დაჯდომის უფლება მეფის ბრძანების გარეშე არავის ჰქონდა. თამარის ისტორიკოსთან ვკითხულობთ, რომ კახეთის ერისთავმა ბაკურ-ყმა ძაგანისძემ „იაჯა არიშოანის ადგილასა დაჯდომა სასთაულითა“<sup>50</sup> ეს კიდევ ერთხელ ამტკიცებს, რომ დარბაზის თითოეულ წევრს თავისი დასაჯდომი ადგილი ჰქონია და თუ სად დაჯდებოდა „დარბაზის ერის“ წარმომადგენელი „წესი ჯდომისა და დგომისა“ განსაზღვრავდა. ფეხზე მდგომ მოხელეებსაც განსაკუთრებული ადგილი ჰქონდათ მიკუთნებული მეფესთან „წესისაებრ სიახლოსა“. ანუ მეფესთან ახლოს დგომის უფლება თანმდებლობით უფრო მაღლა მდგომს ჰქონდა, შემდეგ კი სოციალური დიფერენციაციის მიხედვით იყვენენ განაწილებულნი.

დასკვნის სახით შეგვიძლია ვთქვათ, საქართველოში შუა საუკუნეებში დარბაზობის ცერემონიამ თავისი დანიშნულება შეასრულა და, ასევე, თავად ამ ცერემონიამაც გარკვეული განვითარების გზა განვლო. მეფეს ყოველთვის გვერდით ჰყავდა ადამიანთა ჯგუფი, ანუ „დარბაზის ერი“, რომლებიც ყოველთვის ეხმარებოდნენ მას. მათ ჰქონდათ თავიანთი უფლება-მოვალეობები, რომელიც მკაცრად იყო რეგლამენტირებული, იმის მიხედვით თუ რა პატივი (სახელო) ჰქონათ. სხვადასხვა პერიოდში დარბაზის წევრთა რაოდენობა იცვლებოდა, ეს იმაზე იყო დამოკიდებული როდის და ვინ დაემატებოდა მათ რიცხვს. მაგალითად, თამარის დროს ათაბაგის ვაზირად გახდომამ გამოიწვია ის, რომ მას მიენიჭა გარკვეული უფლება-მოვალეობები თუ რა უნდა გაეკეთებინა დარბაზობის დროს. ანუ ნებისმიერი მოხელის ყოფნას „დარბაზის ერთა“ შორის თავისი დატვირთვა და მნიშვნელობა ჰქონდა. თუ დავაკვირდებით დარბაზის ფუნქციას და დღევანდელი პარლამენტისას შევადარებთ,

<sup>49</sup> ივ. ჯავახიშვილი. თხზულებები თორმეტ ტომად. ტ. VII, გვ.185.

<sup>50</sup> ისტორიანი და აზმანი შარავანდედთანი. გამოსცა გ. კარტოზიამ, გვ. 408.

შესაძლოა განვითარების უწყვეტი ჯაჭვი დავინახოთ. დღევანდელი საპარლამენტო სხდომები, ის წესები რაც არსებობს და განსაზღვრავს პარლამენტის წევრთა უფლება-მოვალეობებს თითქოს სათავეს სწორედ შუა საუკუნეების დარბაზიდან იღებს, ეს კი იმის ნიშანია, რომ ჩვენი ქვეყანა ყოველთვის მონოღებული იყო სახელმწიფოებრივი სრულყოფისკენ, უფრო მეტად დაეხვეწა და მრავალფუნქციური ყოფილიყო სახელმწიფო ბიოროკრატიული აპარატი.

### თავი III

#### საზეიმო პურობა

სამეფო კარზე არსებობდა წესები, რომლებიც არეგულირებდნენ სასახლის ცხორებას. მკაცრად რეგლამენტირებული ცერემონიების რიცხვს მიეკუთვნებოდა საზეიმო პურობაც. მეფე და მის გარშემო შემოკრებილი დიდებულები უფროს-უმცროსობის მიხედვით იცავდნენ დადგენილ წესებს. ჩვენ შევეცდებით აღვადგინოთ საზეიმო პურობის ცერემონია, რომელიც ხშირად იმართებოდა სამეფო კარზე.

როგორც ცნობილია, „დიდი დარბაზობის“ შემდეგ იმართებოდა პურობის ცერემონია. სუფრასთან ჯდომის წესი, მოსართმევი საჭმელი და მომსახურება ექვემდებარებოდა იერარქიულ პრინციპებს. აღსანიშნავია ისიც, რომ დარბაზობის ყველა წევრს არ ჰქონდა უფლება პურობაზე დარჩენილიყო. საინტერესოა მანდატურთუხუცესის მოვალეობა, ის ყოველთვის „პურის წინაობას“

ხელმძღვანელობდა. გარკვეულ წესებს ექვემდებარებოდა სტუმრებისა და მეფის დაჯდომისა და გამასპირძლების ცერემონია. ერთმანეთისგან განსხვავდებოდა დასაჯდომი სკამები, ზოგი ოქროჭედილ სკამებზე იჯდა სასთაულით, ზოგიც უსასთაულოდ. „*პურობა თუ გვიან გაიმართება და ღამე მოუწევთ სტუმრებს ნაბრძანება მაშლებით უნდა გააცილონ. პურობის დაწყების დროს მეფე არ იკავებდა სუფრასთან პირველ ადგილს, ის როგორც მასპინძელი დარბაზის წევრებს იწვევდა და შემდეგ შეუერთდებოდა მათ*“.<sup>51</sup>

პურობის ასეთი ცერემონია მნიშვნელოვანი იყო მოხელე-დიდებულების და მეფის ურთიერთობაში. მათი ურთიერთდამოკიდებულება კი ალბეჭდილი იყო ნებისმიერ პურობის დეტალში. ჩვენ განვიხილავთ საზეიმო ცერემონიას „ხელმწიფის კარის გარიგებაში“ დაცული ცნობების მიხედვით, რადგან ეს ცნობა თითქმის სრულყოფილად აღწერს ჩვენთვის საინტერესო მოვლენას.

პურობის გამართვის ცერემონიას ხელმძღვანელობდა მანდატურთუხუცესი, სამეფო კარზე ის ობერცერემონმაისტერის მსგავს ფუნქციას ასრულებდა. მას ევალეობოდა სახელწიფო წესრიგზე თვალყურის მიდევნება.<sup>52</sup> ასევე სამეფო დარბაზობისას და პურობისას ის და მისი ხელქვეითები წარმართავდნენ მთელ ცერემონიას. კერძოდ ვკითხულობთ: „*თუ პურობას ღამე შემოესწრას, სანთელი სასანთლითა და მისითა ნატიითა თავთავისა საფარეშოთა არის, და ფარეშთა-უხუცესი მიიღებს, წამოაყენებს და თავ თავის ადგილს ჩასდებს ვაზირთა წინა . . . რა გაიყარნენ, ორი მაშხალა ჭყონდიდელს წაუძღვების და თვითო სამთა ვეზირთა, და სხვათა არავის . . . ან მეფე უბრძანებს მანდატურთ-უხუცესსა, იგი არგანსა დაავდებს და ამირეჯიბი არგანს აიღებს. მანდატურთ-უხუცესი ტახტის წინ მიდგების: „პური მოიღეო“.* მანდატურთ-უხუცესი მობრუნდების, არგანს გამოუღებს და პურის წინაობას იურვებს. და რაჲ ამირეჯიბი და განმგეთ-უხუცესი ვავიდნენ, კათალიკომნი, მოძღვართ-მოძღვარნი,

<sup>51</sup> საქართველოს ისტორიის ნარკვევები. ტ. III, გვ. 488.

<sup>52</sup> საქართველოს ისტორიის ნარკვევები. ტ. III, გვ. 644.

ჭყონდიდელი, ათაბაგი, ამირსპასალარი და ვინც ქვე სხედენ, ყველანი ზე ადგებიან. პატარა ხანი გამოვიდეს, მეფე აწვევს კათალიკობთა, მოძღვართ-მოძღვართა, ჭყონდიდელსა, ათაბაგსა და, ვისაცა არ უბრძანებს ვერავინ დაჯდების ვერემლი სეფეს ტაბაკს არ დასდგამენ. უნდა ოქროს ტაბაკი შუაზედ ერთუმელი იყოს. ზედ შექმნილი თავი თვალმარგალიტიანი, შიგ მარილი იყოს ზედ ერთი კოვში ბროლისა, ტარი მოჭედილი, ხალასის თვალი ზედა იყოს და ერთი ატლასის ჩილანი ზედ ისხდენ. ტაბაკს მანდატურთ-უხუცესი და ამირეჯიბი დასდგამენ. შაჰამადას განმგეთ-უხუცესი მიიღებს კომმანჩიითა. მოლარეთ-უხუცესი ადგების, მოიღებს მსახურთ-უხუცესი, და იგი მოიღებს. ან მანდატურთ-უხუცესი მივა და თავის ადგილს ქვე დაჯდების. ამირეჯიბი და [და განმგეთ-უხუცესი] კათალიკობთა, მოძღვართ-მოძღვართა, ჭყონდიდელსა, ამათ წინ ტაბლას დასდგმენ, და ზედ ტაბაკს იგი დაუდგამს. ეს ოთხნივე ადგებიან და თავმოდრეკით წელთა ტაბაკზე დასხმენ, ამირეჯიბს ეთაყვანებიან. ათაბაგსა, ამირსპასალარსა და მანდატურთ-უხუცესსა ტაბაკს ეჯიბი დაუგამს, ადგებიან. განმგეთ-უხუცესი მონაზონთ ოთხთავე სამ-სამის ჯამით, ეგრეთვე სამთა ვეზირთა ითვალავს, და მერმე ამირეჯიბი და განმგეთ-უხუცესი დასხდებიან, და მუქიფი ითვალავს სხვათა ვეზირთა ოროლითა ჯამითა, პირის მნდეს, რად მეორეს ჭიქას გამოუღებს მეფე, ანუ მესამესა, სათვალავსა მოიატანინებს, [მივა] და დაჯდების ამირეჯიბსადა განმგეთ-უხუცესს თანა. და სამნივე ერთად დასხდებიან. სანოლის მწიგნობარი მსახურთ-უხუცესის გვერდით ზის. და რად სუფრა დაუფინონ, წელისუფალნი ესე, რომე ზემოთ დამიწერია, ვინც სხედან მეაბჯრეთ-უხუცესსა პირდაპირ, ზარდახანის მწიგნობარი და მას ქვემოთ მწიგნობარნი, დასხდებიან პირისპირ. და იქით სხვანი ხელისუფალნი და ხელოსანნი, სასახლის დიდებულნი ჩასხდებიან, სუფრის ბოლოს მერემეთ-უხუცესი და თარემთ-უხუცესი სხედან, და მათ ქვემოთ მეჯინიბენი. მაგრამ სუფრაზედ ჭაშნავირი ზე დვას ოქსინოსა ზედა ცალკესა, იგი და წინამდგომი ტახტსა ზედა დვანან. ჭაშნავირს წელის მანდილით ცოტა ჩამჩა აქვს. რად საჭამადი წამოაყენონ, ჩამჩით ამოიღებს და

ჯელსა ზედა დაისხამს და შეხვრეტს და აგრეთვე ღვინოს . . . (შემდეგ ორი ფურცელი აკლია)<sup>53</sup>

მოტანილი ციტატა მრავლის მომცველ ინფორმაციას გვანვლის პურობის და მასზე დამწრეთა შესახებ. როგორც ვხედავთ, პურობის ცერემონია კარგად გათვლილი და რეგლამენტირებული ყოფილა. ამ შემთხვევაშიც დაცულია უმცროს-უფროსობის წესები. რომელი მოხელე სად უნდა დაბრძანდეს და ვინ მოემსახუროს. მანდატურთუხუცესი პურობის ცერემონიის წარმმართველია, მომსახურე პერსონალმაც და დამწრე საზოგადოებამაც იცის ვინ სად უნდა განთავსდეს და ვის ვინ მოემსახუროს. სწორედ მანდატურთუხუცესის „პურის წინაობის“ შემდეგ იწყება „პურობის ცერემონია“. შემდეგ, მანდატურთუხუცესი და ამირეჯიბი ტაბაკს სეფეზე დასდგამენ განმგეთუხუცესი შეჭამანდს მოიღებს, ამის შემდეგ მანდატურთუხუცესი თავის ადგილს დაიკავებს. ამირეჯიბი კათალიკოზს, მოძღვართ-მოძღვარს და ჭყონდიდელს წინ ტაბლას დაუდგამს და ზედ ტაბაკს დაუდებს. ათაბაგს, ამირსპასალარს და მანდატურთუხუცესს ტაბაკს ეჯიბი დაუდგამს. განმგეთუხუცესი კი ოთხთა მონაზონთა მოემსახურება. და ასე გრძელდება უფროს-უმცროსობის დაცვით ცერემონიის წარმარვა. სულ ბოლოს საინტერესო წინადადებაა დაუსრულებელი სადაც ვკითხულობთ, რომ ჭამნაგირი აგემოვნებს საჭმელს და ღვინოს და შემდეგ სამწუხაროდ წყდება ტექსტი. სავარაუდოდ, საკვებ-სასმელის წინაწარ გასიჯვა საჭირო იყო იმის გამოსარიცხად, რომ არც ერთი მათგანი მონამლული არ იყო. საკმაოდ საინტერესო სურათია პურობის, რადგან სხვა არც ერთ წყაროში ასე დანწრილებით არ არის ცნობები დაცული.

სავარაუდოდ, „პურობის ცერემონიას“ გარკვეული ცვლილებები უნდა განეცადა, რადგან როგორც უკვე აღვნიშნეთ, ყოველი ახალი სახელოს დამატება სამეფო კარზე იწვევდა გარკვეულ ცვლილებებს, ნებისმიერ მოხელეს უნდა ჰქონოდა გარკვეული უფლება-მოვალეობები. სწორედ ამიტომ, ამ ცერემონიაშიც გარკვეული ცვლილებები

---

<sup>53</sup> ივ. ჯავახიშვილი. თხზულებანი თორმეტ ტომად. ტ. VI, გვ. 401-402.

აუცილებლად იქნებოდა შესული, მაგრამ ძირითადი ფუნდამენტი, სავარაუდოდ, უცვლელი უნდა დარჩენილიყო.

## **თავი IV**

### **მოხელეთა დანიშვნა**

საქართველოს ფეოდალური სახელმწიფოს მართვისთვის აუცილებელი იყო სხვადასხვა მოხელეების დანიშვნა და „სახელოების“ შექმნა. პირველად ჩამოყალიბდა სამხედრო-ადმინისტრაციული ერთეულები, რომელსაც საერისთავოები ეწოდებოდა. ძვ.წ. III საუკუნიდან XV საუკუნის ბოლომდე საერისთავო წარმოარდგენდა ადგილობრივი მმართველობის სისტემას, რომელშიც მეფე ნიშნავდა თავის მოხელეს,

ერისთავს, საერისთავო კი ღროებით სამართავად გადაცემულ ტერიტორიას წარმოადგენდა. ბრძოლა სამეფო ხელისუფლებასა და ერისთავებს შორის საუკუნეების მანძილზე გრძელდებოდა, მეფე თავის მხრივ ცდილობდა გაეკონტროლებინა ერისთავები, რათა ზედმეტად არ გაძლიერებულიყვნენ. ხოლო ადგილობრივი მმართველები ყოველთვის იმისთვის იბრძოდნენ, რომ ღროებით სამართავად ჩაბარებული ტერიტორია სამემკვიდრეო ექციათ და გაძლიერებულიყვნენ. გარკვეულ წარმატებებს ერისთავებმა VI საუკუნის 30-იანი წლების ბოლოს მიაღწიეს, როდესაც მეფობა გაუქმდა, მართალია ეს გარეშე ძალის ჩარევით მოხდა, მაგრამ ერისთავების უფრო გაძლიერებისთვის ხელსაყრელი ფაქტი იყო. ფაქტობრივად, თვითონ გახდნენ თავიანთი საერისთავოების სრული მმართველები. მათ საერისთავო მემკვიდრეობით სამართავად აქციეს, მიუხედავად იმისა, რომ ასე გაძლიერდნენ ისინი თავიანთ კუთვნილ საერისთავოს კვლავ ერისთავის ტიტულით განაგებდნენ და მათი ტიტულატურის ცვლილება არ მომხდარა.

ვითარება შეიცვალა მას შემდეგ, რაც ერთიანი საქართველოს მეფე ბაგრატ III-მ კვლავ მოახერხა მეფის ინსტიტუტის გაძლიერება და აღადგინა თავდაპირველი ტიპის ადგილობრივი მმართველობის ინსტიტუტი, მმართველად კი კვლავ ერისთავის ტიტულის მქონე მოხელეები დატოვა. ასეთი მდგომარეობა დიდხანს არ გაგრძელებულა, ქვეყნის შიგნით და გარეთ არსებულმა ვითარებამ ერთის მხრივ დაასუსტა მეფის ხელისუფლება და მეორეს მხრივ გააძლიერა ერისთავები, რომლებიც ნელ-ნელა „მთავრები“ ხდებიან. XV საუკუნის ბოლოს კი ქვეყანა საშინელ ჩიხში ექცევა და იქიდან თავს ვეღარ აღწევს, ვიღებთ დანაწევრებულ სამეფო-სამთავროებს, იცვლება მმართველობის მთლიანი სისტემა და ერისთავების ინსტიტუტიც ქრება, მათ ნაცვლად კი ჩნდებიან „მთავრები“ გაზრდილი უფლებებით.

ჩვენ მოკლედ მიმოვიხილეთ ერისთავების შესახებ ინფორმაცია და მათი უფლება-მოვალეობები. კერძო მაგალითების მოყვანას აღარ დავინწყებთ, რადგან

ისედაც ნათელია თუ რა დიდი მნიშვნელობა ჰქონდათ ერისთავებს სამეფო თუ სახელმწიფო საქმეში. ჩვენი კვლევის საგანი ამ შემთხვევაში ერისთავების დანიშვნის შესახებ ინფორმაციის შეკრება და იმ ცერემონიის აღდგენაა, რომელიც ამ მოხელეების დანიშვნის დროს ტარდებოდა.

ერისთავი იყო საჯარო ხელისუფლების მოხელე, რომელიც ინიშნებოდა მეფის ბრძანებით და მას ექვემდებარებოდა სახელმწიფოებრივი ცხოვრების ყველა მხარე სამართავად ჩაბარებულ ტერიტორიაზე. ერისთავის სასამართლო-ადმინისტრაციულ უფლებებზე მიუთითებენ „ძეგლის დების“ მე-7; მე-9; მე-17 და მე-18 მუხლები. ერისთავი საკმაოდ დიდი უფლებებით სარგებლობდა, ერისთავობის ინსტიტუტი კი საკმაოდ მნიშვნელოვანი იყო ქვეყნის მართვისთვის.

ისეთი დიდ მოხელის დანიშვნა, როგორც ერისთავი იყო მოითხოვდა ცერემონიის ჩატარებას, ეს უნდა მომხდარიყო საზეიმოდ. მეფესაც და ერისთავსაც უნდა გაეცნობიერებინა თავისი უფლება-მოვალეობები. ეს, რა თქმა უნდა, ორივე მხარეს სთხოვდა შეესრულებინა ნაკისრი ვალდებულებები. ფეოდალურ სახემწიფოში მეფე ვალდებული იყო თავისი ხელქვეითები გაეკონტროლებინა და თუ საჭირო გახდებოდა დაეცვა კიდევ. ამიტომ ერისთავების კურთხევის ცერემონია მთელი რიგი წესების დაცვით ტარდებოდა.

ქართული სამართლის ძეგლების II ტომში მოცემულია: „კურთხევად ერისთავისაჲ“, „ლოცვაჲ დადგინებისა ერისთავთ-ერისთავისაჲ“, „კურთხევაჲ ცოტაჲსა ერისთავის დადგინებისასა უფლის მიმართ ვილოცოთ“.<sup>54</sup> ეს წერილობითი ძეგლები გადმოგვცემენ საინტერესო და მნიშვნელოვან ინფორმაციას მოხელეთა კურთხევის ცერემონიასთან დაკავშირებით. ამ ცნობების შევსება-გადამონწმება შეგვიძლია „ძეგლი ერისთავთას“ საშუალებით.

„კურთხევაჲ ერისთავისაჲში“ ვკითხულობთ იმ ცერემონიის შესახებ, რომელიც

---

<sup>54</sup> ქართული სამართლის ძეგლები, ტ. II, გვ. 54-57

ერისთავის პატივში აყვანას უკავშირდებოდა. ცერემონია იწყებოდა განბანვით, შემდეგ მომავალი ერისთავისთვის უნდა ჩაეცვათ „სამოსელი, ვითარცა შუენის მეფეთა“, ერისთავი მიჰყავდათ საკურთხევლის აღსავალთან, დაუფინონ „ტაბატად და ჯელითა აქუნდეს კეროვანი აღნთებული. დაუდგენ მღვდელნი და დიაკონნი მარჯუენით და მარცხენით, და კათალიკომბან ანუ მიტროპოლიტმან აკურთხოს ამით კურთხევითა“.<sup>55</sup> აქვე ვკითხულობთ: „საქმესა მონყალებისასა აჩუენებდის და სასჯელისა სიმართლისასა ჰყოფდეს უერთამოდ“, როგორც ვხედავთ ლოცვაში ხაზგასმული იყო ერისთავის ადმინისტრაციული ხელისუფლების შესახებ.

ასევე ხდებოდა ერისთავთ-ერისთავისა და „ცოტად“ ერისთავის კურთხევა, ამ შემთხვევებში, როგორც ჩანს, კურთხევის ცერემონია არ იყო განსხვავებული და მხოლოდ ლოცვა არის შემონახული სხვადასხვა სახით. როგორც პროფესორი მიხეილ ბახტაძე ვარაუდებს, ერისთავის სახელო ერთი უნდა ყოფილიყო, „ლოცვად დადგინებისა ერისთავთ-ერისთავისად“ და „კურთხევად ცოტადსა ერისთავისა დადგინებისასად უფლისა მიმართ ვილოცათ“ თვითონ სათაურები გვიან უნდა იყოს ჩამატებული. მისი აზრით, თავდაპირველად უნდა ყოფილიყო სათაური „კურთხევად ერისთავისად“, რომელიც ორი ლოცვისგან შედგებოდა, აღსანიშნავია თვითონ ის ფაქტი, რომ ტერმინები ერისთავთ-ერისთავი და ცოტად ერისთავი ტექსტში არ გვხვდება, მათ ნაცვლად კი ერისმთავარი და ერისთავია დაფიქსირებული.<sup>56</sup> ჩვენის მხრივ აღვნიშნავთ, რომ თვითონ ცერემონიას რაც შეეხება ის ერთი უნდა ყოფილიყო, მიუხედავად იმისა რომელ ლოცვას წაიკითხავდა მღვდელმსახური.

თავის მხრივ საინტერესოა ის ფაქტი, რომ ერისთავის კურთხევა ხდებოდა ტაძარში, ფაქტობრივად ეს იყო მეფის კურთხევის მიმსგავსებული ცერემონია. ერისთავი გამონყობილი იყო განსაკუთრებულ სამოსში და ჰქონდა თავისი ხელისუფლების ნიშნები, მაგრამ განსხვავებით ერისთავისგან მეფე მირონცხებული

<sup>55</sup> იქვე, გვ. 54–55.

<sup>56</sup> მ. ბახტაძე. ერისთავობის ინსტიტუტი საქართველოში. თბ. 2003, გვ. 197.

იყო.<sup>57</sup>

საერისთავოში ერისთავი მეფის „ნაცვალს“ წარმოადგენდა, მისი დადგენის ფორმულა და ინსიგნიები კი მიუთითებდა, რომ ის საჯარო ხელისუფლების უმაღლესი წარმომადგენელი იყო სამართავ ტერიტორიაზე, სადაც ახორციელებდა სამხედრო, სასამართლო-ადმინისტრაციულ და ფისკალურ ფუნქციებს.<sup>58</sup>

ერისთავის ფუნქციების და მათი დანიშვნის შესახებ „ძველი ერისთავთა“ საინტერესო ინფორმაციას გვანდის. ძველის მიხედვით, იუსტინიანე კეისარმა როსტომი „შემოსა სამოსლითა მით, რომელ ემოსა მაშინ მეფესა, და შეაცუა ბეჭედი და საყური და სარტყელი თვისი, საჭრველი და ცხენი თოროსანი, ღროშა და შუბი“.<sup>59</sup> როგორც პროფ. გ. ჩიტაია აღნიშნავს, ამ ინსიგნიებთან ერთად ერისთავს უნდა ჰქონოდა სკიპტრა, ცული და საკურცილ (სავარძელი).<sup>60</sup> ასეთი ნიშნების ფლობა მიუთითებს ერისთავის „სახელოს“ დიდ მნიშვნელობაზე. სხვა შემთხვევებში არსად არ გვხვდება ამდენი მნიშვნელოვანი სამეფო ნიშნით აღჭურვილი მოხელე.

კიდევ ერთი მნიშვნელოვანი წყარო, რომელიც, ასევე, „ქართული სამართლის ძეგლების“ II ტომშია მოცემული, მთავრის დადგინებას ეხება. ესაა „ლოცვა დადგინებასა მთავართასა“.<sup>61</sup> ჩვენ ზემოთ უკვე აღვნიშნეთ, რომ ერისთავების შემდეგ ისტორიულ ასპარეზზე გამოდიან მთავრები, მათ უფრო მეტი უფლებები და შესაძლოა „იმუნიტეტიც“ კი ჰქონდათ. ჩვენ არ გვაქვს ზუსტი ცნობები მთავრის დადგინება როგორი წესით ხდებოდა. აქ მხოლოდ აღნიშნულია ლოცვა, რომელიც მთავრის დადგენის დროს იკითხებოდა. თავდაპირველად უნდა აღინიშნოს ის ფაქტი, რომ თვითონ სიტყვა „კურთხევა“ სათაურშიც არ წერია, მაშინ როდესაც ერისთავის

<sup>57</sup> ი. ანთელავა. საქართველოს ცენტრალური და ადგილობრივი მმართველობა XI–XIII სს., გვ. 175.

<sup>58</sup> ა. ბოგვერაძე. ქართლის პოლიტიკური და სოციალურ-ეკონომიკური განვითარება IV–VIII სს., თბ. 1979, გვ. 189.

<sup>59</sup> ქართული სამართლის ძეგლები. ტ. II, გვ. 104.

<sup>60</sup> გ. ჩიტაია, სამი ინსიგნია (წარჩინების ნიშანი) ამიერკავკასიიდან, მასალები საქართველოს ეთნოგრაფიისათვის XVI–XVII სს. თბ. 1972, გვ. 52–53.

<sup>61</sup> ქართული სამართლის ძეგლები, ტ. II, გვ. 54.

შემთხვევაში პირდაპირ ვკითხულობთ: „კურთხევაჲ ერისთავისაჲ“. ამ შემთხვევაში შეგვიძლია გამოვთქვათ ვარაუდი, რადგან შემონახულია ლოცვის ტექსტი ე. ი. რალაც ცერემონია ნამდვილად უნდა ჩაეტარებინათ, რადგან ერისთავის შემთხვევაში სწორედ ლოცვა იყო ცერემონიის ნაწილი. შესაძლოა უბრალოდ დაიკარგა ლოცვამდე რა ცერემონიაც იყო ტექსტის ეს ნაწილი, ან ერისთავის კურთხევის მსგავსი იყო და აღარ აღწერეს, მხოლოდ ლოცვა ჩაუნერიათ. ასეთი ვარაუდების გამოთქმის საფუძველად შეგვიძლია მივიჩნიოთ ის, რომ მთავარი ერისთავის სამართალმემკვიდრე იყო, მას უფრო მეტი უფლებები ჰქონდა. მთავრის დადგინების ლოცვაში ვკითხულობთ: *„...სათნო–იყავ მოღებად მთავრობისა ამის, მოანიჭე ამას ყოველივე საცხოვრებელად თხოვად და ღირს–ყავ იგი სჯად მის ქუეშემყოფთა სინრფოებითა და სიმართლითა; რათა სათნოდ შენდა გამოჩნდეს ყოველსავე შინა, რომელსაცა იქმოდის, და ყოველსა საქმესა წყალობისასა აჩუენებდეს“*, ლოცვის ტექსტი არ შეიცავს სხვა რაიმე მნიშვნელოვან დეტალს, რომელიც მიგვანიშნებდა ლოცვის ნაკითხვის გარდა სხვა რა ხდებოდა ტაძარში, ან ვინ ესწრებოდა დადგინებას. მიუხედავად ამისა ნაკლებად სავარაუდოა მთავრის კურთხევა ერისთავის კურთხევის ცერემონიაზე უფრო უბრალო ყოფილიყო.

საინტერესოა როგორ ინიშნებოდნენ სამეფო კარზე მყოფი დიდი მოხელეები სხვადასხვა მნიშვნელოვან თანამდებობებზე, ხდებოდა თუ არა მათი კურთხევა, ან რა ცერემონიებთან იყო დაკავშირებული ეს ყველაფერი.

ქვეყნის გაერთიანებამ გამოიწვია მმართველობის აპარატის ცვლილება, სწორედ ამ პერიოდს უკავშირდება ვაზირის ინსტიტუტის შექმნა. ვაზირები გახდნენ ის „უხუცესები“, რომლებიც სამეფო კარზე მსახურობდნენ – მნიგნობართუხუცესი, ამირსპასალარი, მანდატურთუხუცესი, მეჭურჭლეთუხუცესი, მსახურთუხუცესი და სხვა. ყოველ უხუცესს გარკვეული უწყება ებარა და მათ შორის ყველაზე უფროსი მნიგნობართუხუცეს-ჭყონდიდელი იყო. ნ. ბერძენიშვილი ვაზირის ინსტიტუტის

დამკვიდრებას დავით აღმაშენებლის რეფორმებს უკავშირებს და თვლის, რომ პირველი „ვაზირი მეფისა“ იყო გიორგი მწიგნობართუხუცეს-ჭყონდიდელი.<sup>62</sup> თვითონ ტერმინი „ვაზირი“ არაბულ-სპარსული სიტყვაა, არაბულად სიტყვა „ვაზ-ირუნ“ თანაშემწეს, მეშველს, ვაზირსა და მინისტრს ნიშნავს.<sup>63</sup> „ვაზირი“ ქართულ საისტორიო წყაროებში, როგორც მეფის მინისტრის აღმნიშვნელი ტერმინი, გიორგი III-ის დრომდე არ გვხვდება. როგორც ცნობილია, ვაზირის ტიტულს მხოლოდ მწიგნობართუხუცესი ატარებდა, შემდეგ დაემატა მანდატურთუხუცესი ამირსპასალარი და მეჭურჭლეთუხუცესი, თამარის დროს მათ რიცხვს შეუერთდა ათაბაგი, ხოლო რუსუდანის მეფობის დროს მსახურთუხუცესი. ასე რომ სავაზირო 6 ვაზირისგან შედგებოდა, ისინი ორ ჯგუფად იყვნენ გაყოფილები: „სამთა ვაზირთა“ ჯგუფში შედიოდნენ – ათაბაგი, ამირსპასალარი და მანდატურთუხუცესი; „ორთა ვაზირთა“ შორის კი მეჭურჭლეთუხუცესი და მსახურთუხუცესი. ვაზირების შესახებ საისტორიო წყაროებში საკმაოდ ბევრი ინფორმაციაა, ვიგებთ მათი უფლება-მოვალეობების შესახებ, მაგრამ ის საკითხი რასაც ჩვენ ვიკვლევთ გამოკვეთილად არსად არის დაფიქსირებული. ფაქტია, რაღაც გარკვეული ცერემონია აუცილებლად უნდა ყოფილიყო ასეთი მაღალი თანამდებობის დაკავების დროს. ზემოთ ჩვენ უკვე განვიხილეთ მეფედ კურთხევის წესი, სადაც დაწვრილებით ვისაუბრეთ რომელ მოხელეს რა უნდა გაეკეთებინა და ვის რა მოვალეობა ჰქონდა. ამ ცერემონიიდან იმის დადგენაც შეგვძლია რომელი ვაზირი იყო უფროსი და რომელი უმცროსი. მაგრამ თვით ამ მოხელეების დადგენის ცერემონია არსადაა აღწერილი.

საინტერესოა, „ისტორიანი და ამბანი“ დაცული ცნობა: „ ... და განაჩინა და უბოძა ჭიაბერსა მანდატურთუხუცესობა და მისცა არგანი ოქროსა ჴელთა მისთა, და შთააცუეს სკარამანგი ტანსა მისსა, და დასუეს სელებითა ოქროჭედლითა...და კუალად უბოძა მეჭურჭლეთუხუცესობა დიდსა და გვარიანსა კაცსა კახაბერს ვარდანის ძესა, და

<sup>62</sup> ნ. ბერძენიშვილი. საქართველოს ისტორიის საკითხები. ტ. III. თბ. 1966, გვ. 39.

<sup>63</sup> ივ. ჯავახიშვილი. თხზულებები თორმეტ ტომად. ტ. VI, გვ. 265.

მსახურთუხუცესობა – ვარდანს დადიანსა...და უბოძა ამოლახობობა გამრეკელსა თორელსა, რომელი ამირსპასალარიცა იქმნა შემდგომად სარგის მხარგრძელისა“.<sup>64</sup> როგორც მოტანილი ციცატიდან ვიგებთ, მანდატურთუხუცესის დანიშვნის დროს გარკვეული ცერემონია ტარდებოდა, მეფე მას ოქროს არგანს უბოძებდა, ტანზე ძვირფას სამოსს ჩააცვამდნენ (სამოსიც ამ შემთხვევაში ერთ-ერთი ინსიგნიის როლს ასრულებდა) და ოქრომოჭედილ სელლიან სკამზე სვაუდნენ. ამ შემთხვევაში ერისთავისგან განსხვავებით კურთხევაზე არაფერია ნათქვამი, თანამდებობაზე დანიშვნის ასეთი ფორმა უფრო საერო ხელისუფლის მიერ თავისი უფლებების გამოვლინებას გამოხატავდა. მეჭურჭლეთუხუცესის გარდა მეფემ ამილახორი და ამირსპასალარიც დაადგინა, მათი დანიშვნის ამბავი სულ ორი სიტყვითაა გადმოცემული, მაგრამ ჩვენ შეიძლება გამოვთქვათ ვარაუდი, რომ მათი დანიშვნაც მოიცვდა გარკვეული წესებით ჩატარებულ ცერემონიას.

ასევე საინტერესოა ამირსპასალარის „სახელო“ და მისი როლი ქვეყნის მართვაში. ამირსპასალარი, როგორც სამხედრო უწყების წარმომადგენელი დიდ როლს თამაშობდა მეფის კურთხევის ცერემონიაში. მას თავისი თანამდებობის ნიშნად „ჯრმალი“ ჰქონდა, დიდი დარბაზობის დროს „ჯრმალ-შემორტყმული“ იყო.<sup>65</sup> ასევე კურთხევის წესიდან ვიგებთ, რომ სანამ მეფე ეკურთხებოდა „სამეფო ჯრმალი ორთავე ხელთა ზედა“ ამირსპასალარს ეჭირა, ხოლო საეკლესიო კურთხევის შემდეგ წესი იყო მას უნდა შეეხებოდა მეფისთვის ხმალი. ეს ყველაფერი მის დიდ უფლებებზე მიუთითებს, ამასთან ასეთი თანამდებობის პირის უბრალოდ დანიშვნა წარმოუდგენელია, მას ამირსპასალარობას გარკვეული წესის დაცვით უბოძებდნენ. სამწუხაროდ, არც ამ ცერემონიის შესახებ ინფორმაცია არ არის მოღწეული ჩვენამდე.

რაც შეეხება ათაბაგის თანამდებობას, ის საქართველოში გვიან შემოდის და არ წარმოადგენდა ძველ ქართულ თანამდებობას. „ათაბაგ“–ი თურქული სიტყვაა და მამა-

<sup>64</sup> ისტორიანი და აზმანი შარავანდედთანი. გამოსცა გ. კარტოზიამ, გვ. 408

<sup>65</sup> ქართული სამართლის ძეგლები. ტ. II, გვ. 51.

ბეგს ნიშნავს, ისინი განსაკუთრებული ნდობით სარგებლობდნენ და უფლისწულების აღმზრდელებად ინიშნებოდნენ.<sup>66</sup> ამ „სახელოს“ წარმოშობა დაკავშირებულია თამარ მეფის სახელთან. როგორც ვიცით, მისი მეფობის დროს ზაქარია მხარგრძელის გარდაცვალების შემდეგ თამარ მეფეს მისი ძმისთვის ივანე მხარგრძელს უბოძებია ეს პატივი. ივანეს კი უთხოვია მეფისთვის ახალი პატივის ათაბაგობის ბოძება.<sup>67</sup> მიუხედავად იმისა, რომ გიორგი ლაშა ამ დროს უკვე თამარის თანამოსაყდრე იყო ამ თანამდებობამ მაინც იარსება გარკვეული ხანი, ამასთან საკმაოდ მნიშვნელოვანიც იყო სამეფო კარზე. ჩვენ არ ვიცით როგორ ხდებოდა ამ სახელოს გადაცემა, რა ინსიგნიებს ატარებდა ამ დროს, ან ვინ მონაწილეობდნენ ამ ცერემონიაში. შემდეგ პერიოდში კი ათაბაგს შეეძლო სხვა თანამდებობაც ჰქონოდა პარალელურად.

ასევე აღვნიშნეთ, რომ სამეფო კარზე და ვაზირებს შორის პირველი იყო მნიგნობართუხუცესი. დავით აღმაშენებლის მეფობის დროს ამ სახელოს დაემატა ჭყონდიდელობა. როგორც ივ. ჯავახიშვილი ვარაუდობს, მნიგნობართუხუცესობისა და ჭყონდიდელობის შეერთება 1103–1110 წლებს შორის უნდა მომხდარყო.<sup>68</sup> ამის შემდეგ მნიგნობართუხუცეს–ჭყონდიდელობა ერთი „სახელო“ უნდა ყოფილიყო, ასევე მნიგნობართუხუცესი თუ იქამდე საერო პირი იყო ამის შემდეგ კი სასულიერო უნდა ყოფილიყო. პირველ მნიგნობართუხუცეს–ჭყონდიდელს გიორგი ერქვა სახელად და მას დავითის ისტორიკოსი შემდეგნაირად ახასიათებს: *„კაცი სრული ყოვლითა სიკეთითა სულისა და ჭოროცთაჲთა, სავსე სიბრძნითა და გონებითა, განმზრახი სვანი და ფრთხილი ...თანა–განმკაფელი ყოველთა გზათა და საქმეთა და ღუანლთა...“*.<sup>69</sup> მნიგნობართუხუცესი ყოფილა მეფესთან დაახლოებული პირი, რომელიც ვალდებული იყო მეფეს გვერდში დადგომოდა. ამ ყველაფერს ემატება ისიც, რომ მნიგნობართუხუცესს ემორჩილებოდა 26 მნიგნობარი, რომლებიც სასახლის კარზე

<sup>66</sup> ივ. ჯავახიშვილი. თხზულებები თორმეტ ტომად. ტ. VI, გვ. 311.

<sup>67</sup> ისტორიანი და აზმანი შარავანდეღთან. გამოსცა გ. კარტოზიამ, გვ. 477–478.

<sup>68</sup> ივ. ჯავახიშვილი. თხზულებები თორმეტ ტომად. ტ. VI, გვ. 272.

<sup>69</sup> ცხოვრებაჲ მეფეთ–მეფისა დავითისი. გამოსცა მზ. შანიძემ, გვ. 320.

მსახურობდნენ. ის ამირსპასალარზე და მანდატურთუხუცესზეც წინ იდგა და მეტი უფლებებით სარგებლობდა. აქედან გამომდინარე შეგვიძლია გამოვთქვათ მოსაზრება, რომ ამ მნიშვნელოვან თანამდებობაზე დანიშვნა გარკვეული რეგლამენტით განწერილი ცერემონიით უნდა მომხდარიყო, ყველა მის ხელქვეითს სცოდნოდა და ელიარებინა ის. სამწუხაროდ ჩვენ არ გვაქვს ზუსტი ცნობები ამ ცერემონიასთან დაკავშირებით, მაგრამ ქვეყნის ფაქტობრივად მეორე პირის დანიშვნა რომ უბრალოდ და მარტივად არ მოხდებოდა ეს საკითხი საკამათო არ უნდა იყოს. ამასთან გასათვალისწინებელია ის ფაქტიც, რომ მწიგნობართუხუცესი ჭყონდიდელიც იყო და მისი კურთხევა თუ არა და დანიშვნის ცერემონიაში მონაწილეობა სასულიერო პირებსაც უნდა მიეღოთ.

მოცემულ თავში ჩვენ განვიხილეთ ის წერილობითი წყაროები, სადაც საუბარი იყო მოხელეების დანიშვნის შესახებ. აღსანიშნავია, რომ სხვადასხვა პერიოდში განსხვავებულ ცერემონიებს ატარებდნენ. ჩვენ ქრონოლოგიურად მივყევით და განვიხილეთ ერისთავების კურთხევიდან დაწყებული ვაზირებით და მთავრებით დამთავრებელი სახელმწიფო მოხელეების დანიშვნის ცერემონიები. აღსანიშნავია, რომ განსხვავებული იყო საქვეყნოდ გამრიგე და სამეფო კარზე მომსახურე დიდებულების უფლება-მოვალეობანი და, შესაბამისად, მათი დანიშვნის ცერემონიებიც.

## თავი V

### მეფის ცერემონიალური სამოსი

საქართველო ფეოდალური სახელმწიფო იყო საუკუნეების მანძილზე თავისი დიფერენცირებული სოციალური კლასებით. სხვადასხვა წოდების წარმომადგენელს ჰქონდა თავისი უფლება-მოვალეობა, მკაცრად იყო რეგლამენტირებული მათი ცხოვრების პირობები. ბევრ სხვა ნიშანთან ერთად სოციალურ კუთვნილებას ხაზს უსვამდა სამოსი, რომელიც განსხვავდებოდა სხვადასხვა სოციალური ფენის მიხედვით. ყველაზე განსხვავებული და ძვირფასი სამოსი მეფეს უნდა სცმოდა. მისი სამოსი მკვეთრად განსხვავდებოდა დიდებულებისა და უბრალო ადამიანების სამოსისგან. უფრო მეტიც, როდესაც მეფე რომელიმე ცერემონიაზე იმყოფებოდა ის შესაბამისად უნდა ყოფილიყო შემოსილი. ისტორიულ წყაროებში და ფრესკებზე შემორჩენილია მასალა, რომელიც ნათლად აღწერს სამოსის იმ ტიპს, რომლითაც მონარქი იყო შემოსილი.

რა თქმა უნდა, მეფის ცერემონიული სამოსი ეპოქებისა და პოლიტიკური კონიუნქტურის მიხედვით იცვლებოდა. აღსანიშნავია, რომ მეფეთა სამოსი გაბატონებული პოლიტიკულურის შესაბამისი უნდა ყოფილიყო. ჩვენ ზემოთ უკვე განვიხილეთ მეფედ კურთხევის ცერემონია, სადაც აღნიშნული იყო მეფის ცერემონიული სამოსის შესახებ. კერძოდ ვკითხულობთ: „ და ვითა მიიწინენ პალატსა შენა და დადვან ფეშხუმსა ზედა გვრგვნი, სკიპტრა, პორფირი და ბისონი...“<sup>70</sup> პორფირი და ბისონი იყო ის სამეფო სამოსი, რომლითაც მეფე იმოსებოდა კურთხევის

<sup>70</sup> ქართული სამართლის ძეგლები. ტ. II, გვ. 50.

ცერემონიის დროს. საინტერესოა აღნიშნული სამოსი ტრადიციული ქართული იყო თუ სხვა ქვეყნის გავლენით შემოსული სამეფო კარზე. X–XI საუკუნეებში, როდესაც ჩამოყალიბდა ერთიანი ქართული მონარქია მეფეთა სამოსზე და ზოგადად ქართულ კულტურაზე დიდი გავლენა მოახდინა ბიზანტიურმა კულტურამ. ამ პერიოდში ბიზანტიური კულტურა დახვეწილი და ძლიერი იყო. ქართველი მეფეები ბიზანტიურ სამეფო ტიტულებთან ერთად საჩუქრად იღებდნენ სამოსს, როგორც ერთ–ერთი ინსიგნიის შემადგენელ ნაწილს, რომელიც შემდეგ უკვე თანთდათან ხდებოდა მეფის ცერემონიალური სამოსი. ასე, რომ მგავსება ბიზანტიელ იმპერატორთა და ქართველ მეფეთა სამოსს შორის გასაკვირი არ არის.

განვიხილოთ ამ პერიოდის ფრესკები, სადაც ქართველი მონარქები არიან გამოსახული სამეფო ცერემონიულ სამოსში. საინტერესოა გელათის ფრესკები, რომლის მიხედვით იმერეთის მეფე ბაგრატ III (1510-1565) და თავისი ვაჟი, გიორგი II (1565-1585) და, ასევე, საქართველოს მეფე დავით IV აღმაშენებელი (1089–1125) შემოსილნი არიან ტერფამდე გრძელი და წელში განწყობილი ბისონებით, რომელთა კალთისძირები ფართო, ფიგურირანი არშიითაა შემოვლებული. სახელოები მაჯებთან ოქროჭედილი ყოშებით აქვთ მოჭერილი. სამივეს ამკობს სპეკალებით მოთენილი, ოქროჭედილი მანიაკი და „ლორო“ (ლორო ეწოდება განიერ არშიას, რომელიც მეფისა და დედოფლის სამოსელზე ცალი ბოლოთი წინ იყო ჩამოთენილი, ხოლო მეორე ბოლოთი გადაგდებული იყო მარცხენა მკლავზე). გიორგისა და დავითის ტუნიკები მწვანე ფერისაა, სახიანი, ხოლო ბაგრატის კი შინდისფერი. სამკლავე კი მხოლოდ დავით მეფეს აქვს.<sup>71</sup> ქართველი მონარქების და ბიზანტიელი იმპერატორების სამოსის მსგავსევას ეხმაურება ანტონი ისტმონდი თავის წიგნში „Royal Imagery in Medieval Georgia“, სადაც იგი ეხება მეფე დავითის ერთ–ერთ მონეტას, რომელიც ბრიტანეთის მუზეუმშია დაცული და აღნიშნავს, რომ მონეტა მეფეს, როგორც ნამდვილ

---

<sup>71</sup> ი. ციციშვილი. მასალები ქართული ჩაცმულობის ისტორიისთვის. თბ. 1954, გვ. 87.

ბიზანტიელ მმართველს ისე წარმოადგენს. მას ლორო აცვია, აქვს კვერთხი და, ასევე, გვირგვინს ჯვარი ამშვენებს. ავტორი თვლის, რომ დავითი ამ მონეტაზე მთელი თავისი დიდიებითაა წარმოდგენილი.<sup>72</sup>

როგორც ვხედავთ მეფეების სამეფო სამოსი ერთი სტილისაა და მხოლოდ პატარა დეტალებით განსხვავდება, ის მკაცრად რეგლამენტირებულია და მისი მნიშვნელობა საკმაოდ დიდია. რაც შეეხება თამარ მეფის სამეფო სამოსს, ის არაფრით განსხვავდება მამაკაცი მონარქების სამოსისგან. თამარ მეფე ვარძიის ფრესკაზე იისფერი ბისონით არის შემოსილი, რომელიც მორთულია მარგალიტის ზოლებით, ზოლების კვეთა წარმოქმნის რომბებს.

XIII საუკუნის მეორე ნახევრიდან საქართველოს მძიმე პერიოდი დაუდგა, რომელიც საკმაოდ დიდი ხნის განმავლობაში გაგრძელდა. ქვეყნის შიდა პოლიტიკურ კრიზისს დაემატა მონღოლური, შემდეგ ყიზილბაშურ-ოსმალური დაპყრობები. ბიზანტიის იმპერია ჩვენი ქვეყნისთვის იყო ერთ-ერთი მნიშვნელოვანი მაღალი კულტურის მქონე მეზობელი იყო, მისი დაცემა კი ქართულ პოლიტიკურ და კულტურულ ცხოვრებაზე ნეგატიურად აისახა. ჯერ მონღოლ-თათრები ცდილობდნენ თავიანთი წეს-ჩვეულებების დანერგვას ჩვენს ქვეყანაში, რაც გარკვეული დობით მოხდა კიდევ. თავისთავად ხდებოდა სხვადასხვა სიახლის შეტანა უკვე არსებულ ტრადიციებში. ადრე თუ ბიზანტიის იმპერატორის მიერ გამოგზავნილი ითვლებოდა საპატიოდ, ახლა უკვე ის სპარსულმა ჩაანაცვლა. შაჰის ან სულთნის გამოგზავნილი სამოსი ისეთივე მნიშვნელოვანი გახდა, როგორც წინათ იმპერატორის მიერ გამოგზავნილი ინვესტიტურა. სხვადასხვა ცერემონიებზეც სწორედ აღმოსავლური სტილის სამოსით წარდგებოდა მეფე, რადგან ახლა სხვა მოთხოვნები განსაზღვრავდა მის ჩაცმულობას.

საინტერესო ცნობებია დაცული რუსი ელჩის ტოლოჩანოვის ჩანაწერში, ის

---

<sup>72</sup> A. Eastmond. Royal Imagery in Medieval Georgia, გვ. 56.

იმერეთის მეფე ალექსანდრესთან სტუმრობას მუხლობრივად აღწერს. დეტალურადაა აღწერილი როგორ დახვდა მას მეფე, რაც ნათელ მაგალითს წარმოადგენს თუ რა ხდებოდა XVII საუკუნის მეორე ნახევრის იმერეთის სამეფო კარზე. ვკითხულობთ: „როცა მეფის წინაშე წარვდექით იგი ხალიჩაზე ხეფმორთხმული იჯდა, მას ხალიჩაზე დაფენილი ჰქონდა ფეხქვეშ გასაშლელი, ხოლო უკან ზურვის მხარეს, ხვერდზე მოქარგული ბალიში, ბალიშზე ზემოთ თეთრ ფონზე მოქარგული საჩრდილობელი. ალექსანდრე მეფეს თავზე კოშკური კუთხედებიანი გვირგვინი ედგა მარგალიტით და თვლებით განწყობილი. გვირგვინს შუაზე ოქროს ჯვარი ჰქონდა აღმასებით, იაგუნდებით და ზურმუხტებით შემკული. ხელში მოოქრული და თვლებით განწყობილი კვერთხი ეპყრა, ხოლო სფეროზე წმ. სახე იყო ამოჭრილი. ტანთ სისამურის ქათიბი ეცვა ოქრომკვერდით ხვერდზე განწყობილი და ფარჩის კაბა ოქრომკვერდით მოქარგული, ქათიბის გარშემო ოქროს ბაფთა ჰქონდა შემოვლებული. . . . როცა საჭმელების მოტანა და დალაგება დაიწყო, ალექსანდრე მეფემ გვირგვინი მოიხადა და იქვე მოიტანეს ვერცხლის დაბალფეხებიანი შავი ხვერდით განწყობილი გვირგვინის დასადგამი, ხვერდს ოქრო ჰქონდა გარს შემოვლებული და ამაზე დადეს გვირგვინი, იქვე სკიპტრაც დადეს მეფის წინ. ალექსანდრე მეფეს შავი ხვერდის ქუდი მოუტანეს, რომელიც მარგალიტით და ძვირფასი ქვებით იყო ჯვარედინად განწყობილი . . . ხოლო მეფე ყიზილბაშურად უმაგიდოდ მიირთმევდა. მის წინ მოქეიფენი მუხლებზე იდგნენ. საჭმელებს მეფეს, სასულიერო პირებს, ელჩებს და აზნაურებს სუფარაჯები მოართმევდნენ, ეს უკანასკნელნი თურქულ ოქროს და ვერცხლის ფერად მოსირმულ ჩოხებში, ხვერდისა და ატლასის ტანსაცმელებში იყვნენ გამოწყობილნი. აზნაურებიც ასეთსავე სამოსში გამოწყობინი ისხდნენ“.<sup>73</sup> მოტანილი ციტატა ნათლად აღწერს იმ პოლიტიკურ მდგომარეობას, რაც ამ პერიოდში იყო. მეფე წესისამებრ გამოწყობილი ცერემონიალურ სამოსში, მისი ჯდომის თუ სამყოფლის აღწერა მიგვანიშნებს

<sup>73</sup> ტოლოჩანოვის იმერეთში ელჩობის მუხლობრივი აღწერილობა (1650–1652 წწ.). გამოსცა ი. ცინცაძემ. თბ. 1970, გვ. 98–100.

სპარსული სტილის გავლენაზე, ეს აღარაა ლოროსში გამოწყობილი მეფე, მაგრამ მისი ძვირფასი სამოსი მის უზენაესობას უსვავს ხაზს. მეფის ასეთი დახვედრა და მომზადება მიგვანიშნებს, რომ მისთვის ეს აუდიენცია საკმაოდ მნიშვნელოვანია. როგორც ელჩი შენიშნავს, მას ცერემონიის დროს სხვა, უფრო ძვირფასი გვირგვინი ედგა თავზე და შემდეგ პურობის დროს შეუცვალეს სხვა გვირგვინით. ასევე მეფის სამოსში ხაზი აქვს გასმული იმას, რომ ის მაინც ქრისტიანი მონარქია და ჯვრები ამშვენებს მის სამოსსა თუ სხვა სამეფო ინსიგნიებს. ეს თვითონ ელჩებისთვისაც უნდა ყოფილყო მინიშნება, რომ ერთი სარწმუნოება უნდა გამხდარიყო ამ ორ ქვეყანას შორის ურთიერთობის განმტკიცების გარანტი.

შემდეგ მნიშვნელოვანი ცნობები, რომელიც თრანგ მოგზაურ, უან შარდენს აქვს შეეხება ვახტანგ V–თან აუდიენციას. მიუხედავად იმისა, რომ მოგზაური მეფის სამოსის დეტალურ აღწერილობას არ გვაძლევს მისი ცნობები კვლავ მიუთითებს იმ სპარსულ გავლენაზე, რომელზეც საუბრობდა რუსი ელჩი ტოლოჩანოვი. განსხვავება ის არის, რომ ვახტანგ V, ანუ შაჰნავაზ–ხანი შაჰის კარზე გაზრდილი იყო და მეტად ჰქონდა შეთვისებული მაჰმადიანური რჯული და ზნე-ჩვეულებები. შარდენი აღნიშნავს: „*შაჰნავაზ–ხანი მოითხოვს მასთან პირველად მიახლოებისას ისეთივე წესით მიესალმონ, როგორც სპარსეთის ხელმწიფეს: მისგან ორი თუ სამი ნაბიჯის დაშორებით მუხლს იდრეკენ და გედიზედ სამჯერ თავსა ხრიან მიწაზე*“.<sup>74</sup> შემდეგ ის ესწრება ნადიმებს და თურქულიჭურჭლის სიუხვე აკვირვებს. საინტერესო სურათია ქრისტიანული ქვეყნის კულტურის და მაჰმადიანურის გავლენის.

1745 წლამდე მეფეებისთვის ცერემონიალურ სამოსად შეიძლება მხოლოდ ელჩობებზე გამოყენებული სამოსის ჩაითვალოს, რადგან გარკვეული პერიოდის განმავლობაში არ ხდებოდა მეფედ კურთხევა. ამის შემდეგ კი კვლავ ვხედავთ პაპუნა ორბელიანთან მეფედ კურთხევის ცერემონიის დროს რა ინსიგნიები უნდა

<sup>74</sup> ქართული დიპლომატიის ისტორია (ქრესტომათია). რედაქტორი რ. მეტრეველი. თბ. 2004, გვ. 337–338.

გამოეყენებინათ. ვკითხულობთ: „მოიტანეს სამეფო შესამოსელი, პორფირი, ბისონი და დიადემა ბოხჩებით, აგრეთვე გვირგვინი, წმალი, სკიპტრა და ქვეყნისა სფეროი“.<sup>75</sup> როგორც ვხედავთ ერთგვარი შემობრუნებაა იმ ძველი ტრადიციების და ცერემონიალური სამოსის მიმართ, რომელიც საუკუნეების მანძილზე ქართველი მეფეებისთვის შეუცვლელი იყო. ერთმორწმუნე რუსეთის იმპერიის საერთაშორისო ასპარეზზე გამოსვლამ და ქართულ პოლიტიკურ ერთეულებთან ურთიერთობამ კვლავ წინ წამოსწია ქრისტიანული წეს-ჩვეულებები.

გვიანი შუა საუკუნეების დასასრულს გარდამავალი პერიოდი, სპარსულ-თურქელის გავლენა სუსტდება და წინ წამოიწევეს კვლავ ქრისტიანული და ძველი ქართული ტრადიციები თავისი ცერემონიებით. მეფის ცერემონიალური სამოსი იცვლებოდა იმის მიხედვით თუ როგორი იყო პოლიტიკური მდგომარეობა, რა მოთხოვნილებები იყო საერთაშორისო ასპარეზზე. მეფის ცერემონიალური სამოსი ნებისმიერ შემთხვევაში იყო განსხვავებული, ძვირფასი და მნიშვნელოვანი, ის ყოველთვის ერთ-ერთი ინსიგნიის ფუნქციას ასრულებდა. მეფის ცერემონილური სამოსის შემადგენელი ნაწილები, თვითონ სამოსის დასამზადებელი მასალა, მისი სტილი და სხვა. მიაწინებდა იმ პოლიტიკურ და კულტურულ მდგომარეობაზე, რომელიც იყო იმ პერიოდის საქართველოში.

---

<sup>75</sup> პაპუნა ორბელიანი. ამბავნი ქართლისანი. გამოსცა ე. ცაგარეიშვილმა, გვ. 103.

## თავი VI

### უცხოელი სტუმრის მიღება

უცხოელი სტუმრის მიღებას საქართველოში დიდი ისტორია აქვს. ჩვენი ქვეყანა ყოველთვის გამოირჩეოდა სტუმართმოყვარეობით, უცხოელი სტუმრის ღირსეულად მიღება და გამასპინძლება საუკუნეების მანძილზე უცვლელ ტრადიციად რჩებოდა. სამეფო კარზე უამრავ დიდმოხელის გვერდით იყო სპეციალური მოხელე მესტუმრე, რომელიც მანდატურთუხუცესის უწყებაში იყო შესული და მას ევალებოდა სტუმრის მიღება-გაცილება, უცხოელი ელჩებისა და დიპლომატიური მისიების მიღება, ასევე, მათზე ზრუნვა. ტერმინ მესტუმრეს მოხსენიება ხშირია XIV-XVI საუკუნეების საბუთებში. რაც შეეხება მეფე როსტომის პერიოდს ქართული მესტუმრე ტერმინოლოგიურად სპარსული მეჰმანდართ შეიცვალა, მაგრამ ეს იყო მხოლოდ ტერმინოლოგიური

ცვლილება, რადგან ამ თანამდებობას ფუნქციური ცვლილება არ განუცდია. XVII-XVIII საუკუნეების აღმოსავლეთ საქართველოს ისტორიულ საბუთებში ორივე ტერმინი გვხვდება. ნათელია, რომ საუკუნეების განმავლობაში იყო საჭიროება სამეფო კარზე ყოფილიყო მესტუმრეს თანამდებობა. აღსანიშნავია, რომ ქვეყნის გაძლიერება განვითარებასთან ერთად იცვლებოდა სხვადასხვა მეზობელ ქვეყნებთან ურთიერთობა, ხშირად აუცილებელი იყო ჩვენი ქვეყნიდან ელჩების გაგზავნა და, ასევე, სხვა ქვეყნის წარმომადგენლის მიღებაც. იმის მიხედვით თუ ვინ ესტუმრებოდა სამეფო კარს წინასწარ მოფიქრებული და დადგენილი წესების შესაბამისად ხვდებოდნენ. როგორ დახვედრას მოუწყობდნენ და როგორ გაუმასპინძლებოდნენ სტუმარს დამოკიდებული იყო სტუმრის სოციალურ სტატუსზე და იმაზე ვისგან, ან რა მისიით იყო მოვლენილი სამეფო კარზე. რაც უფრო მაღალი სოციალური ფენიდან იყო სტუმარი, მით უფრო მეტი პატივით უნდა მიეღოთ. ეს ყველაფერი კი მეფის ბრძანების საფუძველზე ხდებოდა.

საქართველოს ისტორიაში მნიშვნელოვანი პერიოდი იყო XI-XII საუკუნეები, როდესაც გაერთიანებული მონარქიის პირობებში ქვეყნის განვითარებამ უფრო მასშტაბური ხასიათი მიიღო. საქართველო ამიერკავკასიაში ერთ-ერთ უძლიერეს ქვეყნად მოიაზრებოდა, შესაბამისად, გაჩნდა მოთხოვნა დიპლომატიური ურთიერთობების უფრო მეტად წინ წამოწევის და დახვეწის. რა თქმა უნდა, შუა საუკუნეების საქართველოში უცხოელ სტუმარში მოაზრებოდა „დესპანი“, რომელსაც სხვადასხვა ქვეყანა გზავნიდა განსაზღვრული მისიით. საქართველოს სამეფო კარი იღებდა და აგზავნიდა ელჩებს, ეს ქვეყნის განვითარების კიდევ ერთი მაჩვენებელი იყო. თავდაპირველად საქართველოს დიპლომატიურ ურთიერთობებს „მოციქული“, ანუ „დესპანი“ ახორციელებდა. სიტყვა „ელჩი“ კი XIII საუკუნიდან ჩნდება, აღსანიშნავია რომ დიპლომატიური წარმომადგენელი შეიძლება ყოფილიყო როგორც საერო, ასევე სასულიერო პირი. მოციქული, ანუ დესპანი, მაღალ წოდებას ეკუთვნოდა, ასევე,

სასურველი იყო შესაბამისი განათლება და გამოცდილებაც ჰქონოდა. ძველ ქართულში ელჩის გაგზავნას „მივლენა“ ან „ნარვლენა“ ეწოდებოდა.<sup>76</sup>

ქვეყნის გასვლამ საერთაშორისო ასპარეზზე წინ წამოსწია დიპლომატიური პროტოკოლის აუცილებლობა. ამიტომ XI-XII საუკუნეებში ელჩების მიღების ცერემონიამ უფრო სრულყოფილი სახე მიიღო. რაც უფრო მაღალი რანგის სტუმარი ეწვეოდა ქვეყანას მით უფრო რთული ცერემონიალით ხვდებოდნენ მას. ამ პერიოდში მიღებული იყო უცხო ქვეყნიდან მოვლენილი სტუმრის ანუ ელჩის შეგებება, რაც გამოიხატებოდა იმაში, რომ სტუმარს გზაში ეგებებოდნენ და მიჰყავდათ სამეფო კარზე. სამეფო კარის დადგენილების მიხედვით სტუმრებს ბინით და კვებით უზრუნველყოფდნენ. იმართებოდა მეფესთან აუდიენცია, რასაც მოჰყვებოდა „პურობა“, ანუ „ნადიმი“. საქართველოში მოსულ ელჩს თუ სტუმარს დაასაჩუქრებდნენ და ისე აგზავნიდნენ თავის ქვეყანაში.

იმის მიხედვით თუ ვინ იყო ქვეყანაში ჩამოსული უცხო სტუმარს მეფე საერო და სასულიერო პირთა თანხლებით ხვდებოდა. სტუმრის დასაჯდომი ადგილიც კი მიგვანიშნებდა რამდენად მნიშვნელოვანი და პატივსაცემი სტუმარი იყო მობძანებული. მაგალითად, „ისტორიანი და აზმანი შარავანდედთანში“ საინტერესოაა აღწერილი გიორგი III-ის დროს ანდრონიკე კომნენოსის სტუმრობა სამეფო კარზე. თხზულებაში ვკითხულობთ: *„მოვიდა ოდესმე ანდრონიკე კომნიანოსი ცოლითა სახებრწყინვალითადა შუენიერიითა, თანა შვილებითურთ და დისწულითა, მამის ძმისწული დიდისა მანოველ კეისრისა და ყოვლისა დასავლეთისა და საბერძნეთისა მეფისა. და ვითარ მართებდა, ეგრეთ მადლობელმან ღმრთისამან შეინწყნარა და მისცა პატივი შესატყვისი სახლისშვილობისა მისისა. და მიმცემელმან ქალაქთა და ციხეთამან კმასაყოფელთამან დაუდგნა საჯდომელნი სიახლესა საყდრისა თვისისასა, პირისპირ მამის დისწულისა მისისა აღსართანისა, რომელი იყო შირვანისა ზღუსპირისა*

---

<sup>76</sup> ქართული დიპლომატიის ისტორია. მთ. რედ. რ. მეტრეველი. თბ. 2003, გვ. 243.

დარუბანდით ხირხალამდის, რომელი მეფესა უჩნდა ვითარცა შვილი და ვითარცა ერთი დიდებულთა მისთავანი“. <sup>77</sup> როგორც ვხედავთ, სტუმრის სტატუსის გათვალისწინებით მისთვის ადგილი მეფის სიახლოვეს მიუჩენიათ. ასეთი ვითომ ელემენტარულ დეტალებზე დაყრდნობით შესაძლებელი ხდებოდა იმის დადგენა თუ რამდენად მნიშვნელოვანი იყო ჩვენი ქვეყნისთვის ამა თუ იმ სახელმწიფოს წარმოადგენლის სტუმრობა.

აღსანიშნავია კიდევ ერთი მნიშვნელოვანი მომენტი, საქართველოში მოვლენილი ელჩი თუ სტუმარი გარკვეული პრივილეგიებით და იმუნიტეტით სარგებლობდა. არავის ჰქონდა უფლება მათთვის შეურაწყობა მიეყენებინა, მითუმეტეს ფიზიკური ძალადობა გამოერიცხული იყო. ერთი განსხვავებული შემთხვევა კი რუმის სულთნის, რუქნადინის ელჩის ვიზიტია თამარ მეფის კარზე. რუმის სასულთნოს ელჩმა შესარულა თავისი მისია და წერილთან ერთად მეფეს რუქნადინის პირადი დანაბარები გადასცა, რომელიც მეფისთვის შეურაწყობველი იყო. ზაქარია ამირსპასალარის ქმედება და სიტყვები ისტორიკოსს საგანგებოდ აქვს ჩანიშნული. ტექსტში ვკითხულობთ: „... ვითარ ამპარტავნად იტყოდა სიტყუათა ამათ, წარმოდგა ზაქარია ამირსპასალარი და უხეთქნა ჴელითა პირისა და ვითარცა მკუდარი დაეცა და იღვა. ვითარ ამიდეს და ამართეს და ცნობად მოვიდა, რქუა ზაქარია:“თუ მოციქული არა იყავ, პირველად ენისა აღმოკუეთა იყო შენი სამართალი და მერელა – თავისა, კადნიერად კადნიერებისათვის“. ამის შემდეგ კი წესი არ დაურღვევიათ და „შემოსეს და ნიჭი უბოძეს, წარგზავნეს პასუხითა მწუავითა“.<sup>78</sup> ეს იყო ერთადერთი შემთხვევა, როდესაც ელჩის პრივილეგია და იმუნიტეტი დაირღვა, მაგრამ ასეთი ინციდენტიც პირველი იყო სამეფო კარზე, რადგან მეფისთვის შეურაწყობის მიყენება წარმოუდგენილი იყო. მიუხედავად ყველაფრისა, წესი არ დაურღვევიათ და რუქნადინის ელჩი დასაჩუქრებული გაუგზავნიათ. რაც იმის მანიშნებელია, რომ ქართულ ტრადიციებს

<sup>77</sup> ისტორიანი და აზმანი შარავანდეთანი. გამოსცა გ. კარტოზიამ, გვ. 392–393.

<sup>78</sup> ისტორიანი და აზმანი შარავანდედთანი, გვ. 463–464.

დიდ პატივს სცემდნენ.

ამის შემდეგ პერიოდში მონღოლების გაბატონებას მოჰყვა პოლიტიკური და კულტურული წნეხი, შესაბამისად, ჩვენი ქვეყნის პოლიტიკურსა თუ კულტურულ ცხოვრებაშიც ამ ყველაფერმა თავისი გამოძახილი ჰპოვა. თავდაპირველად უნდა აღინიშნოს, რომ ქართულ სამეფო კარზე უცხოელი სტუმრის მიღება ხდებოდა იმის გათვალისწინებით თუ რა კულტურის სტუმარი იყო მოსული. მასპინძლები ცდილობდნენ სტუმარი ისე მიეღოთ, როგორც წესი და ტრადიცი მოითხოვდა, მაგრამ მაინც უნდა ყოფილიყო გათვალისწინებული ის ნიუანსები თუ როგორ ხვდებოდნენ სტუმრებს ანუ ელჩებს თვითონ იმ ქვეყანაში. ამიტომ მონღოლებთან ურთიერთობამ გამოიწვია სტუმრის მიღების ცერემონიაში გარკვეული ცვლილებები, მაგრამ ძირითადი ნაწილი მაინც იგივე რჩებოდა. საკმაოდ ხშირად ხდებოდა მონღოლთა მხრიდან ელჩების გამოგზავნა, შესაბამისად უცხოელი სტუმრის მიღების ცერემონიაში დამკვიდრდა მონღოლური ელემენტები. ინტენსიურმა ულჩობებმა გამოიწვიეს იმის აუცილებლობა, რომ XIII საუკუნეში მონღოლი ელჩის საჭიროებისთვის დაწესებულიყო ულაცისა და ულუფას გადასახადი.

XIII-XV საუკუნეების განმავლობაში უცვლელად რჩებოდა ის პრინციპები, რომლებიც საფუძვლად ედო უცხოელი სტუმრის მიღებას. უცხო სახელწიფოდან მოვლენილ სტუმრებს, ანუ ელჩებს კვლავ ენიჭებოდათ გარკვეული პრივილეგიები და იმუნიტეტი. მათ უსაფრთხოდ უნდა შეესრულებინათ დაკისრებული მოვალეობა. მათ საპატიო დახვედრას უწყობდნენ, უმართავდნენ ფარულ და ღია მოლაპარაკებებს, უზრუნველყოფდნენ ბინითა და კვებით, ბოლოს კი დასაჩუქრებულებს გაცილებას უწყობდნენ. ასეთი იყო უცხოელი სტუმრის მიღების ცერემონიალი ამ პერიოდში. მაგრამ ისიც უნდა აღინიშნოს, რომ XIV საუკუნის მეორე ნახევასა და XV საუკუნის განმავლობაში ქვეყანაში სერიოზული კრიზისი იყო, დაშლის გზაზე მყოფი ქვეყნისთვის უცხოელი სტუმრების მიღების ცერემონია ხშირად ყველა წესის დაცვით ვეღარ

ხდებოდა. მიუხედავად ამისა ამ პერიოდში დიპლომატიურმა მისიებმა დიდი როლი შეასრულა ქართულ პოლიტიკურ ცხოვრებაში.

ერთიანი მონარქიის პირობებში ჩამოყალიბებული და მიღებული უცხოელი სტუმრის მიღების ცერემონია დაედო საფუძვლად სამეფო-სამთავროებად დაშლის შემდეგ წარმოქმნილ პოლიტიკურ ერთეულებს. ქართლის, კახეთისა და იმერეთის სამეფო კარზე თითქოს ორიგინალური უცხოელი სტუმრის მიღების ცერემონია უნდა ჩამოყალიბებულიყო, მაგრამ რადიკალურად განსხვავებული ნამდვილად არა. XVI-XVII საუკუნეებში, რა თქმა უნდა, მეფე იყო მთავარი გადანყვეტილებების მიმღები, მაგრამ უცხოელი სტუმრის მიღებაში აქტიურად მონაწილეობდნენ სამეფო დარბაზი და მეფის პირადი სამდივნო. აღსანიშნავია, რომ მდივნებს სპეციალური განათლება და ენების ცოდნა მოეთხოვებოდათ, საჭიროების შემთხვევაში მათ თარჯიმნის ფუნქცია უნდა შეეთავსებინათ.

XVII საუკუნის უცხოელი სტუმრის მიღების ცერემონილი შეგვიძლია განვიხილოთ კერძო მაგალითის საფუძველზე. რუსეთის ელჩები ნიკიფორე ტოლოჩანოვი და ალექსი იევლევი იმერეთში მეფე ალექსანდრე მესამესთან მოლაპარაკებებს აწარმოებენ. ამ ყველაფერს კი სრული სიზუსტით აღწერენ. კერძოდ ვკითხულობთ: *„იენისის 20, ჩვენ ელჩები ნიკიფორე ტოლოჩანოვი და მდივანი ალექსი იევლევი, რაჭის ციხე ქალაქიდან გავემგზავრეთ, ...და როდესაც ელჩებმა ქუთაისის ციხის მახლობლად მივალნიეთ ... მთაზე კარვები დაგვხვდა ... აქ ვიდევით ელჩები ორი დღე-ღამე. ამ კარვებიდან, მეფის ბრძანებით ჩვენმა მეურვეებმა გარეუბნის სახლებში გადაგვიყვანეს. იენისის 24 ალექსანდრე მეფემ თავისი მდივანი ფეშანგი „ამირევი“ გამოგვიგზავნა და გვიბრძანა მას საელჩო საქმებზე მოსალაპარაკებლად ვხლებოდით“.*<sup>79</sup>

მოლაპარაკებების გამათვის შემდეგ აღნიშნავენ რომ მათ მეფე ალექსანდრეს

---

<sup>79</sup> ტოლოჩანოვის იმერეთში ელჩობის მუხლობრივი აღწერილობა, გვ. 94.

საჩურები გადასცეს, მეფემ მადლობა გადაუხადა და უთხრა, რომ თვითონ აპირებდა მათ დასაჩურებას. შემდეგ კი: „როცა ელჩების ცერემონიალს მოვრჩით, კარვებიდან გამოვედით, მაგრამ ბინაზე არ გაგვიშვა, ერთ შემალლებულ ადგილზე საჩრდილობელში გაგვგზავნა, გვიბრძანა ცოტა დაგვეცადა იქ და მაშინვე სუფრაზე მიწვევა გვაუნცა ... სუფრაზე მისანვევად აზნაურები და სასულიერო პირები გამოგვიგზავნა მეფემ და, როდესაც მეფის წინაშე წარვსდექით, თვით მეფემ მიგვითითა დასაჯდომ ადგილზე. იწყეს სუფრის გაშლა და პურის ნაცვლად თხლად გამომცხვარი ლავაშები „ხმიალები“ დააწყვეს სუფრაზე ... ხოლო მეფე ყიზილბაშურად უმაგიდოდ მიირთმევდა. მის წინაშე მერიქიფენი მუხლებზე იდგნენ. საჭმელებს მეფეს, სასულიერო პირებს, ელჩებს და აზნაურებს სუფრაჯები მოართმევდნენ ... ამის შემდეგ ჯერ ხილულობა მოიტანეს, ჯერ მეფეს მოართვეს, შემდეგ სასულიერო პირებს, ელჩებს ნიკიტორეს და ალექსის და შემდეგ აზნაურებს ... როდესაც ალექსანდრე მეფისაგან წავედით ელჩებს ბინამდე სანათურებით და ჭრაქებით წინ მიგვიძლოდნენ, ხოლო მოგვაცილებდნენ მეფის მახლობელი პირები“.<sup>80</sup>

შემდეგ აღწერილია რამდენიმე აუდიენცია მეფესთან, რომლებზეც დიდი პატივით იღებდნენ უცხოელ სტუმრებს და როგორ უმასპინძლდებოდნენ. ბოლოს კი ყურადღებას გავამახვილებთ ფინალზე. ელჩობის ჩანაწერებში ვკითხულობთ: „ოქტომბრის 10 ალექსანდრე მეფემ თავისი სულიერი მოძღვარი ზაქარია მიტროპოლიტი, ფეშანგ მდივანი, აზნაურები, მეურვენი, რომელნიც ჩვენზე, ელჩებზე იყვნენ მომავრებლნი, ზაქარია და სეხნია გამოგზავნა. ამასთან ერთად ურმებში გაბმული ცხენებიც ელჩებისა და ხელმწიფის ხალხისთვის, და ურმები ბარგისთვის გამოვეგზავნა. გამცილებლად ზაქარია იყო ქუთაისიდან, ლომკაცის ბინამდე. ლომკაცთან ჩვენ მამუკა და იური „კანშოვი“ შეგვხვდებოდნენ, მათთან კი ქვეითად მომავალი კაცებიც იქნებოდნენ, რომელთაც მხრებზე უნდა გადაეტანათ ჩვენი ბარგი

---

<sup>80</sup> იქვე, გვ. 100.

მთებზე“<sup>81</sup>

როგორც ზემოთ მოტანილი ციტატებიდან ჩანს იმერეთის სამეფო კარზე ერგვარად ჩამოყალიბებული უცხოელი სტუმრის მიღების ცერემონიას ვხედავთ. სტუმრების დახვედრა, მათი უზრუნველყოფა ბინითა და კვებით, მათზე მიმაგრებული დამხმარეები, ოფიციალური მიღება და არაოფიციალური პურობა-ნადიმობა, შემდეგ ღირსეული გაცილება ეს ყველაფერი იმის ნიშანი იყო, რომ ელჩების მიმღები სამეფო ნამდვილად კულტურულ, ცივილიზებულ ნაწილს ეკუთვნოდა და ამასთან დაინტერესებულაც იყო ელჩები კმაყოფილები გაეგზავნა უკან. თვითონ ელჩების მიერ ჩაწერილი ინფორმაცია კი ძალიან მნიშვნელოვანი წყაროა იმ პერიოდის იმერეთის სამეფო კარის შესახებ. აშკარაა, რომ არც ელჩები წასულან აქედან უკმაყოფილოები და თავიანთი მისიაც წარმატებით შეასრულეს.

ამის შემდეგ საინტერესოა ფრანგი მოგზაური ჟან შარდენის აუდიენცია ვახტანგ V-სთან, რომელიც ასევე აღწერს თუ როგორი პატივით მიიღეს, გაუმასპინძლდნენ, ზრუნავდნენ მის თავშესაფარსა და საკვებზე. ამ შემთხვევაში ელჩის მიღების ცერემონია თითქმის ისეთივეა, როგორიც ტოლოჩანოვის შემთხვევაში. განსხვავება ის არის, რომ შაჰნავაზ-ხანი ირანის შაჰის ვასალი იყო და ქართლის სამეფო კარზე სპარსული გავლენა უფრო მეტად იგრძნობოდა.<sup>82</sup>

რაც შეეხება XVIII საუკუნის II ნახევარში ქართლ-კახეთში უცხოელი სტუმრის მიღების ცერემონიას, მან შედარებით სრულყოფილი სახე მიიღო და დაუხლოვდა ევროპული სტილის ნიმუშს. ისიც აღსანიშნავია, რომ საქართველოში უცხოელი სტუმრის მიღების ცერემონია ყოველთვის ჰგავდა და უახლოვდებოდა ევროპულს, სამუხაროდ იყო შემთხვევები, როდესაც ქვეყანა დიდ გასაჭირში მყოფი სათანადო ყურადღება ვერ უთმობდა ამ მიმართულებას. ერეკლე II-მ გაატარა მნიშვნელოვანი რეფორმები, რის შედეგადაც საგარეო საქმეთა უწყება ცალკე ჩამოყალიბდა,

<sup>81</sup> ტოლოჩანოვის იმერეთში ელჩობის მუხლობრივი აღწერილობა, გვ. 142.

<sup>82</sup> ქართული დიპლომატიის ისტორია (ქრესტომათია), გვ. 337-339.

რომელსაც მდივანთუხუცესი ხელმძღვანელობდა. ცნობილია, რომ ქართლ-კახეთის სამეფო კარზე ორი მდივანთუხუცესი ჰყავდათ: ერთი-მართლმადიდებელი, რომელიც ქრისტიან სახელმწიფოებთან ურთიერთობებს ხელმძღვანელობდა და მეორე – მუსლიმი, ამ მდივანთუხუცესს მაჰმადიანურ სახელმწიფოებთან ურთიერთობა ებარა. ასევე აღსანიშნავია ის ფაქტიც, რომ უცხო ქვეყნის ელჩებს ისეთ დახვედრას უწყობდნენ, როგორი დამოკიდებულებაც ჰქონდა თავად ამ ქვეყანას ქართულ პოლიტიკურ ერთეულთან.

გვიან შუა საუკუნეებშიც მეფე იყო მთავარი ფიგურა, რომლის ბრძანების მიხედვით ხდებოდა უცხოელი სტუმრის მიღება. თუ უცხო ქვეყნის წამომადგენლის ვიზიტის შესახებ აღრე იყვნენ გაფრთხილებულნი, მაშინ სამზადისიც შესაბამისად აღრე იწყებოდა. როდესაც მნიშვნელოვანი შეხვედრა იგეგმებოდა სამეფო კარს საგანგებოდ ალაშაზებდნენ. მეფე ასეთი ოფიციალური და მნიშვნელოვანი აუდიენციის დროს საზეიმო, ძვირფას სამოსში გამოწყობილი უნდა ყოფილიყო და სამეფო ნიშნებით წარმდგარიყო სტუმრის წინაშე. სასახლეში, ასევე, იწვევდნენ ქვეყნის წამყვან პოლიტიკურ და სასულიერო პირებს, მეფე მათთან ერთად ხვდებოდა უცხოელ ელჩებს.

ბოლოს შეგვიძლია ერთი მაგალითი კიდევ განვიხილოთ, რომელიც კიდევ ერთხელ დაგვანახებს იმ დეტალებს, რასაც მოიცავდა XVIII საუკუნის დიპლომატიური ეტიკეტი. ერეკლე II-ის და გენერალ ტოტლებენის შეხვედრას საინტერესოდ აღწერს დე გრაი დე ფუა. მასთან ვკითხლობთ: *„მეფე ერეკლე თვით მოემართებოდა გრაფ ტოტლებენთან შესახვედრად. როდესაც გრაფმა შეიტყო, რომ ერეკლე მოუახლოვდა, იგი მაშინვე გაემართა მის შესახვედრად სამი თუ ოთხი ოფიცრის თანხლებით ... მას ეგონა, რომ მაშინვე შევიდოდა მეფის ჩარდახში, მაგრამ მეტად განკვიფრებული დარჩა, როდესაც მას გამოეგება თორმეტამდე ქართველი დიდებული ხელში დიდი თეთრი კვერთხებით. მღაბალი სალამი მისცეს და სალამი მისცეს და მისთვის*

გამზადებულ კარავში შეიპატიუეს ... ნახევარი საათის შემდეგ მოვიდა ოთხი ქართველი დიდებული, რათა მისალმებოდნენ მას ერეკლეს სახელით ... გრაფი განცვიფრებული იყო. მას წარმოდგენა არ ჰქონდა, რომ პატარა აზიელი ხელმწიფე ესოდენ ძნელი სანახავი იყო. საათზე მეტი იცადა ... ბოლოს მას განუცხადეს, რომ შეეძლო წარსდგომოდა მეფეს. თორმეტი ქართველი თეთრი კვერთხებით ხელში წინ უძღვოდა მას. ერეკლე სპარსული სახის ლამაზ ჩარდახში იყო. როდესაც ტოტლებენმა ჩარდახის წინკარს მიაღწია, მას წარუდგა ერეკლეს ვაჟი. ტოტლებენი გადაეხვია მას, რამაც განაცვიფრა ეს ყმაწვილი კაცი, ვინაიდან ჩვეულება იმისა, რომ მამაკაცები ერთმანეთს გადახვეოდნენ, საქართველოში ჯერ მიღებული არ არის. შემდეგ კარებში მას დახვდა ერეკლეს ბიძა, საქართველოს პატრიარქი. გრაფმა მოინდომა გადახვეოდა მას, მაგრამ პატრიარქმა უკან დაიხია, პირჯვარი გადასახა მას და პირველი შევიდა ჩარდახში. ტოტლებენი შეჰყვა მას. ერეკლე ნოხებზე იჯდა. იგი წამოდგა, როდესაც დაინახა, რომ გრაფი შემოდიოდა. გვერდით მოისვა. დასხდნენ პატრიარქი და ერეკლეს ვაჟიშვილიც ... ბოლოს ტოტლებენი წამოდგა და ერეკლეს გამოეთხოვა ... ტოტლებენი წამოვიდა და ერთადერთი, ვინც ჩარდახიდან გამოაცილა, იყო ერეკლეს უფროსი ვაჟი, ბატონიშვილი გიორგი. გრაფი მეტად უკმაყოფილო დაბრუნდა. მას ეგონა, რომ საქმე ექნებოდა მასავით აჩქარებულ კაცთან, რომელიც მიიღებდა მის წინადადებას და მის განხორციელებასაც უმაღვე შეუდგებოდა<sup>83</sup> მთელი ეს ცერემონია ნათლად გამოხატავს იმ ინტერესებს, რაც ამოძრავებდა ორივე მხარეს. ასევე საინტერესოა ის, რომ ქართული დიპლომატიური ეტიკეტი და სტუმრის მიღების ცერემონია უფრო დახვეწილი ჩანს, ვიდრე გენარალ ტოტლებენის „თავისუფალი“ ქცევა, რომელიც არ ჯდება ქართულ სტუმრის მიღების ტრადიციულ ცერემონიაში. მაგრამ, როგორც ვხედავთ ეს აუდიენციაც გარკვეული წესების დაცვით ჩაუტარებიათ.

დასკვნის სახით შეგვიძლია ვთქვათ, გვიან შუასაუკუნეებში საქართველოში

---

<sup>83</sup> ქართული დიპლომატიის ისტორია (ქრესტომათია), გვ. 375–379.

უცხოელი სტუმრის მიღების ცერემონია შემდეგი ნაწილებისგან შედგებოდა: სტუმარს საზღვართან ხვდებოდნენ და მის უსაფრთო გადაადგილებას უზრუნველყოფდნენ; აუცილებელი იყო სტუმრების ბინითა და საკვებით უზრუნველყოფა, სამეფო კარზე საპატიო მიღებას მოჰყვებოდა მეფესთან სადილობა, იმართებოდა ღია თუ ფარული მოლაპარაკებები, ბოლოს კი საპატიო გაცილებას უწყობდნენ. უცხო სტუმრის, ანუ ელჩის მიღების ცერემონია მოიცავდა ყველა იმ ძირითად ფორმას, რომელიც მიღებული იყო იმდროეიდელ მსოფლიოში. შესაძლოა მძიმე ეკონომიკური მდგომარეობა არ აძლევდა ქართველებს მდიდრულად დახვედროდნენ უცხოელ სტუმრებს, მაგრამ ჩვენი ქვეყნის შესაძლებლობების გათვალისწინებით უნდა ვთქვათ, რომ იმ ელემენტარულ ნორმებს მაინც იცავდნენ რაც აუცილებელი იყო. დიპლომატიურ ურთიერთობებს ყოველთვის დიდი მნიშვნელობა ენიჭებოდა და საკმაოდ დიდ როლსაც თამაშობდა ჩვენი ქვეყნის ისტორიაში.

## თავი VII

### მეფის დაკრძალვა

ჩვენ განვიხილეთ სხვადასხვა ცერემონიები, რომლებიც ტარდებოდა შუა საუკუნეების სამეფო კარზე. აღსანიშნავია კიდევ ერთი, დაკრძალვის ცერემონია, რომელიც, ასევე, ერთ-ერთი მნიშვნელოვანი იყო. ქრისტიანული სარწმუნოება ადამიანს ავალდებულებდა მიცვალებულისთვის პატივი მიეგო და გარკვეული წესების დაცვით მიწისთვის მიეზარებინა. რაც შეეხება მეფის დაკრძალვის ცერემონიას, ის, თავსთავად, მოითხოვდა მეფე პატივით დაეკრძალათ და მთელი რიგი წესები დაეცვათ.

ჩვენთვის ცნობილია სხვადასხვა ისტორიკოსთან დაცული „გლოვის წესი“, როგორი იყო ეს ცერემონია, დეტალური ინფორმაცია არ გვაქვს, მაგრამ ზოგადი სურათის აღდგენას მაინც შევცდებით. საინტერესოა როგორ აღწერს მემკვიდრე ვახტანგ გორგასლის სიკვდილის ამბავს. კერძოდ ჯუანშერი წერს: *„მაშინ წარჩინებულთა და ყოველსა ერსა ზედა დღე იყო სასჯელისაჲ, და იტყებდეს ყოველნი და თავთა თვსთა ისხმიდეს ნაცარსა და ყოველნი ინატრიდეს თავისა თვსისა სიკუდილსა. და ჳმისაგან ტირილისა და ტყებისა და გოდებისა იძვროდა ქვეყანაჲ და მორწმუნე ერი ჰნატრიდა მეფესა, რამეთუ ქრისტესთვის მოიკლა. და მოკუდა ვახტანგ და დაეფლა მცხეთასა, საკათალიკოზოსა სუეტსა თანა რომელსა შინა არს დაჰყრობით სუეტი ღმრთივალმართებული“*.<sup>84</sup> როგორც ვხედავთ, მეფის სიკვდილს დიდი მწუხარება და გლოვა გამოუწვევია. ჯუანშერი დეტალებში აღარ აღწერს მეფის დაკრძალვის

---

<sup>84</sup> ჯუანშერი. გამოსცა ზ. სარჯველაძემ. ქართლის ცხოვრება. თბ.2008, გვ. 221.

ცერემონიას. მხოლოდ სად დაიკრძალა იმის მითითებით შემოიფარგლება. როგორც ჩანს, ისტორიკოსები ნაკლებად ამახვილებდნენ დაკრძალვის ცერემონიაზე ყურადღებას, რადგან, ერთის მხრივ, ის ყველასთვის ცნობილი იქნებოდა, ხოლო მეორეს მხრივ, არც თუ ისე სასიამოვნო აღსაწერი. თავისთავად უსიამოვნო პროცესი იქნებოდა და მასზე აღარ ამახვილებდნენ ყურადღებას.

განვაგრძოთ ცნობების მოძიება, შემდეგი საინტერესო მომენტი აღწერილი აქვს დავითის ისტორიკოსს, ეს ცნობა არ უკავშირდება კონკრეტულად მეფის გლოვას და დარძალვას, მაგრამ აღწერს სამეფო საკვზე როგორ გლოვობდნენ დიდებული მოხელის გარდაცვალებას. *„მაშინ ოვსეთს ყოფასა მიიცვალა გიორგი ჭყონდიდელი, თავსმდეები სიყრმითაგანთა პატრონის-მსახურებათად; და პატივითა დიდითა წარმოვზავნა მონასტერსა ახალსა და მუნ დაემარხა, რომელი ივლოვა ყოველმან სამეფომან და თვთ მეფემან უმეტესცა მამისა შემოსითა შავისადთა ორმოც დღე, ვიდრემდის იშვა ვახტანგ, რომლისა ხარებითა დაჯსნა გლოვაჲ“.*<sup>85</sup> როგორც ვხედავთ, მეფე თავის ერთგულ მოხელეს ორმოცი დღის განმავლობაში გლოვობს და აცვია შავი სამოსი. ქრისტიანულმა სარწმუნოებამ დღევანდლამდე მოიტანა გლოვის ასეთი ტრადიცია, შავებით შემოსვა ორმოცი დღის განმავლობაში. თავად მეფეც კი იცავდა გლოვის ამ წესს. აქვე მოვიტან ცნობას, რომელიც დაცულია თამარის ისტორიკოსთან და, ასევე, სამეფო გლოვის ცერემონიას ეხება. გიორგი III-ის თანამეცხედრე დედოფალის, ბურღუხანის, გარდაცვალებას ისტორიკოსი ასე აღწერს: *„ვაებანი და ტყებანი იქმნეს უამსა მას, შემსგავსებული მოსაწვეარისა ... და წესისაებრ ივლოვეს ყოველთა ქართველთა ... ამფხვრელმან თმათა და წვერისამან“.*<sup>86</sup> ზოგადად გლოვის ნიშანი იყო თმის და წვერის მოპარსვა არა მხოლოდ მეფისთვის, არამედ მამაკაცებში.

„ისტორიანი და აზმანი შარავანდედთანი“ გიორგი III-ის გარდაცვალებას ასე აღწერს: თამარი თბილისში ყოფილა, როდესაც გაუგია მეფის (მამის) გარდაცვალების

<sup>85</sup> ცხოვრებაჲ მეფეთ-მეფისა დავითისი. გამოსცა მზ. შანიძემ. ქართლის ცხოვრება. თბ. 2008, გვ. 320.

<sup>86</sup> ისტორიანი და აზმანი შარავანდედთანი. გამოსცა გ. კარტოზიამ. ქართლის ცხოვრება. თბ. 2008, გვ. 397.

ამბავი, „თამარ, პირი იგი ეთეროვანი და უკიმირო ჰაერი და უმრუმო ნათელი, შეიზღუდა ბნელითა, და მფხურელსა თმათასა უსწრობდა წყარო სისხლისა წყაროსა ცრემლთასა“. შემდეგ საინტერესო მომენთია აღწერილი, მეფის და, რუსუდანი მიდის სამეფო ტადარში ... „და იხილეს მიქაელ პატრიარქი, ყოველთა ებისკოპოზთა თანა მდგომი და ვაზირი ანტონი და ამირსპასალარი ყუბასარ და სხუანი ხელისუფალნი: ყუთლუ-არსლან მეჭურჭლეუხუცესი, ვარდან დადიანი ჩუხჩარხი, ჭიაბერი მეჯინბეუხუცესი, აფრიდონ მსახურთუხუცესი ... და დიდებულნი, აზნაურნი და მოყმენი, თანა პორფირი და გურგუნი სკიპტრითა და საჭურველითა სუანად ჭმარებულითა“.<sup>87</sup> მოცემული ციტატა გვამცნობს, რომ მეფის დაკრძალვას უმაღლესი სამღვდელთა და დიდებულნი მოხელეები ესწრებოდნენ. მათი მონაწილეობა დაკრძალვის ცერემონიაში ეჭვს არც იწვევს, რადგან მეფის კურთხევის დროს ყველა მათგანი თავის განსაკუთრებულ ფუნქციას ასრულებდა. ასევე უნდა ყოფილიყო მეფის დაკრძალვის დროსაც, რადგან მეფე ღირსეულად გაეცილებინათ წუთისოფლიდან. დაკრძალვის შემდეგ კი ასე უნდა ეგლოვათ მიცვლებული: „ბნელთა სახლთა შინა შეწყვედევასა, შთაქმასა და დაფენასა ძაძისასა და კიდე-ქმნასა ყოვლისა სანოვაგისასა“.<sup>88</sup>

გლოვა, როგორც ჩანს, ერთ წელიწადს გრძელდებოდა და მაშინ სრულდებოდა, როდესაც წლისწირვას გადაიხდიდნენ მიცვალებულისთვის. ამის შემდეგ კვლავ შეიძლებოდა მხიარულება. ამის შემდეგ, გარკვეული პერიოდის მანძილზე, ისტორიკოსები თითქმის არსად წერენ ქართველი მეფის გლოვაზე და დაკრძალვის რიტუალზე. სამაგიეროდ ერეკლე მეფის დაკრძალვის განკარგულება და მთელი ცერემონია შეგვიძლია დეტალებში განვიხილოთ, რომელიც შუა საუკუნეების რიტუალისგან ძალიან განსხვავებული არ უნდა ყოფილიყო.

„ქართული სამართლის ძეგლების“ II ტომში ტექსტის სათაური შემდეგია:

<sup>87</sup> ისტორიანი და აზმანი შარავანდედთანი. გამოსცა გ. კარტოზიამ. ქართლის ცხოვრება. თბ. 2008, გვ. 400

<sup>88</sup> იქვე, გვ. 401.

„განწესება ერეკლე მეფის დაკრძალვისა“ (1798 წ.). მასში აღწერილია „ცერემონია წარღებასა ზედა ცხედრისასა“. დასაწყისში აღნიშნულია, რომ სრულიად ზემო საქართველოს მეფე ირაკლი მეორის ცხედარი ამ კანინის და ცერემონიის დაცვით უნდა დაიკრძალოს. აღნიშნულია, რომ ეს ცერემონია ქმნილი, დაწერილი, მოგონილი და გაკეთებულია მაღალ-კეთილშობილების ალექსის ძის, თელავის სემინარიის რექტორის დავითის მიერ. პირველად დაიწყება ტირილი და გლოვა. წინ თოფხანა და ზარბაზნები უნდა განათავსონ დროშით და ამალით, წინ უფროსი აფიცრები ხმალ ამოღებულნი დადგებიან, უკან უმცროსნი ხმალდაშვებულნი. პირველად სამეფო ცხედართან მოვა თოფხანის განმგებელი, მას მოჰყვებიან მესაკარგავნი, ბალაბანდი მდაბლად დაჰკრან, უკანასკნელი პატივი მისცენ, ცრემლით იტირონ, გაბრუნდნენ და თავიანთ ადგილას დადგნენ. მოზარეებს წინ გამოუძღვებთ შავებში გამონწყობილი ცერემონმაისტერი ალექსის ძე დავით.

ამის შემდეგ დეტალურადაა ჩამოთვლილი ვინ რა უნდა გააკეთოს და ვის შემდეგ ვინ უნდა მივიდეს ცხედართან. *„შემდგომად ამისა მოვიდნენ მენინავე სარდრები: ორბელიანი და ქისიყის მოურავი, ორნივე სწორად, თავისის სამჯედროთი. თვსნი დროშანი მოუძლოდესთ წინ, დროშასთან ორ-ხორად უძლოდენ მოზარენი და მათს წინ ცერემონმაისტერი. მეფის ცხედართან იტირონ, თავი მოუდრიკონ დროშათა, და თვითცა სარდართა თავი მოიხარონ თაბშიშველთა, გაბრუნდნენ და თვისსა განწესებულსა ადგილსა დადგნენ.*

*შემდგომ ამისა ქართლისა და კახეთისა მემარცხენე სარდრები მოვიდენ, ორნივე თანაჰსწორად, თვისთა სამხედროსა გუნდითა, წინ თვსნი დროშანი მოუძლოდენ; მათ წინ ორნი ხორონი მოზარენი და ამათს წინ ცერემონმაისტერი. სამეფოს ცხედართან მოვიდენ, დაბლის ჯმით ცრემლით იტირონ, თავშიშველთა თვითცა თავი მოიხარონ ცხედარსა და დროშათაცა, საუკუნო ამბორი მისცენ, წარვიდენ და თვსსა განწესებულსა ადგილსა დადგნენ, თვსსა განწესებულსა ადგილსა დადგნენ,*

თვსთა გუნდთა და სამჯედროთა განწესებულსა აღვილსა დადგნენ, თვსთა გუნდთა და სამჯედროთა თანა.

შემდგომად ამისა ქართლისა და კახეთისა მემარცხენე სარდრები მოვიდნენ, ორნივე თანაჰსწორად, თავისთა სამხედროთა, წინ თვსნი ღროშანი მოუძლოდენ; მათ წინ ორნი ხორონი მოზარენი და ამათს წინ ცერემონმეისტერი. სამეთოს ცხედართან მოვიდნენ, მდაბლის წმით ცრემლით იტირონ, თავშიშუელთა თვთცა თავი მოუხარონ ცხედარსა და ღროშათაცა, საუკუნო ამბორი მისცენ, წარვიდენ და თვსსა განწესებულსა აღვილსა მდგომარე იყუნეს, თვისის სამხედრო გუნდით.

შემდგომად ამისთან ცხენი ორი, სწორედ შეკაზმული, ორს ჯილავედარს ეჭიროს, მხარზედ ზიმფუშები დაკეთიც ეკიდოსთ, ორნი მილახორნი მიუძლოდესთ წინ, თავშიშუელნი და საყელოსეხსნილი; ცხენნი შეკაზმულნი: ერთს ტახტზედ ეკიდოს სამამაცო საჭურველნი, სამკლავები და მეორეს ცხენის ტახტას–მუზარადნი და სხუანი იარაღნი.

შემდგომად მოვიდნენ მეაბჯრენი, ესე იგი ჯაბადარნი, ხელთააქუნდესთ მშვილდისარნი და კაპარჯნი და ეგრეთვე შუბნი; იყუნენ თავშიშუელნი, საყელო–ჩამოხვეით და გოდებით მტირალნი.

ამასთან ხელჯოხიანები წესდგომით, თავშიშუელნი, საყელოჩამოხსნილნი და ხელთა შემუსრვლისა ჯოხისა მქონებელნი.

ამასთან ბოქაულთ–ხუცესნი წესდგომით, თავშიშუელნი, საყელოჩამოხსნილნი და ჯელთა შემუსრვლისა ჯოხისა მქონენი.

ამასთანაზირნი: პირველნი მარჯუენით და მეორენი მარცხენით, თავშიშუელნი, საყელო–ჩამოხსნიით.

ამასთან ლაშქარნივისნი. პირველნი მარჯუენით და მეორენი მარცხენით, თავშიშუელნი საყელო–ჩამოხსნიით.

ამასთან მოლარეთ–უხუცესნი და მოლარენი, სალაროს მწერალნი და

ფეშქაშნივისნი, მარჯუნივ და მარცხნით განყოფიით. მოლარეთ–უხუცესთა ჯელთა აქვანდესთ ფადნისნი და ფადნოსთა ზედა მდებარნი კლიტენის ალაროთანი; ესენიცა თავშისველ–მკერდლიანი.

ამასთან მდივნები, მარჯუენით პირველნი, ხოლო მარცხენით მეორენი, ჯელთა სანერლისა მქონებელნი და კალამ–შემუსრულნი, თავშიშუელნი და საყელოჩამოხსნილნი, ცრემლდენით.

შემდგომად მდივანბეგნი და მჰსაჯულნი ქართლისა და კახეთისანი, პირუელნი მარჯუენით და მეორენი მარცხენით; ამათსა წინა ახლოს უძლოდესთ მდივანბეგთა მწერალი პირველი, ეპყრას ვერცხლის ფადნოსი, ფადნოსსა ზედა ბალიში ფარჩისა და მას ზედა მდებარე წიგნი სამართლისა.

შემდგომად მანდატურთ–უხუცესნი, რომელ არიან ეშიკაღასბაში, ესენი მარჯუენით, ხოლო მარცხენით ხალვათხანის ეშიკაღასბაში; ეპყრასთ ჯელთა კვერთხნი შემუსვრილნი და იყუნენ ცრემლითა მკოდებელნი.

სემდგომად ორ–ხოროდ მგალობელნი: მარჯუენით მისის უმაღლესობის მეფის მგალობელნი, ხოლო მარცხენით მისის უწმიდესობის პატრიარხის მგალობელნი. და იტყოდენ ვალობათა ლმობიერისა ჯმითა წყნარად <<წმიდაო ღმერთოსა>>. და უკეთუ ჰნებაეს მისსა უწმიდესობასა, მგალობელნი ჰგალობენ <<კონდაკსა>> და <<იკოსსაცა>> მიცვალებულთასა . . . ხოლო მგალობელთა მარჯუენით წინა უძლოდეს კანანარხი, და ეგრეთვე მარცხენეთა ხოროთა მეორე კანანარხი“.<sup>89</sup>

როგორც ვხედავთ ერეკლე მეფის დაკრძალვის ცერემონია ყოფილა ერთ-ერთი ფართომასშტაბიანი და რთული აგებულების ცერემონია. ყოველგვარი დეტალი გათვლი და მომზადებულია, თვითოეულმა მონაწილემ იცის სად და როდის უნდა დადგეს, ან როგორ გამოხატოს მწუხარება. ეს ცერემონია მხოლოდ ერთი მეფისთვის არ ყოფილა განკუთვნილი, საუკუნეების მანძილზე ყალიბდებოდა და ემატებოდა

<sup>89</sup> ქართული სამართლის ძეგლები. ტ. II, გვ. 534–536.

გარკვეული შტრიხები. ის ძირითადი ქრისტიანული წეს-ჩვეულებები კი უცვლელი უნდა დარჩენილიყო, რომლის მიხედვითაც იკრძალებოდა მიცვალებული. მეფის დაკრძალვა და გლოვა ქვეყნის ყველა სოციალური ფენის მოვალეობა იყო და მას არა მხოლოდ ესწრებოდნენ, არამედ ყველას თავისი წვლილი შეჰქონდა ამ ცერემონიაში. აქაც, როგორც ვხედავთ, უფროს-უმცროსობა დაცული უნდა ყოფილიყო და სხვადასხვა მოხელის ეს თუ ის მოქმენდება თუ ჩაცმულობის დეტალებიც განსხვავებული და რეგლამენტირებული იყო.

ერეკლე მეფის დაკრძალვაში მონაწილეობას უმაღლეს საერო ხელისუფალთა გარდა უმაღლესი სამღვდელთა იღებდა მონაწილეობას. ეს ამ სოციალური ფენის მონაწილეობის გარეშე წარმოუდგენელიც იქნებოდა. ცალკე განწესება იყო განკუთვნილი სამღვდლო დასისტვის. ვკითხულობთ: „*უნმიდესი კათალიკოს-პატრიარხი, პირუელნი მიტროპოლიტნი, არხიეპისკოპოსნი, ეპისკოპოსნი, პირველნი არხიმანდრიტნი: მარჯუენით ქვაბთა ხევისა, ხოლო მარცხენით შუამთის არხიმანდრიტი, მოძღვართ-მოძღუარი, პროტოპაპნი: მარჯუენით მეფისა, მარცხენით კათალიკოსისა, მარჯუენითმცხეთისა, ხოლო მარცხენით ალავერდისა, კანდელაკნი მარჯუენით და მარცხენით, მეფის კარის ეკლესიის მღუდელნი მარჯუენით, მარცხენით კათალიკოსნი.*

*ხოლო შემდგომად სხვანი მღუდელნი, ვითა მათნი მღუდელმთავარნი იყუნენ მღვომარენი, ეგრეთ მათნი დეკანოსნი, კანდელაკნი და კრებულნი იყუნენ მღვომნი თვსთა ხარისხთა შინა. ეგრეთ ჰსდგენ, ვითა განწესებულ არს წერილთა შინა სამღუდელთა დასთათვის.*

*და სადაცა დასვენებულ იყოს ცხედარი მეფისა, კუბოთი, ძვრფასითა ფარჩებითა მოკრული, და ოთხსა კერძოსა ოთხნი ორთავიანი არწივნი ფარჩისანი, მიკრულნი და კუბოსა ზედა მდებარე; სამეფოსა გვრგვზსა გარდა სხუა გვრგვნი, შემოსილი ძვირფასითა სტოფითა.*

*ამასთან სანატრელის მეფის ირაკლის გუამი უნდა ეპყრასთ ბრწყინვალეთა*

თავადთა ქართლისა და კახეთისათა. ამას ცხედარსა მოჰსდევდენ ორნი სხუანნი დიაკონნი, სტიხარცმულნი და ვერცხლისა ლამპრებით აღნთებული, თეთრი სანთლები ეპყრასთ, ერთი თავით ცხედრისა და მეორე ფეხრთით, და დანაშთომნი ყულუჩნი მოჰსდევდენ; ხოლო ცხედრისა თავით სხუა ორი დიაკონი შემოსვილი და მეკმეველნი.

წინ უძლოდენ მოზარენი და ცერემონმეისტერი და საცა სახლსა და პალატსა შინა ჰბრძანდებოდეს მისი სიმაღლე დედოფალი დარეჯან, ზარით წამოუძღვენ და მასთან დარბაისელთა ცოლნი თავშიშველნი მოვიდენ ცხედარსა თანა მეფისასა; და იყოს გოდება, ტირილი და სალმობა გამოუთქმელი და უკანასკნელი გამოსალმება და დათხევა ცრემლთა.

ამას შეუდგენ ძენი მეფისანი ცხედარსა თანა მეფისასა მისასვლელნი, ამათ შეუდგენ პირველნი თავადნი. ამა პირველთა თავადთა შემდგომად მეორენი თავადნი, ხოლო ამა მეორეთა თავადთა შემდგომად მესამენი თავადნი და შემდგომად აზნაურნი და ყოველნივე თავშიშუენი.

ამათ უკან შეუდგენ რაოდენნიმე ეპიკლასბაშნი, ბოქაულთ–უხუცესნი და იასაულნი, რომელ დაბალნი ხალხნი, მამაკაცნი ანუ დედაკაცნი, ჩინებულთა გვამთა გვამთა შემანუხებელ არა ექმნენ.

ხოლო რომელნიცა ზემორე მოხსენებულ არიან სარდარნი მენინავენი, მემარჯუნენი და მემარცხენენი ყოველნივე თვს–თვსთა საკუთართა სპითა წინა უვიდოდენ, თვსთა დროშებითა, თვს–თვსთა განწესებულთა ადვილთა და ხარისხთა, ყოველნივე დანყობით ვიდოდენ, და სარანგნი თვს–თვსთად მიჩენილნი ცერემონმეისტერისაგან მართავდენ, რათა მწყობრნი არა აღირივნენ და დანყობით აქუნდეს სლვანი<sup>90</sup> ასეთი დეტალური აღწერილობა კიდევ ერთხელ გვარწმუნებს, რომ მეფის დაკმალვის ცერემონია საკმაოდ კარგად ყოფილა ორგანიზებული და ყველაფერი წესისა და კანონის ნორმებს დამორჩილებული. ზოგადაა მეფეთა

<sup>90</sup> ქართული სამართლის ძეგლები. ტ. II, გვ. 536–541.

დაკრძალვის წესი თითქმის ერთნაირი უნდა ყოფილიყო, მაგარამ ჩვენი ქვეყნის ისტორიიდან გამომდინარე რამდენჯერმე უნდა მომხდარიყო ცვლილება. სამწუხაროდ ჩვენ სხვა უფრო წინა პერიოდის ასეთი დეტალური აღწერილობა არ მოგვეპოვება, მაგრამ, ფაქტობრივად, თინალური ცერემონია ხელთ გვაქვს. პირველი დაკრძალვის, მითუმეტეს მეფეთა დაკრძალვის ქრისტიანული წესი ქრისტიანობის სახელმწიფო რელიგიად გამოცხადების შემდეგ უნდა მომხდარიყო. შემდეგ კი გზადაგზა განეცადა მას გარკვეული ცერემონიალური ხასიათის ცვლილებები. პირველი ცერემონიალური ცვლილება დაკრძალვის წესში XI საუკუნეში უნდა მომხდარიყო, როდესაც ჩამოყალიბდა ერთიანი მონარქია. სამეფო კარზე მყოფი მოხელეების უფლება-მოვალეობების ცვლილება და საერთოდ სამეფო კარის ცერემონიების სახეცვლილება ამ დროს უნდა მომხდარიყო. შემდეგ ყოველი ახალი სახელოს დამატების დროს მასში გარკვეული დეტალები აღიბეჭდებოდა. ახალი მოხელის უფლება-მოვალეობები ადგილს იკავებდა ყველა ცერემონიაში იმის გათვალისწინებით თუ როგორი იყო მისი სოციალური სტატუსი. შემდეგი ძლიერი ცვლილებების ტალღა უკავშირდება ერთიანი მონარქიის დაშლას, XV საუკუნის ბოლოს როდესაც რამდენიმე სამეფო-სამთავრო ჩამოყალიბდა სხვადასხვა სამეფო-სამთავროში ცერემონიაში მონაწილე მოხელეების უფლება მოვალეობებიც შეიცვალა. დაიწყო ადგილობრივი დიდებულების უფრო მეტად ჩართვა სამეფო კარის ცერემონიებში, რაც თავისთავად სწორიც იყო. ეს ცვლილებები ერეკლე მეფის დაკრძალვის დროს ნამდვილად ჩანს. მიუხედავად იმისა, რომ ჩვენ სხვა წყარო არ გვაქვს, რომლითაც გადავამოწმებდით ან უფრო დავაზუსტებდით ჩვენს მოსაზრებებს, ერთი რამ ცხადია, მეფის დაკრძალვის ცერემონია შედგებოდა საეკლესიო და საერო რიტუალებისგან ერთობლიობისგან. საერო ცერემონიის ცვლილება დაკავშირებული იყო პოლიტიკურ ცვლილებებთან, ხოლო საეკლესიო ცერემონია იყო ის ძირითადი ნაწილი, რომელსაც ეყრდნობოდა აღნიშნული ცერემონიალი და ნაკლებად განიცდიდა ცვლილებას. დასკვნის სახით

შეგვიძლია ვთქვათ, რომ მეფის დაკრძალვის ცერემონია ერთ-ერთი მნიშვნელოვანი ცერემონია ყოფილა, რადგან მისი დეტალურად დაგეგმა და შესრულება აუცილებელი იყო, სხვა ცერემონიების მსგავსად მასაც დიდი პასუხისმგებლობით ეკიდებოდნენ და უფროს-უმცროსობის დაცვით აღასრულებდნენ.

## დასკვნა

ჩვენს მიერ განხილული სამეფო კარის ცერემონიები ნათელად ასახავს შუა საუკუნეების საქართველოში არსებულ კულტურულ, პოლიტიკურ თუ სოციალურ მდგომარეობას. ცერემონიების ჩატარება მოითხოვდა ყველა იმ ნიუანსის გათვალისწინებას, რაც მნიშვნელოვანი იყო ქართული კულტურისთვის. ცერემონიებზე დაკვირვებიდან ჩანს თუ რამდენად დიდი მნიშვნელობა ჰქონდა ქრისტიანობას ქართული საზოგადოებისთვის და, ასევე, კულტურისთვის. ყველა მნიშვნელოვანი ცერემონია მოითხოვდა სამღვდელოების მონაწილეობას მისი სრულყოფილად ჩატარებისთვის. მეფის კურთხევა, დარბაზობა და დაკრძალვა სამღვდელოების

მონაწილეობის გარეშე არ ტარდებოდა.

საზოგადოების კულტურისა და განვითარების განმსაზღვრელად შეგვიძლია მივიჩნიოთ უცხოელი სტუმრის მიღების ცერემონია. საუკუნეების განმავლობაში შეუცვლელი სტუმართმოყვარეობით ხდებოდა სხვა ქვეყნის წარმომადგენლების მიღება, რომელიც შუა საუკუნეების ყველა განვითარებული ქვეყნის ერთ-ერთი უმნიშვნელოვანესი ცერემონია იყო. დღემდე უცხოელ ელჩებსა თუ სტუმრებს საზეიმოდ ხვდებიან, უმასპინძლებიან და მათ უკან დაბრუნებაზეც ზრუნავენ. ეს კი მიგვანიშნებს რომ საქართველო საკმაოდ ადრე ყოფილა განვითარების იმ დონეზე, რომელზეც განვითარებული ქვეყნები იყვნენ, ანუ საქართველოში უცხოელი სტუმრის მიღება სრულად პასუხობდა იმ საერთაშორისო სტანდარტებს, რომლებიც მიღებული გახლდათ სხვა დანაწარმებულ ქვეყნებში.

ასევე საინტერესოა დარბაზობისა და პურობის ცერემონიები, რომლებიც სამეფო კარზე მთელი რიგი წესების დაცვით მიმდინარებდა. სამეფო კარზე ასრებული დარბაზობის ცერემონია და მასში მონაწილე მოხელეები გარკვეულ წილად შეგვიძლია დღევანდელ პარლამენტის სხდომებს დავაკავშიროთ. თითოეული მოხელის უფლება-მოვალეობები, განწერილი პროტოკოლების დაცვა, ყველაფერი ეს ერთმანეთს წააგავს. შესაძლოა გამოვთქვათ მოსაზრება, რომ სწორედ ძველი დარბაზობის ცერემონია იყო ის ბაზისი, რომლის გარდაქმნის და მრავალგზის დახვეწის შემდეგ მივიღეთ თანამედროვე ტიპის საპარლამენტო სხდომები. ასეთი მრავალფუნქციური სამეფო დარბაზის არსებობა სწორედ, რომ ჩვენი ქვეყნის განვითარების მაჩვენებელი იყო.

საინტერესოა სამეფო ცერემონიალური სამოსის საკითხი, როგორც ზემოთ განვიხილეთ, მეფე და დიდებულები, წესის მიხედვით, გამოწყობილები უნდა ყოფილიყვნენ საზეიმო და ძვირფას სამოსში. აღნიშნული ხდებოდა მნიშვნელოვანი შეკრებებისა და აუდიენციების დროს. დღევანდელ რეალობაში ქართულ საზოგადოებაში ეს ტრადიცია გარკვეული ტრანსფორმაციით კვლავ ცოცხლობს და

მნიშვნელოვანი ღონისძიებების ჩატარება სწორედ საზეიმო სამოსში გამოწყობილ დამსწრე საზოგადოებას გულისხმობს, ერთ-ერთი განსხვავება ისაა, რომ ტრადიციული ქართული სამოსი ჩაანაცვლა ევროპულმა.

კიდევ ერთი ცერემონია, რომელიც, თითქმის, უცვლელად შემოგვრჩა არის დაკრძალვის ცერემონია. ეს ფაქტი უფრო განპირობებულია ქრისტიანული წეს-ჩვეულებების დაცვით, ქრისტიანობის დამკვიდრების შემდეგ შემუშავდა ერთგვარი რელიგიური დაკრძალვის ცერემონია, რომელიც მცირე დეტალების ცვლილებით დღემდე აგრძელებს არსებობას და ასრულებს თავის ფუნქციას. რელიგიური დატვირთვის მქონე ცერემონიალები დღემდე, ფაქტობრივად, ავთენტური სახითაა შემორჩენილი და ხშირად გამოიყენება საეკლესიო პრაქტიკაში.

დასასრულ უნდა აღინიშნოს, რომ კავშირები ძველ ქართულ ცერემონიებსა და დღევანდელ ცერემონია-რიტუალებს შორის, რომელიც მაგალითია საქართველოს კულტურული განვითარების უწყვეტი ჯაჭვისა, კიდევ უფრო ზრდის ყველა ამ ტრადიციისა თუ ცერემონიის მნიშვნელობას.

## გამოყენებული წყაროები და ლიტერატურა

### წყაროები:

- დიდი სჯულის კანონი. გამოსაცემად მოამზადა ე. გაბიძაშვილმა. თბ. 1975;
- ისტორიანი და აზმანი შარავანდედთანი. გამოსცა გ. კარტოზიამ. ქართლის ცხოვრება. თბ. 2008;
- ლაშა-გიორგის მემათიანე. გამოსცა ც. ქურციკიძემ. ქართლის ცხოვრება. თბ. 2008;
- მატიანე ქართლისაჲ. გამოსცა მ. ლორთქიფანიძემ. ქართლის ცხოვრება, თბ. 2008;

მცირე სჯულის კანონი. გამოსაცემად მოამზადა ე. გიუნაშვილმა. თბ. 1972;

პაპუნა ორბელიანი. ამბავნი ქართლისანი. გამოსცა ე. ცაგარეიშვილმა. თბ. 1981;

ჟამთააღმწერელი. ასწლოვანი მათიანე. გამოსცა გ. ალასანიამ. ქართლის ცხოვრება. თბ. 2008;

სუმბატ დავითის ძე. ცხოვრებად და უწყებად ბაგრატიონიანთად. გამოსცა მ. ლოთქიფანიძემ. ქართლის ცხოვრება. თბ. 2008;

ტოლოჩანოვის იმერეთში ელჩობის მუხლობრივი აღწერილობა (1650–1652 წწ.). გამოსცა ი. ცინცაძემ. თბ. 1970;

ქართული დიპლომატიის ისტორია (ქრესტომათია). რედ. რ. მეტრეველი. თბ. 2004;

ქართული სამართლის ძეგლები. ტექსტი გამოსცა, გამოკვლევა და ლექსიკონი დაურთო ი. დოლიძემ. ტ. I, თბ. 1963;

ქართული სამართლის ძეგლები. ტექსტები გამოსცა, შენიშვნები და საძიებლები დაურთო პროფ. ი. დოლიძემ. ტ. II თბ. 1965;

ცხოვრებად მეფეთ-მეფისა დავითისი. გამოსცა მზ. შანიძემ, თბ. 2008;

ჯუანშერი. გამოსცა ზ. სარჯველაძემ. ქართლის ცხოვრება. თბ. 2008.

#### ლიტერატურა:

ანთელავა ილ., საქართველოს ცენტრალური და ადგილობრივი მმართველობა XI-XIII სს. თბ. 1983;

ბახტაძე მ., ერისთავობის ინსტიტუტი საქართველოში. თბ. 2003;

ბერძენიშვილი ნ., საქართველოს ისტორიის საკითხები. ტ. III. თბ. 1966;

ბოგვერაძე ა., ქართლის პოლიტიკური და სოციალურ-ეკონომიკური განვითარება IV–VIII სს., თბ. 1979;

კაკაბაძე ს., ძეგლის დადება გიორგი ბრწყინვალის მიერ. თბ. 1913;

სამუშია ჯ., ბაგრატ III, თბ. 2012;

ქართული დიპლომატიის ისტორია. მთ. რედ. რ. მეტრეველი. თბ. 2003;

ჩიტაია გ., სამი ინსიგნია (წარჩინების ნიშანი) ამიერკავკასიიდან, მასალები საქართველოს ეთნოგრაფიისათვის XVI–XVII სს. თბ. 1972;

ციციშვილი ი., მასალები ქართული ჩაცმულობის ისტორიისთვის. თბ. 1954;

ჯავახიშვილი ივ., თხზულებანი თორმეტ ტომად. ტ. VI. თბ. 1982;

ჯავახიშვილი ივ., თხზულებანი თორმეტ ტომად. ტ. VII, თბ. 1984;

Eastmond A., Royal Imagery in Medieval Georgia. Pennsylvania State University Press. 1998.